

Liahona



**Gitawag sa
Pagserbisyo:
Karon ang
Panahon, p. 20**

**Mga Ideya gikan sa
Basahon sa Mormon
alang sa Samok nga
mga Panahon, p. 30**

**Asa nga Lobo ang
Inyong Pakaunon? p. 52**

**Kalihokan sa Pamilya:
Countdown para
sa Umaabot nga
Komperensya, p. 63**



© ELSEPETH YOUNG, DILI MAHIMONG PAKOPAHAN

Siya sa Kinabubut-on Nagabuhat Uban sa Iyang Kamot, ni Elspeth Young

Si Lydia usa ka tigbaligya og panapton nga purpura sa siyudad sa Tiatira. Sama sa mahiyason nga babaye nga gihulagway sa Mga Proverbio, si Lydia “sa kinabubut-on nagabuhat uban sa iyang kamot” (Mga Proverbio 31:13).

Siya usa niadtong mga naminaw ni Apostol Pablo ug “ang iyang kasingkasing giablihan sa Ginoo, aron iyang patalinghugan ang gisulti ni Pablo” (Mga Buhat 16:14).

Human siya ug ang iyang pamilya nabunyagan, iyang gidapit si Pablo sa iyang balay sa pagtudlo pa kanila (tan-awa sa Mga Buhat 16:15).



Liahona, Septyembre 2012

MGA MENSAHE

- 4 Mensahe sa Unang Kapanguloan: Kinasingkasing nga Pagpakigbahin sa Ebanghelyo**
Ni Presidente Henry B. Eyring
- 7 Mensahe sa Visiting Teaching: Espesyal nga mga Panginahanglan ug Serbisyo nga Nabuhat**

LABING IMPORTANTING MGA ARTIKULO

- 12 Pagpalambo og Pagtuo diha kang Kristo**
Ni Elder D. Todd Christofferson
Ang atong hugot nga pagtuo labaw pa kaysa usa ka baruganan sa aksyon.
- 16 Pagpakigbahin sa Ebanghelyo pinaagi sa Inyong Maayong Ehemple**
Nila ni Stephanie J. Burns ug Darcie Jensen

- 20 Mga Senior Missionary: Pagtubag sa Panawagan sa Propeta**
Ni Kendra Crandall Williamson
Ang pagbuntog sa mga babag sa misyonaryo nga pagserbisyo nanginahanglan og hugot nga pagtuo apan nagdala og dagkong mga ganti.

- 30 Giunsa sa mga Disipulo ni Kristo Pagpuyo Panahon sa Gubat ug Kasamok**
Ni David Brent Marsh

- 35 Ang Ting-ani Moabut Ra**
Ni Michael R. Morris
Kon kita masulundon, ang mga panalangin sa Dios siguradong moabut.

ANAA SA HAPIN
Atubangan: Gilitratohan ni Robert Casey. Sa luyo: Litrato sa maayong kabubut-on nila ni Grant ug Terri Whitesides.

MGA DEPARTAMENTO

- 8 Notebook alang sa Komperensya sa Abril**
- 9 Alang sa Kalig-on sa mga Kabatan-onan: Maalamong Paggamit sa Kabubut-on**
- 10 Kami Namulong kang Kristo: Paghigugma sa Akong mga Kaaway**
Pangalan gipugngan
- 26 Atong mga Panimalay, Atong mga Pamilya: Ang mga Panalangin sa Pag-focus diha sa Templo**
Ni Joshua J. Perkey
- 38 Mga Tingog sa mga Santos sa Ulahing mga Adlaw**
- 74 Mga Balita sa Simbahan**
- 79 Mga Ideya sa Family Home Evening**
- 80 Hangtud Kita Magkita Pag-usab: Unsa ang Akong Bili?**
Ni Adam C. Olson



42

42 Namulong Sila Kanato: Kamo Mao ang Kahayag alang sa Kalibutan
Ni Adrián Ochoa



48



Tan-awa kon inyo bang makit-an ang Liahona nga gitago dinhi niini nga isyu. Timaan: Pagtam-bong sa "Primary".

46 Mubo ug Direkta

48 Pagbalanse sa Inyong Kinabuhi

Ni Elder M. Russell Ballard
Walo ka mga baruganan nga makatabang kaninyo nga mag-pabiling balanse sa kalibutan nga wala mabalanse.

51 Poster: Gamita ang Panahon sa Maalamong Paagi

52 Alang sa Kalig-on sa mga Kabatan-onan: Kabubut-on ug Pagkamay-tulubagon
Ni Elder Shayne M. Bowen

54 Napanalanginan pinaagi sa Ehempro

Ni Elder O. Vincent Haleck
Ang paghimo og maayong ehempro adunay dako kaayo nga mga epekto.

57 Ang Pinakagamhanan nga Kasundaluhan

Ni H. Daniel Wolke Canales
Nasayud ko nga ganahan kong moserbisyo, apan moserbisyo ba ko sa kasundaluhan o sa kasundaluhan sa Dios?

58 Atong Luna



64

59 Pagkat-on sa Pagbasa
Ni Elder Larry R. Lawrence

Ang pagkat-on sa pagbasa nakatabang kanako sa pagkakaplag sa ebanghelyo.

60 Misyonaryo nga Higala
Ni Jane McBride Choate

Ang pagpakigbahin sa ebanghelyo ingon ba gayud ka sayon sama sa pagdapit og higala sa Primary?

62 Atong Pahina

63 Countdown alang sa Kinatibuk-ang Komperensya

Gamita kining kalihokan sa pagpangandam sa komperensya.

64 Pagdala sa Primary ngadto sa Panimalay: Ang Napulo ka Sugo Nagtudlo Kanako sa Paghigugma sa Dios ug sa Iyang mga Anak

66 Hi! Ako si Timofei gikan sa Kyiv, Ukraine

Ni Chad E. Phares
Si Timofei midapit og tulo ka mga higala alang sa open house sa templo.

68 Mga Istorya kabahin ni Jesus: Si Jesus Mibisita sa mga Nephite

Ni Diane L. Mangum

70 Para sa Gagmayng mga Bata

81 Mga Tawo sa Kasulatan diha sa Basahon ni Mormon

Internasyonal nga magasin sa Ang Simbahan ni Jesukristo sa mga Santos sa Ulahing mga Adlaw nga giimprinta sa Cebuano

Ang Unang Kapangulohan: Thomas S. Monson, Henry B. Eyring, Dieter F. Uchtdorf

Korum sa Napulog Duha ka mga Apostoles:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Editor: Paul B. Pieper

Mga Adviser: Shayne M. Bowen, Craig A. Cardon, Bradley D. Foster, Christoffel Golden Jr., Anthony D. Perkins

Tigdumalang Direktor: David T. Warner

Direktor sa Editorial: Vincent A. Vaughn

Direktor sa Grapiks: Allan R. Loyborg

Tigdumalang Editor: R. Val Johnson

Mga Luyo-luyo sa Tigdumalang Editor:

Jenifer L. Greenwood, Adam C. Olson

Kauban mga Editor: Susan Barrett, Ryan Carr

Mga Kawani sa Editorial: Brittany Beattie, David A.

Edwards, Matthew D. Flitton, LaRene Porter Gaunt,

Carrie Kasten, Lia McClanahan, Melissa Merrill, Michael R.

Morris, Sally J. Odekir, Joshua J. Perkey, Chad E. Phares,

Jan Pinborough, Paul VanDenBerghe, Marissa A. Widdison,

Melissa Zenteno

Tigdumalang Direktor sa Art: J. Scott Knudsen

Direktor sa Art: Scott Van Kampen

Tigdumala sa Produksyon: Jane Ann Peters

Mga Senior nga Tigdesinyo: C. Kimball Bott, Colleen

Hinckley, Eric P. Johnsen, Scott M. Mooy

Mga Kawani sa Desinyo ug Produksyon: Collette Nebeker

Aune, Connie Bowthorpe Bridge, Howard G. Brown, Julie

Burdett, Bryan W. Gygi, Kathleen Howard, Denise Kirby,

Ginny J. Nilson, Gayle Tate Rafferty

Prepress: Jeff L. Martin

Direktor sa Pag-imprinta: Craig K. Sedgwick

Direktor sa Paggang-apud-apod: Evan Larsen

Paghubad: Francisco M. dela Cruz

Ipadala ang subskripsyon, mga pangutana, ug mga taho ngadto sa *Dateline Philippines* sa *Liahona*, The Church of Jesus Christ of Latter-day Saints, Temple Drive, Greenmeadows Subdivision, Quezon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P86.40 matag tuig, P4.00 matag gula, gawas sa mga espesyal nga isyu.

Isumiter ang mga manuskrito ug mga pangutana online sa liahona.lds.org; kon ipadala ngadto sa *Liahona*, Room 2420, 50 East North Temple Street, Salt Lake City, UT 84150-0024, USA; o i-e-mail sa: liahona@ldschurch.org

Ang *Liahona* (usa ka termino sa Basahon ni Mormon nga nagpasabut nga "kompas o direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2012 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Gi-imprinta sa Tinipong Bansa sa Amerika.

Ang teksto ug biswal nga materyal diha sa *Liahona* mahimong kopyahan alang sa sulagma, dili pangkomersyo nga paggamit sa simbahan o panimalay. Ang biswal nga materyal dili mahimong kopyahan kon kini adunay mga pagdili diha sa linya sa kredito sa maong artwork. Ang mga pangutana kinahanglan ipadala ngadto sa Intellectual Property Office, 50 East North Temple Street, Salt Lake City, UT 84150, USA; e-mail: cor-intellectualproperty@ldschurch.org.

For Readers in the United States and Canada: September 2012 Vol. 15 No. 9. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Post Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Anaa pay Internet Liahona.Lds.org



PARA SA MGA HAMTONG

Basaha ang makapadasig nga mga istorya kabahin sa mga senior missionary nga gipangbuntog ang mga babag aron makaserbisyo (tan-awa sa pahina 20). Tan-awa ang mga litrato ug pagpamatuod sa uban pang mga senior missionary sa lain-laing dapit sa liahona.lds.org.

PARA SA MGA KABATAN-ONAN

Sa pahina 52, inyong mabasa ang una sa sunod-sunod nga mga artikulo kabahin sa mga baruganan diha sa bag-ong pamphlet sa *Alang sa Kalig-on sa mga Kabatan-onan*. Pagpangita og dugang ideya kabahin sa mga baruganan sa youth.lds.org.

PARA SA MGA BATA

Sulayi ang kalihokan nga "Countdown alang sa Kinatibuk-ang Komperensya" sa pahina 63 ug pagpangita og uban pang mga kalihokan sa komperensya sa lds.org/general-conference/children.

SA INYONG PINULONGAN

Ang *Liahona* ug ubang mga materyal sa Simbahan anaa sa daghang pinulongan sa languages.lds.org.

MGA HILISGUTAN NIINI NGA ISYU

Mga numero sa pahina nagrepresentar sa unang pahina sa artikulo.

Balanse, 48, 51

Basahon ni Mormon, 30, 68, 81

Buhat sa templo, 26

Ehemplo, 42, 54

Gugma, 10

Hugot nga Pagtuo, 12, 20

Jesukristo, 68

Kabubut-on, 9, 51, 52

Kahibalo [literacy], 59

Kalinaw, 38

Kalisdanan, 30

Kamatayon, 26, 30, 38

Kasuguan, mga, 64

Kinatibuk-ang komperensya, 8, 41, 63

Misionaryo nga buhat, 4, 12, 16, 20, 39, 40, 41, 42, 46, 57, 60

Pag-ampo, 48, 58

Paghinulsol, 30

Pagkabanhaw, 68

Pagkakabig, 26, 54, 59

Pagkamasulundon, 30, 35, 64

Pagpamatuod, 47

Pagpaningkamot sa kaugalingon, 35

Pagpasaylo, 10

Pakigsaad, mga, 12

Pamilya, 26, 40, 66

Panalangin, mga, 35

Primary, 70

Serbisyo, 7, 20, 44

Sumbanan, mga, 40

Tagsa-tagsa nga Bili, 80

Temple garment, mga, 47

Trabaho, 35

Visiting teaching, 4



Ni Presidente
Henry B. Eyring
Unang Magtatambag sa
Unang Kapangulohan

KINASINGKASING NGA Pagpakigbahin sa Ebanghelyo

Ang Dios moandam og mga tawo nga modawat sa ebanghelyo ngadto sa Iyang andam nga mga sulugoon nga gustong mosangyaw niini. Kini nahitabo mismo sa inyong kinabuhi. Kon kapila kini mahitabo mag-agad sa pagpangandam sa inyong hunahuna ug kasingkasing.

Ako adunay higala nga nag-ampo kada adlaw nga mahimamat og usa ka tawo nga andam modawat sa ebanghelyo. Siya nagdala og kopya sa Basahon ni Mormon. Pagkagabii sa wala pa siya mobiyahe, siya mihukom nga dili magdala og kopya apan pass-along kard lang. Apan sa dihang molakaw na siya, mibati siya og espiritwal nga impresyon. “Pagdala og Basahon ni Mormon.” Nagbutang siya og usa niini sa iyang bag.

Sa dihang ang usa ka babaye nga iyang kaila mipad kaniya atol sa biyahe, siya naghunahuna, “Siya na ba kaha?” Nagkasakay na usab sila sa pagbalik. Siya naghunahuna, “Unsaon nako sa paghisgut kaniya sa ebanghelyo?”

Apan, ang iyang kaila miingon kaniya, “Di ba, nagbayad mo og ikapulo sa inyong simbahan?” Siya miingon nga siya nagbayad. Ang iyang kaila miingon nga angay unta siyang mobayad og ikapulo sa iyang simbahan apan wala kini buhata. Dayon ang iyang kaila nangutana, “Unsa ang imong masulti kanako kabahin sa Basahon ni Mormon?”

Iyang gipasabut nga ang basahon usa kasulatan, lain nga saksi ni Jesukristo, gihubad ni Propeta Joseph Smith. Ingon og interesado ang iyang kaila, busa iyang gikuha ang iyang bag ug miingon, “Nadasig ko nga dalhon kining basahon. Para kini sa imoha.”

Nagsugod ang iyang kaila sa pagbasa niini. Sa ilang panagbulag, ang iyang kaila miingon, “Ikaw ug ako maghisgut pa kabahin niini.”

Ang wala masayri sa akong higala—apan nasayud *gyud* ang Dios—nga ang iyang kaila nangita og simbahan. Ang Dios nasayud nga ang babaye nagtan-aw sa akong higala ug natingala nganong ang simbahan sa akong higala nakapalipay kaniya og maayo. Ang Dios nasayud nga siya mangutana kabahin sa Basahon ni Mormon ug siya andam nga matudloan sa mga misyonaryo. Siya giandam. Mao sab ang akong higala. Kamo ug ako mahimong andam usab.

Ang pagpangandam nga atong gikinahanglan anaa sa atong hunahuna ug kasingkasing. Ang babaye nakadungog ug nakahinumdom sa mga pulong kabahin sa Basahon sa Mormon, ang gipahiula nga Simbahan sa Ginoo, ug ang kasugoan sa pagbayad og ikapulo ngadto sa Dios. Ug siya nagsugod sa pagbati sa pagsaksi sa kamatuoran diha sa iyang kasingkasing.

Ang Ginoo miingon nga Iyang ipadayag ang kamatuoran diha sa atong hunahuna ug kasingkasing pinaagi sa Espiritu Santo (tan-awa sa D&P 8:2). Kadaghanan sa mga tawo nga inyong mahimamat nakasugod na nianang pagpangandam. Sila nakadungog o nakabasa kabahin sa Dios ug sa Iyang pulong. Kon humok ang ilang kasingkasing, ilang mabati, bisan pa unsa ka hinay, ang kumpirmasyon sa kamatuoran.

Ang babaye andam na. Mao usab ang akong higala, ang Santos sa Ulahing Adlaw kinsa nagtuon sa Basahon ni Mormon. Iyang nabati ang pagsaksi nga kini tinuod, ug iyang naila ang pagdasig sa Espiritu sa pagdala og kopya. Siya andam sa iyang hunahuna ug kasingkasing.



Ang Dios nag-andam og mga tawo nga moadawat sa inyong pagpamatuod sa gipahiuling kamatuoran. Siya nagkinahanglan sa inyong hugot nga pagtuo ug dayon sa inyong aksyon nga mopakigbahin sa walay pagkahadlok niadtong nahimo nga bililhon kaayo kaninyo ug sa inyong gimahal.

Pangandam sa pagpakigbahin pinaagi sa pagpuno sa inyong hunahuna kada adlaw sa mga kamatuoran sa ebanghelyo. Samtang kamo nagsunod sa mga sugo ug nagtuman sa inyong mga pakigsaad, inyong mabati ang pagpamatuod sa Espiritu ug gugma sa Manluluwas alang kaninyo ug niadtong inyong mahimamat.

Kon inyong buhaton ang inyong bahin, kamo mas makasinati og matam-is nga mga kasinatian sa pakighimamat sa mga tawo nga andam maminaw sa inyong pagpamatuod sa kamatuoran—kinasingkasing nga itanyag, gikan kanimo ngadto kanila. ■

PAGTUDLO NIINI NGA MENSAHE

|konsiderar ang pagbasa sa mensahe uban sa pamilya ug hisguti ang ikaduha gikan sa katapusan nga paragraph, diin si Presidente Eyring naghigut og mga pamaagi sa paglig-on sa pagpamatuod. Hisguti uban sa pamilya ang importansya sa pagpamatuod kon mopakigbahin sa ebanghelyo. Tingali makatabang sa mga bata nga i-role-play unsaon sa pagpamatuod ngadto sa mga higala.

MGA KABATAN-ONAN

Pagkasayud Unsa ang Isulti

Kon inyong gibati nga dili paigo ang inyong nahibaloan sa ebanghelyo aron ipakigbahin kini sa uban, paghupay niini nga mga saad gikan sa mga kasulatan:

“Ipataas ang inyong inyong mga tingog ngadto niini nga mga katawhan; ipamulong ang mga hunahuna diin Ako mobutang sa inyong mga kasingkasing, ug kamo dili pagalibugon sa atubangan sa mga tawo;

“Kay ihatag kini kaninyo sa takna gayud, oo, sa diha gayud nga higayon, unsa ang inyong isulti” (D&P 100:5–6).

“Ang Manlalaban, ang Espiritu Santo, nga sa akong ngalan igapadala sa Amahan, siya mao ang magatudlo kaninyo sa tanang butang, ug magapahinumdom kaninyo sa tanan nga akong gikasulti kaninyo” (Juan 14:26).

Kini talagsaong mga saad, apan sa pag-angkon niini, kinahanglang buhaton nato ang atong bahin. Niini nga mensahe, si Presidente Eyring nagtudlo kanato unsaon: “Pangandam sa pagpakigbahin [sa ebanghelyo] pinaagi sa pagpuno sa inyong hunahuna kada adlaw sa mga kamatuoran sa ebanghelyo.” Unsa ang inyong buhaton aron mapuno ang inyong hunahuna sa mga kamatuoran sa ebanghelyo?



MGA BATA

Pangandam sa Pagpakigbahin

Si Presidente Eyring miingon nga usa ka importante nga spaagi sa pagpangandam sa pagpakigbahin sa ebanghelyo

mao ang pagpuno sa inyong mga hunahuna sa mga kamatuoran sa ebanghelyo, sama sa gipangbuhat sa mga bata sa ubos.

Tan-awa ang mga litrato nga gilaray sa ubos ug pangitaa ang usa ka butang nga lahi sa litrato sa ibabaw niini.



Unsa pa ang ubang mga butang nga inyong mahimo sa pagpangandam sa pagpakigbahin?



Tun-i kini nga materyal sa mainampuon nga paagi ug, kon angay, hisguti kini uban sa mga sister nga inyong bisitahan. Gamita ang mga pangutana sa pagtabang kaninyo sa paglig-on sa inyong mga sister ug sa paghimo sa Relief Society isip aktibong bahin sa inyong kaugalingon nga kinabuhi.

Espesyal nga mga Panginahanglan ug Serbisyo nga Nabuhat

“Ang mga panginahanglan sa uban ka-Anunayng anaa,” miingon si Presidente Thomas S. Monson, “ug matag usa kanato makahimo og butang aron sa pagtabang og usa ka tawo. . . . Gawas kon kalimtan nato ang atong kaugalingon diha sa pagserbisyo sa uban, adunay gamay ra nga katuyoan sa atong kaugalingong kinabuhi.”¹

Isip mga visiting teacher kita matinud-anong makaila ug mahigugma sa matag sister nga atong gibisitahan. Mahimong natural ang atong pagserbisyo niadtong atong gibisitahan tungod kay nahigugma kita kanila (tan-awa sa Juan 13:34–35).

Unsaon nato pagkahibalo sa espirital ug temporal nga mga panginahanglan sa atong mga sister aron kita makaserbisyo kon gikinahanglan? Isip mga visiting teacher, kita makadawat og inspirasyon kon kita mag-ampo niadtong atong gibisitahan.

Ang kanunay nga pagkontak sa mga sister importante usab. Personal nga mga pagbisita, pagtawag gamit sa telepono, usa ka mubo nga sulat sa pagdasig, mga e-mail, pagtapad kaniya, matinud-anong pagdayeg, pagtabang kaniya sa simbahan, pagtabang kaniya panahon sa sakit o panginahanglan, ug ubang mga buhat sa pagserbisyo makatabang sa pag-amuma ug paglig-on sa usag usa.²

Ang mga visiting teacher gihangyo sa pagreport sa kahimtang, bisan unsa nga espesyal nilang panginahanglan, ug sa serbisyo nga gihatag kanila. Kini nga mga report ug atong pagserbisyo sa atong mga sister makatabang kanato sa pagpakita sa atong pagkadisipulo.³



Gikan sa mga Kasulatan

Juan 10:14–16; 3 Nephi 17:7, 9; Moroni 6:3–4

MUBO NGA MGA SULAT

1. Thomas S. Monson, “Unsa may Akong Nabuhat alang sa Usa ka Tawo Karon?” *Liahona*, Nob. 2009, 85).
2. Tan-awa sa *Handbook 2: Administering the Church* (2010), 9.5.1.
3. Tan-awa sa *Handbook 2*, 9.5.4.
4. Mary Ellen Smoot, sa *Anak nga mga Babaye sa Akong Gingharian: Ang Kasaysayan ug Buhat sa Relief Society* (2011), 139.
5. *Mga Pagtulun-an sa mga Presidente sa Simbahan: Spencer W. Kimball* (2006), 103.

Unsa Ang Akong Mahimo?

1. Nagtinguha ba ko og personal nga inspirasyon aron masayud unsaon pagtubag sa espirital ug temporal nga mga panginahanglan sa matag sister nga gi-assign ngari kanako sa pag-amuma?
2. Unsaon pagkasayud sa mga sister nga akong giamuma nga nabalaka ko kanila ug sa ilang pamilya?

Hugot nga Pagtuo, Pamilya, Kahupayan

Gikan sa Atong Kasaysayan

Ang pagserbisyo sa usag usa mao ang labing mahinungdanon sa visiting teaching. Pinaagi sa padayon nga pagserbisyo atong mapakita ang pagkamabination ug pakighigala nga sobra pa kaysa binulan lang nga mga pagbisita. Ang atong pag-amuma mao ang mahinungdanon.

“Ang akong tinguha mao ang paghangyo sa atong mga sister sa dili pagkabalaka mahitungod sa pagpanawag sa telepono o matag tulo ka bulan o binulan nga pagbisita,” miingon si Mary Ellen Smoot, ika-13 nga kinatibuk-ang presidente sa Relief Society. Siya mihangyo kanato nga “maghunahuna sa pag-alima sa malumo nga mga kalag.”⁴

Si Presidente Spencer W. Kimball (1895–1985) mitudlo nga, “Importante kaayo nga moserbisyo kita sa usag usa sa gingharian.” Apan iyang giila nga dili tanang pagserbisyo kinahanglan nga may pagkabayani. “Kanunay gayud, ang binuhatan sa pagserbisyo naglangkob sa yano nga pagdasig o sa paghatag . . . og tabang uban sa kalibutanon nga tahas,” siya miingon, “apan unsa ka mahimayaon nga mga sangputanan ang mahitabo . . . gikan sa gamay apan kinabubut-on nga mga buhat!”⁵

Notebook alang sa **Komperensya sa Abril**

“Unsa nga Ako ang Ginoo namulong, Ako namulong; . . . bisan pinaagi sa akong kaugalingon nga tingog o pinaagi sa tingog sa akong mga sulugoon, kini managsama ra” (D&P 1:38).

Samtang kamo magribyu sa kinatibuk-ang komperensya sa Abril 2012, inyong magamit kini nga pahina (ug mga Notebook sa Komperensya sa umaabut nga mga isyu) aron sa pagtabang kaninyo sa pagtuon ug paggamit sa bag-o nga mga pagtulun-an sa buhi nga mga propeta ug mga apostoles ug ubang mga lider sa Simbahan.

MGA ISTORYA GIKAN SA KOMPERENSYA

Ang Akong Unang Calling sa Simbahan

Nagsimbahan ko uban sa akong pamilya sa usa ka branch sa Frankfurt, Germany. Kami napanalanginan og daghang talagsaon nga mga tawo sa among gamay nga branch. Ang usa niini mao ang among presidente sa branch, si Brother Landschulz. . . .

Usa ka Domingo, si Presidente Landschulz mihangyo nga makig-istorya siya kanako. . . .

[Iya] kong gidala sa gamay nga klasehanan—ang among chapel walay opisina alang sa presidente sa branch—ug didto gitawag ko niya nga mahimong presidente sa deacons quorum.

“Importante kini nga katungdanan,” miingon siya, ug dayon migahin og panahon ug mihulagway kon ngano. Iyang gipasa-but unsay gipaabut niya ug sa Ginoo gikan nako ug sa unsang paagi ako makadawat og tabang.

Wala kaayo ko kahinumdon sa iyang gipangsulti, apan naka-hinumdon ko sa akong gibati. Akong nabati ang sagrado, bala-anong Espiritu samtang siya nagsulti. Akong nabati nga kini ang Simbahan sa Manluluwas. Ug akong gibati nga ang calling nga iyang gi-extend dinasig gikan sa Espiritu Santo. Nakahinumdom ko nga migawas sa gamayng klasehanan mibati nga mas milambo og gamay. . . .

. . . Mibati ko nga napasidunggan, ug gusto kong moserbisyo kutob sa akong mahimo ug dili pakyason ang akong presidente sa branch o ang Ginoo.

Nakaamgo ko karon nga mahimo ra nga sultihan ko og direktso sa presidente sa branch sa dihang iya kong gitawag. Mahimong sultihan ra ko niya diha sa hallway o sa miting sa priesthood nga ako ang bag-ong presidente sa deacons quorum.

Hinoon, migahin siya og panahon ug mitabang nako nga makasabut dili lamang sa *unsa* ang akong buluhaton apan, labaw sa tanan, kon *ngano*. . . .

. . . Usa kini ka panig-ingnan alang kanako sa makadasig nga gahum sa pagpangulo sa priesthood nga makapaawhag sa espiritu ug makapaagni og aksyon.

Presidente Dieter F. Uchtdorf, Ikaduhang Magtatambag sa Unang Kapanguluhan, “Ang Ngano sa Priesthood nga Pagserbisyo,” *Liahona*, Mayo 2012, 58.

Mga pangutana nga angayang Palandungon:

- Sa unsang paagi ang pagdawat og mga calling sa Simbahan makapalig-on kaninyo ug sa inyong giserbisyoan?
- Unsa ang inyong mahimo sa pagpangandam sa pagdawat og calling sa Simbahan, bisan kon kamo nagkapuliki?

Ikonsiderar sa pagsulat sa inyong mga hunahuna sa inyong journal o hisguti kini ngadto sa uban.

Dugang mga kapanguhaan niingon hilisgutan: Ang Giya ngadto sa mga Kasulatan, “Call, Called of God, Calling,” scriptures.lds.org; Henry B. Eyring, “Barugi ang Inyong Balaang Tawag,” *Liahona*, Nob. 2002, 75–78.

Sa pagbasa, pagtan-aw, o pagpaminaw sa mga pakigpulong sa kinatibuk-ang komperensya, bisitaha ang conference.lds.org.



MAALAMONG PAGGAMIT SA KABUBUT-ON

U sa sa labing importante nga kamatuoran nga atong makat-unan sa atong pagkabatan-on mao nga ang tinuod nga kagawasan ug mahangturong kalipay naggikan sa paggamit sa atong kabubut-on sa pagsunod sa mga sugo sa Dios.¹ Sa mga pahina 52–53 niini nga isyu, si Elder Shayne M. Bowen sa Seventy mihatag og gibug-aton niini nga baruganan.

“Kamo adunay potensyal nga madawat ang tanan nga anaa ang Amahan. Kamo ang magpili,” miingon siya sa mga batan-on.

Sa kalibutan nga puno sa kadautan ug kakuyaw, ang mga ginikanan adunay mahinungdanong bahin sa pag-andam sa ilang mga anak aron sa paghimo og eksaktong mga pagpili ug pagbuntog sa tintasyon. Sa pagkatinuod, ang Ginoo misugo sa mga ginikanan “sa pag-anuma sa [ilang] mga anak diha sa kahayag ug kamatuoran” (D&P 93:40).

Ang Simbahan nag-andam og mga karpanguhaan para sa mga ginikanan aron tabangan ang ilang mga anak nga makat-on ug mosunod niini nga sumbanan. Ang mga mosunod nga mga sugyot napamatud-an nga makatabang.

Mga Sugyot sa Pagtudlo sa mga Batan-on

- Basaha uban sa inyong batan-on ang seksyon sa kabubut-on ug pagkamay-tulubagon sa *Alang sa Kalig-on sa mga Kabatan-onan*. Ang pagbuhat niini makahatag og oportunidad sa paghisgut sa mga sumbanan ug sa pagtubag sa bisan unsang mga pangutana sa inyong anak.
- Basaha ang artikulo ni Elder Bowen sa mga pahina 52–53 niini nga isyu. Ikonsiderar ang paggamit sa istorya sa pagpakaon sa saktong lobo aron sa pagtabang sa inyong batan-on nga makasabut sa kaimportante sa paghimo og maayong mga desisyon.

- Bisitaha ang youth.lds.org, i-klik ang “For the Strength of Youth” ubos sa “Youth Menu,” ug dayon i-klik ang “Agency and Accountability.” Didto makakita kamo og mga pakisayran sa kasulatan, mga video, mga pangutana ug tubag, ug mga artikulo.
- Konsideraha nga mag-family home evening o mag-family devotional sa kaimportante nga magmaisugon ug mobarug sa unsay atong gituohan.²

Mga Sugyot alang sa Pagtudlo sa mga Bata

- Ang Pagdala sa Primary ngadto sa Panimalay karong bulana kabahin sa pagpili sa pagsunod sa mga sugo (tan-awa sa mga pahina 64–65 niini nga isyu). Basaha ang istorya isip pamilya ug hangyog ang inyong anak sa pag-ihip sa mga desisyon nga gihimo diha sa istorya. Ipasabut nga ang Langitnong Amahan nagtugot kanato sa paghimo og mga desisyon aron kita makat-on ug molambo. Ipakigbahin ang pipila sa mga butang nga inyong nakat-unan gikan sa paghimo og mga desisyon.
- Ang Kalihokan sa CTR sa Pagdala sa Primary ngadto sa Panimalay kompletoha. Dayon hisguti ang mga sangputanan sa paghimo og maayong mga desisyon. Pagpamatuod sa mga panalangin nga inyong nadawat sa paghimo og matarung nga mga desisyon.
- Alang sa dugang nga mga ideya sa pagtudlo sa kabubut-on ug pagkamay-tulubagon, tan-awa ang Enero nga seksyon sa *2012 Outline for Sharing Time* (online sa lds.org/service/serving-in-the-church/primary/sharing-time-2012). ■

MUBO NGA MGA SULAT

1. Tan-awa sa *Alang sa Kalig-on sa mga Kabatan-onan* (2011), 3.
2. Tan-awa sa Thomas S. Monson, “Magmaisugon sa Pagbarug nga Mag-inusara,” *Liahona*, Nob. 2011, 60.



MGA KASULATAN KABAHIN SA KABUBUT-ON

Deuteronomio
11:26–28; 30:15–20

Josue 24:14–15

2 Nephi 2

Helaman 14:30–31

Moroni 7:15–19

Doktrina ug mga Pakig-saad 58:26–28; 101:78

Moises 4:3–4



PAG-AYO SA KAUGALINGON

“Kadaghanan kanato wala pa moabut sa [Kristohanon] nga ang-ang sa pagkamanggiloloy-on ug paghigugma ug pagpa-saylo. Dili kini sayon. Kini nagkinahanglan og disiplinina sa kaugalingon nga hapit sobra pa kay sa atong mahimo. Apan samtang kita naningkamot, atong mahibaloan nga adunay tinubdan sa pagkaayo, nga adunay dakong gahum sa pagpa-ayo diha kang Kristo, ug kon kita lyang tinuod nga mga sulugoon dili lang nato gamiton kanang gahum sa pag-ayo alang sa uban, tingali ang labing importante, sa atong kaugalingon.”

Presidente Gordon B. Hinckley (1910–2008), “The Healing Power of Christ,” *Ensign*, Nob. 1988, 59.

Paghigugma sa Akong mga Kaaway

Pangalan gipugngan

Nasayud ko sa sugo sa Ginoo nga higugmaon ang uban, lakip ang atong mga kaaway, apan sa akong pagtan-aw sa sundalo, wala ko mahigugma kaniya.

Nagtubo ko sa usa ka nasud nga gisakop og militar sa laing nasud. Ang nag-okupar nga mga sundalo dili maayong motratar kanamo. Daghan sa akong lungsod gipang-aresto, gipandagmalan, gipamusil, o gani gipamatay sa mga sundalo nga walay igong rason. Usa ka adlaw sa dihang 16 anyos nako, ang mga sundalo miabut sa akong gitung-haan nga unibersidad ug mipusil sa ulo sa usa sa mga estudyante. Sulod sa duha ka oras, dili sila mosugot nga siya dalhon sa ospital. Sukad adtong adlawa nakabaton ko og kasilag niadtong mga sundalo diha sa akong kasingkasing. Dili ko makapasaylo kanila sa kasakit nga ilang gihimo sa akong katawhan ug dili makalimot sa nawong niadto nga estudyante.

Sa dihang namiyembro ko sa Simbahan sa edad nga 25, lisud alang kanako ang pagsimba tungod sa mga checkpoint, curfew, ug sa ubang mga restriksyon sa pagbiyahe. Girisgo nako ang akong kinabuhi para makagawas aron makaambit sa sakrament ug makauban ang ubang mga Santos sa Ulahing mga Adlaw. Lisud kaayo nga mag-inusara nga miyembro sa Simbahan diha sa among pamilya ug sa among lungsod. Ganahan ko nga makauban ang mga miyembro sa Simbahan, apan kanunay ko nga pugngan

sa mga sundalo hapit kada semana.

Usa ka Dominggo samtang naningkamot ko nga makalabang sa checkpoint, ang sundalo miingon nga dili ko mahimo nga mogawas ug mipapauli kanako. Gitan-aw nako ang sundalo ug nakahinumdom sa mga pulong sa Manluluwas: “Higugmaa ninyo ang inyong mga kaaway” (tan-awa sa Mateo 5:43–44).

Nakaamgo ko nga wala ko *mahigugma* niadto nga sundalo. Ang kalagot sa dihang tin-edyer pa ko nawala na sa dihang namiyembro nako sa Simbahan, apan wala nako higugmaa ang akong mga kaaway. Si Jesukristo, ang Manluluwas, mihatag kanato niini nga sugo, apan ang akong kasingkasing dili makahigugma niadtong nag-okupar nga mga sundalo. Kini nakapahasol kanako sulod sa pipila ka adlaw, ilabi na nga nangandam ko nga moadto sa templo niadtong panahona.

Usa ka adlaw akong nabasahan kining kasulatan: “Pag-ampo ngadto sa Amahan uban sa tibuok kusog sa kasingkasing, nga kamo unta mapuno niini nga gugma, diin siya mitugyan diha sa tanan kinsa tinuod nga mga sumusunod sa iyang Anak, nga si Jesukristo” (Moroni 7:48). Akong gibati nga ingon og personal nga namulong si Mormon kanako ug mipakita kanako unsaon sa paghigugma.



Mihukom ko nga mangayo og tabang sa Langitnong Amahan. Nagpuasa ug nag-ampo ko og panabang aron sa paghigugma sa akong mga kaaway. Sulod sa pipila ka adlaw mibati ko nga walay kausaban, apan wala nako mamatikdi nga ang Langitnong Amahan hinay-hinay nga miusab sa akong kasingkasing. Mga usa ka tuig ang milabay, samtang naningkamot ko nga molabang sa usa sa mga checkpoint, ang sundalo mi-ingon kanako nga dili pwede. Kini nga higayona lahi ang akong gibati. Samtang nagtan-aw ko sa mga mata niadto nga sundalo, mibati ko og talagsaong gugma alang kaniya. Nabati nako ang dakong gugma sa Langitnong Amahan alang kaniya, ug gilantaw nako siya isip usa ka anak sa Dios.

Karon nasayud na ko, sama ni Nephi, nga ang Ginoo dili mohatag og mga sugo kanato gawas kon siya moandam og paagi alang kanato nga kita unta makatuman sa butang diin siya misugo kanato (tan-awa sa 1 Nephi 3:7). Sa dihang si Kristo misugo kanato sa paghigugma sa atong mga kaaway, Siya nasayud nga kini posible inubanan sa Iyang tabang. Siya makatudlo kanato sa paghigugma sa uban kon kita mosalig lang Kaniya ug mokat-on sa Iyang talagsaong ehemplo. ■

“Sa kanunay, si Kristo ang atong ehemplo. Sa Iyang mga pagtulun-an sama sa Iyang kinabuhi, gipakita Niya kanato ang dalan. Gipasaylo Niya ang dautan, ang bulgar, ug kadtong nagtinguha sa pagpasakit ug paghimo og dautan Kaniya” (Dieter F. Uchtdorf, “Ang Maloloy-on Magadawat og Kalooy,” Liahona, Mayo 2012, 76).

UNSAON NATO SA PAGKAT-ON SA PAGPASAYLO SA UBAN?

Si Presidente George Albert Smith (1870–1951) nagtabang sa pagtubag niining pangutana sa kapitulo 23 sa *Mga Pagtulun-an sa mga Presidente sa Simbahan: George Albert Smith* (2011):

- “Sa dili pa kita moadto sa himaya sa atong Amahan ug motagamtam sa mga panalangin nga atong gilauman nga madawat pinaagi sa pagkamatitud-anon, kita kinahanglan nga motuman sa mga balaod sa pagpailub, ug mopakita og pagpasaylo ngadto niadtong nakalapas batok kanato, ug kuhaon gikan sa atong mga kasingkasing ang tanang mga pagbati sa kasuko ngadto kanila.”
- “Kon kita moambit sa sakrament sa Panihapon sa Ginoo, . . . atong limpyohan ang atong mga kasingkasing sa tanang mga pagbati sa pagkadili mabination ngadto sa usag usa ug ngadto sa atong mga kaigsoonan nga dili sama nato og tinuohan.”
- “Unta kita makabaton sa Espiritu sa Manluluwas nga magpuyo uban kanato, nga kita mopasaylo unta sa tanang mga tawo sama sa Iyang gisugo, mopasaylo, dili lamang sa atong mga ngabil apan sa kinahiladman gayud sa atong mga kasingkasing, sa matag kalapasan nga nahimo batok kanato.”

Si kinsa ang angay nimong pasayloon? Mainampoon og ikonsiderar ang tukmang panahon ug dapit aron makig-istorya niini nga tawo (o mga tawo) ug ipakita ang inyong gugma ug pagpasaylo.





Ni Elder D. Todd Christofferson

Sa Korum sa Napulog
Duha ka mga Apostoles

PAGPALAMBO OG PAGTUO DIHA KANG Kristo

Dako ang atong mahimo sa pag-impluwensya ug pagpalapad sa panalangin sa hugot nga pagtuo nga atong madawat pinaagi sa Espiritu Santo.

Si Apostol Pablo tingali naghatag sa pinakamaayo nga kahulugan sa hugot nga pagtuo: “Karon ang pagtuo mao ang pasalig kanato sa mga butang nga atong ginapaabut, ug ang panghimatuod sa pagkaanaa sa mga butang nga dili nato makita” (Mga Hebreohanon 11:1). Gidugangan ni Alma nga ang mga butang nga gilauman ug dili makita “mga tinuod” (Alma 32:21).

Ang hugot nga pagtuo diha ni Jesukristo mao ang kombiksyon ug kasiguradoan sa (1) Iyang kahintang isip Bugtong Anak sa Dios, (2) Iyang mahangturong Pag-ula, ug (3) Iyang literal nga Pagkabanhaw—ug ang tanan nga gikinahanglan kanato niini nga mga sukarang reyalidad.

Gilakip ni Pablo ang hugot nga pagtuo sa iyang lista sa espirituhanong mga gasa (tan-awa sa 1 Mga Taga-Corinto 12:9). Tinuod ang hugot nga pagtuo mabatunan pinaagi sa Espiritu Santo, apan natala sa Bible Dictionary, “Bisan tuod ang hugot nga pagtuo usa ka gasa, kini kinahanglang amumahon ug tinguhaon hangtud kini motubo sama sa gamay nga liso ngadto sa dakong punoan.” Dako ang atong mahimo sa pag-impluwensya ug pagpalapad sa panalangin sa hugot nga pagtuo nga atong madawat pinaagi sa Espiritu Santo.

Ang Hugot nga Pagtuo Mabatunan pinaagi sa Pagpaminaw sa Pulong sa Dios

Ang unang pagpakita og hugot nga pagtuo diha ni Jesukristo mabatunan pinaagi sa pagpaminaw sa pulong sa Dios—ang ebanghelyo ni Jesukristo. Kon kana nga pagtulunan gihatag ug gidawat pinaagi sa Espiritu Santo, “ang Espiritu sa kamatuoran” (tan-awa sa D&P 50:17–22), ang liso sa hugot nga pagtuo diha kang Kristo natanom. Si Pablo mitudlo niini ngadto sa mga taga-Roma sa dihang siya nagpasabut nga ang tanan makadawat sa gasa sa hugot nga pagtuo: “Ang pagtuo magaabut gikan sa madungog, ug ang madungog magaabut pinaagi sa pagwali mahitungod kang Kristo” (Mga Taga-Roma 10:17). Buot ipasabut, ang hugot nga pagtuo mabatunan pinaagi sa pagpaminaw sa mensahe nga mao ang pulong, o ebanghelyo, ni Kristo.

Samtang iyang gihulagway ang pagpangalagad sa mga anghel, si Mormon naghigut kanato nga sa kanunay kini ang sumbanan nga ang hugot nga pagtuo mamugma pinaagi sa pagpaminaw sa ebanghelyo.

“Ug ang katungdanan sa ilang [mga anghel] pagpangalagad mao ang pagtawag sa mga tawo ngadto sa paghinulsol, ug sa pagtuman ug sa paghimo sa buhat sa mga pakigsaad sa Amahan, nga iyang gihimo ngadto sa mga

Tinuod ang hugot nga pagtuo mabaturan pinaagi sa Espiritu Santo, apan mabasa sa Bible Dictionary, “Bisan tuod ang hugot nga pagtuo usa ka gasa, kini kinahanglang amumahon ug tinguhaon hangtud kini motubo sama sa gamay nga liso ngadto sa dakong punoan.”



katawhan, sa pag-andam sa agianan diha sa mga katawhan, pinaagi sa pagpadayag sa pulong ni Kristo ngadto sa pinili nga mga sulugoon sa Ginoo, nga sila magpamatuod kaniya.

“Ug sa ingon nga pagkahimo, ang Ginoong Dios nag-andam sa agianan nga ang nahabilin sa mga tawo makabaton sa hugot nga pagtuo diha kang Kristo, nga ang Espiritu Santo mahimo nga adunay dapit sa ilang mga kasingkasing, sumala sa gahum niini; ug sunod niini nga paagi gipahinabo sa Amahan, ang iyang mga pakigsaad nga iyang gihimo ngadto sa mga katawhan” (Moroni 7:31–32).

Gisangunan nga “magpamatuod kaniya,” ang mga misyonaryo gi-call, gi-set apart, ug gihatagan og gahum ubos sa mga yawe ug awtoridad sa pagka-apostol. Busa sila giihap lakip sa “pinili nga mga sulugoon sa Ginoo.” Buot ipasabut, isip awtorisadong mga mensahero sa Ginoo, sila, sa ilang pagtudlo ug pagpamatuod pinaagi sa gahum sa Espiritu Santo, motanom og hugot nga pagtuo diha kang Kristo ngadto sa mga kalag niadtong naminaw kanila.

Ang pulong nga atong i-deklarar, ang pulong nga nakamugna og hugot nga pagtuo diha kang Kristo, mao ang ebanghelyo, o ang maayong balita, ni Jesukristo. Sa yanong pagkasulti, ang maayong balita mao nga ang kamatayon dili ang katapusan sa kinabuhi ug ang atong pagkahibulag sa Dios temporaryo lang. Kita adunay Manluluwas, si Jesukristo, ang balaanong Anak sa Dios, kinsa pinaagi sa Iyang Pag-ula nakabuntog sa kamatayon ug impyerno aron ang tanan mabanhaw ug ang tanang maghinulsol ug magpabunyang sa Iyang ngalan adunay luna sa langitnong gingharian sa Dios sa kahangturan.

Ang Hugot nga Pagtuo Mabatanan pinaagi sa Paghinulsol

Ang paghinulsol may dakong bahin sa pagpalambo og hugot nga pagtuo diha kang Kristo. Ang pagdawat sa

pulong ni Kristo makapamugna og hugot nga pagtuo nga kinahanglanon sa paghinulsol, ug ang paghinulsol makatabang usab sa pagpalambo sa pagtuo. Si Mormon mideklarar, “Ug [si Kristo] miingon: Paghinulsol kamong tanan nga mga lumulupyo sa yuta, ug duol ngari kanako, ug pagpabunyang diha sa akong ngalan, ug pagbaton sa hugot nga pagtuo kanako, nga kamo maluwas” (Moroni 7:34).

Sama pananglit, ang maalamong misyonaryo makigtambag ug mag-ampo uban sa iyang kompanyon, magtinguha og inspirasyon kon sa unsang paagi maghinulsol ang kada investigator. Ang mga misyonaryo moplano sa ilang pagtudlo sumala sa inspirasyon. Sila mainampuong motino unsa nga pagdapit o mga pagdapit ang ilang buhaton sa matag leksyon ngadto sa investigator. Ilang himoon ang ilang leksyon sumala sa pagdapit, ilhon ang mga doktrina nga kinahanglang masabtan sa mga investigator aron dawaton ang pagdapit.

Ang mga misyonaryo modeterminar unsaon sa pagtudlo niadtong mga doktrina aron maklaro og maayo ug makamugna og kombiksyon alang nianang partikular nga indibidwal. Sila moplano og mga pamaagi sa paggamit sa tanang anaa nga mga kapanguhaan, lakip ang tabang sa mga miyembro, sa pagtabang sa investigator nga motuman sa ilang pasalig sa pagbuhat nga mahiuyon nianang piho nga baruganan o sugo. Kini nga matang sa pagtudlo ug pagpamatuod sa misyonaryo mao ang paagi nga atong maatiman ang investigator subay sa proseso sa paghinulsol.

Ang Hugot nga Pagtuo Mabatanan pinaagi sa mga Pakigsaad

Laing mahinungdanon nga elemento sa paghinulsol mao ang bunyang pinaagi sa pagpaunlod, diin kita makasugod sa pagdala sa ngalan ni Kristo. Daghang mga bersikulo sa kasulatan ang nagpasabut sa “pagpabunyang

ngadto sa paghinulsol” o “bunyag sa paghinulsol” (tan-awa sa Mga Buhat 19:4; Alma 5:62; 7:14; Moroni 8:11; D&P 35:5–6). Kini nga hugpong sa mga pulong miila sa doktrina nga ang pagpabunyag diha sa tubig mao ang katapusan o labing mahinungdanon nga lakang sa paghinulsol. Ang pagsalikway sa sala, inubanan sa atong pakigsaad sa pagkamasulundon, mokompleto sa atong paghinulsol; sa tinuoray, ang paghinulsol dili mahuman kon wala kana nga pakigsaad. Tungod niini kita makasarang sa katubsan sa mga sala pinaagi sa grasya ni Jesukristo pinaagi sa bunyag sa Espiritu (tan-awa sa 2 Nephi 31:17). Dugang pa, ang pakigsaad sa bunyag magamit sa umaabot ingon man sa nangagi: matag higayon nga kita tinuoray nga naghinulsol, ang pakigsaad mabag-o ug kita mapasarang pag-usab alang sa pagtubos sa mga sala.

Unsa may kalabutan niining mga ordinansa ug sa kabang mga pakigsaad ngadto sa pagpalambo sa pagtuo? Ang hugot nga pagtuo diha kang Kristo usa ka mahinungdanon nga panginahanglan sa paghimo og balaanong mga pakigsaad, apan ang pakigsaad makapalambo usab sa pagtuo sa tawo nga dili mahimo sa laing paagi. Pinaagi sa pakigsaad, ang gamhanang Dios sa kalangitan mitugot sa Iyang Kaugalingon nga ma-obligar sa tagsa-tagsa kanato (tan-awa sa D&P 82:10). Hangtud nga atong gituman ang pakigsaad ngadto Kaniya, Siya obligado sa paghatag kanato og luna sa Iyang gingharian ug, uban sa mas sagrado nga mga pakigsaad, kahimayaan niana nga gingharian. Siya ang Dios nga anaa sa tanang gahum ug dili mamakak. Busa, kita makaangkon og siguradong pagtuo nga Siya motuman sa Iyang mga saad ngari kanato. Pinaagi sa atong mga pakigsaad ngadto sa Dios, kita makatagamtam og hugot nga pagtuod diha kang Kristo nga may igong kalig-on nga makasuporta kanato sa bisan unsang hagit o pagsulay, nasayud nga sa katapusan sigurado ang atong kaluwasan.

Ang Hugot nga Pagtuo Molambo

Ang akong gisulti kabahin sa pagpalambo sa hugot nga pagtuo diha kang Kristo nga gitudlo sa mga misyonaryo magamit kanatong tanan. Ang atong hugot nga pagtuo diha kang Kristo nabatunan pinaagi sa Espiritu samtang kita naminaw sa pulong sa Dios nga gitudlo niadtong Iyang gisangunan nga mga sulugoon, patay ug buhi. Samtang nagtukod kita ibabaw niana nga pundasyon, ang atong hugot nga pagtuo nalig-on pinaagi sa mga pag-ampo sa hugot nga pagtuo nga nahimong kabahin sa atong matag adlaw nga kinabuhi—ug usahay kabahin sa atong kinabuhi matag oras.

Ang pagpadayon nga mabusog sa mga pulong ni Kristo diha sa Basahon ni Mormon ug sa uban pang mga kasulatan nakadugang ug nagpalalum sa hugot nga pagtuo nga naggikan sa pulong. Ang paghinulsol nga nakagamot sa hugot nga pagtuo makapalambo sa atong pagtuo samtang nagkahingpit sa pagkamasulundon. Ang paghinulsol makapabag-o sa atong bunyag sa tubig ug sa Espiritu aron matubos ang mga sala nga atong nahimo dili lang sa wala

pa ang bunyag, lakip usab ang human sa bunyag. Ang Kristohanong pagserbisyo ngadto sa atong silingan usa ka mahinungdanong bahin sa pagtuman sa pakigsaad nga makapalambo og hugot nga pagtuo diha kang Kristo. Sa dili madugay atong makaplagnan nga ang mga panalangin nga gisaad sa pagkamasulundon sa Dios sa tinuoray anaa na sa atong kinabuhi ug ang atong hugot nga pagtuo nasi-guro ug nalig-on.

Ang Hugot nga Pagtuo usa Usab ka Baruganan sa Gahum

Ang akong gihulagway kutob niini nga punto mao ang kalidad sa hugot nga pagtuo nga naglangkob sa espirituhanong kasiguradoan ug namunga og maayong mga buhat, ilabi na sa pagkamasulundon sa mga baruganan ug sugo sa ebanghelyo. Kini mao ang tinuod nga hugot nga pagtuo diha kang Kristo ug mao ang lebel nga kinahanglang tutukan sa atong pagtudlo sa atong mga investigator.

Hinon, adunay kalidad sa hugot nga pagtuo nga dili lang modumala sa atong batasan apan mohatag kanato og gahum [empowers] nga mousab sa unsa ang anaa ug mopahinabo sa mga butang nga dili unta mahitabo. Namulong ako kabahin sa hugot nga pagtuo nga dili lang usa ka baruganan sa lihok apan usa usab ka baruganan sa gahum. Si Pablo miingon nga kini mao ang hugot nga pagtuo diin ang mga propeta “gipangdaug nila ang mga gingharian, gipatuman nila ang pagkamatarung, gipangadawat nila ang mga saad, gipangagtak-om nila ang mga baba sa mga leon, gipalong nila ang mabangis nga kalayo, nakaikyas sila sa sulab sa espada, gikan sa kahuyang nakab-ut nila ang kalig-on, nangahimo sila nga makagagahum sa panggubatan, ilang gipatibulaag ang mga kasundaluhang langyaw, [ug] ang nangamatay nga mga anak gipabalik ngadto sa ilang mga inahan pinaagi sa pagkabanhaw” (Mga Hebreohanon 11:33–35). Kini talagsaon nga mga butang—apan dili labaw kay sa pagbuntog sa grabeng pagkaadik o ubang susama nga mga babag sa pagkakabig ug pagbunyag.

Ang yawe sa atong pag-angkon sa gahum pinaagi sa hugot nga pagtuo mao ang pagkat-on, pagpangutana, ug pagbuhat sumala sa kabubut-on sa Dios. “Si Kristo miingon: Kon kamo adunay hugot nga pagtuo kanako kamo makabaton sa gahum sa pagbuhat sa bisan unsa nga butang nga maayo ngari kanako” (Moroni 7:33).

Hinon, Siya mipasidaan, “Kon kamo mangayo sa bisan unsa nga dili angay alang kaninyo, kini mosumbalik ngadto sa inyong paghukom” (D&P 88:65).

Ang inyong hugot nga pagtuo diha kang Kristo molambo pag-ayo samtang kamo nagtinguha matag adlaw aron masayud ug mobuhat sa kabubut-on sa Dios. Ang hugot nga pagtuo, usa na ka baruganan sa lihok diha kaninyo, mamahimo dayon nga usa usab ka baruganan sa gahum. ■

Gikan sa usa ka pakigpulong nga gihatag sa seminar alang sa bag-ong mga presidente sa misyon sa Provo, Utah, niadtong Hunyo 23, 2011.

Pagpakigbahin sa Ebanghelyo

PINAAGI SA INYONG MAAYONG EHEMPLO

Ang labing maayo nga paagi sa pagpakigbahin sa ebanghelyo mao ang pagsunod niini.

Ni Stephanie J. Burns ug Darcie Jensen

Alang sa pipila kanato, natural lang ang pagpakigbahin sa ebanghelyo. Apan alang sa kadaghanan, dili kini ingon ana ka sayon. Sa pagkatinuod, kita gani mahadlok sa paghisgut sa ebanghelyo ngadto sa atong mga higala, pamilya, o mga silingan, bisan kita nasayud kon unsa kini kaimportante buhaton.

Dugang pa, usahay kon kita maghunahuna kabahin sa misyonaryo nga buhat, kita naka-focus pag-ayo sa pamaagi, kalihokan, o resulta, kaysa mag-focus sa pagtabang sa indibidwal. Ang problema mao, ang bisan unsang paningkamot nga wala maka-focus sa indibidwal makapahimo niadtong mga paningkamot nga napugos ug dili kinasingkasing.

Adunay mas maayo nga paagi.

Ang paagi mao nga mahimong mas makabig ngadto sa ebanghelyo—isip mga indibidwal—ug himoon ang atong ehemplo sa atong kinabuhi ug atong mahigalaong pakig-istoriya nga mao ang sinugdanan. Kon mas nakabig kita, mas komportable kita sa atong tinuohan, ug kita magsugod sa pagbati og dugang tinguha alang sa uban nga makatagamtan sa mga panalangin sa ebanghelyo. Kon kana mahitabo, ang pagpakigbahin mahimong mas natural.

Sa tinuoray, dili na gani nato mamatikdan nga kita nagpakigbahin na sa ebanghelyo. Samtang nagtubo ang atong matinuorong pagkadisipulo, ang epekto niini diha sa atong mga lihok, inistoryahan, ug gani sa atong panagway lisud nga ilimud. “Ang inyong maayong binuhatan makita sa uban,” mipasabut si Elder Russell M. Nelson sa Korum sa Napulog Duha ka mga Apostoles. “Ang kahayag sa Ginoo mahimong modan-ag gikan sa inyong mga mata. Uban niana



nga kahayag, kinahanglang mangandam kamo sa pagtubag sa mga pangutana.”¹

Buhi nga mga Pagpamatuod

Ang *Isangyaw ang Akong Ebanghelyo: Usa ka Giya sa Misyonaryo nga Pangalagad* nagpasabut: “Ang Manluluwas mipakita sa agi-anan. Mipahigayon siya sa perpektong ehemplo, ug mimando Siya kanato nga mahimong sama Kaniya (tan-awa sa 3 Nephi 27:27).”² Samtang ang mga miyembro magkat-on kabahin ni Kristo ug magtinguha nga sundon ang Iyang mga hiyas sa ilang kinabuhi pinaagi sa gahum sa Iyang Pag-ula, sila mas mahisama ni Kristo ug mas sarang sa paggiya sa uban padulong Kaniya.³

Usa ka bag-ong kinabig gikan sa Washington, USA, miingon nga ang paggahin og



panahon uban sa mga miyembro mao lang ang paagi nga siya nainteresado sa ebanghelyo. “Ang kalipay nga anaa kanila ug ang akong pagbati kon kauban ko sila dili gayud malimud,” siya mipakigbahin. “Wala sila magsangyaw kanako kabahin sa Dios. Yanong kabahin kini sa ilang pagkatawo: ilang istilo sa kinabuhi, ilang mga pagpili, ilang mga lihok ug reaksyon. Kon magtan-aw ko nila, maghunahuna ko, ‘Kana mao ang kinabuhi nga akong gusto. Gusto kong mahisama niana ang akong kinabuhi.’”

Samtang kita mobati nga mas komportable sa impluwensya sa ebanghelyo sa atong kinabuhi, ang paghisgut kabahin nianang impluwensya mas sayon kay kita aduna nay hilisgutan ug kita makapakigbahin unsa ang nahimo niana nga mensahe alang kanato.

Si Miriam Criscuolo gikan sa Italy nakasinati nga, bisan nakahimo na siya og makahuluganong pakighigala ngadto sa ilang silingan, dili gihapon siya kahibalo unsaon paghisgut sa ebanghelyo. “Kami kanunay

mag-uban, apan mawala kanako ang kaisug sa paghisgut sa akong bag-ong higala kabahin sa ebanghelyo, bisan tuod nasayud ko nga kini akong katungdanan,” mipakigbahin siya.

Apan sa dihang ang ebanghelyo natural na kanako, nakasugod nako sa pagpakigbahin kaniya. Si Miriam mihinumdom, “Ang akong anak nga babaye, sa dihang nagpakita og usa ka proyekto sa Primary, mao ang nakapakuryuso sa akong higala. ‘Unsay Primary?’ nangutana siya. Gikan niana nga pangutana nanggawas ang daghan pang mga pangutana. Nahibaloan nako nga ang akong higala nangita og usa ka butang sulod sa katuigan. Giingnan nako siya nga ang kalinaw sa hunahuna nga iyang gipangita makaplagan sa Simbahan.

“Sa wala madugay nagpamiyembro siya sa Simbahan. Siya ang tubag sa akong mga pag-ampo kon unsaon sa pag-apil sa misyonaryo nga buhat ug sa pagpakita sa akong mga anak unsaon kini paghimo.”



ISTORYA PA OG DUGANG

“Mga katuigan ang milabay ang among pamilya nanimuyo ug nagtrabaho taliwala sa mga tawo kinsa halos sa tanang bahin dili sama sa atong pagtuo. Dihang ila kaming gipangutana kon kumusta ang among semana, gipaningkamutan namong . . . maka-paambit sa relihiyoso namong mga kasinatian sa pamilya niana nga semana—sama pananglit, unsa ang gisulti sa usa ka batan-on nga namulong mahitungod sa mga sumbanan gikan sa *Alang sa Kalig-on sa mga Kabatan-onan* o sa unsang paagi kami natandog sa mga pulong sa usa ka batan-ong lalaki kinsa molargahay na padulong sa iyang misyon.”

Presidente Dieter F. Uchtdorf, Ikaduhang Magtatambag sa Unang Kapangulohan, “Naghulat diha sa Dalan sa Damasco,” *Liahona*, Mayo 2011, 76.

Pagpakighigala Una

Sama ni Miriam, usahay kita mobati nga obligado sa pagpakigbahin sa ebanghelyo ug atong mabati nga kini nga buluhaton makamugna og pinugos, dili komportableng mga panaghisgut. Dugang niini, ang responsibilidad makapabug-at sa atong pagbati ug makapugong sa atong abilidad nga epektibong makapasabut sa mga baruganan sa ebanghelyo.

Ang malampusong mga oportunidad sa misyonaryo mas daling makit-an kon ang mga miyembro mga buotan, matinuorong mga higala ngadto sa uban. Sama sa giingon ni Elder M. Russell Ballard sa Korum sa Napulog Duha ka mga Apostoles, “Kon kita bukas kalabut sa atong pagkamiyembro sa Simbahan gikan sa sinugdanan, . . . mga higala ug mga kaila modawat nga kini kabahin kon kinsa kita.”⁴

Ang paglakip sa ebanghelyo sa daan na nga panaghigalaay kaysa ibasi ang panaghigalaay sa pagpakigbahin sa ebanghelyo makapadako sa misyonaryo nga mga kalampusan. Si Eliana Verges de Lerda, usa ka miyembro sa Simbahan sa Argentina, nagkaila sa iyang higala nga si Anabel sa dihang sayis anyos pa sila. Ang ilang panaghigalaay milambo samtang dungan sila nga nag-eskwela. Niana nga higayon, wala gayud gitago ni Eliana nga siya miyembro sa Simbahan.

“Komportable kaayo ko nga maghisgut sa ebanghelyo ngadto ni Anabel, bisan tuod dili kami parehas og mga pagtuo,” miingon siya.

Sa dihang sila 14 anyos na, si Anabel miuyon nga maminaw sa mga misyonaryo, apan wala magpabunyag.

Si Eliana nawad-an sa kadasig, apan kini wala makapahunong kaniya sa pagpadayon sa ilang panaghigalaay; ni nakapahunong sa mga panaghisgutan sa ebanghelyo. Mga pipila ka tuig ang milabay, giimbitar ni Eliana si Anabel nga motambong sa seminary. Atol sa leksyon, nabati pag-ayo ni Anabel ang Espiritu. Mga pipila ka adlaw ang milabay, samtang si Eliana nangandam sa pag-adto sa templo, si Anabel miingon kaniya, “Mosaad ko nga mokuyog ko nimo sa sunod.” Sa wala madugay nabunyagan si Anabel.

Ang pagkakabig ni Anabel wala mahitabo sa pipila ka adlaw; miabut kini og daghang



katuigan. Ang proseso nahimong posible tungod kay si Eliana iyang higala sa sinugdanan—dili igsapayan kon si Anabel ba interesado o dili sa pagdawat sa ebanghelyo.

Pagpaminaw uban sa Gugma

Ang panaghigalaay sama nila ni Eliana ug Anabel sa kanunay magsugod kon ang mga tawo makadiskobre nga sila susama og mga interes, baruganan, o uban pang pagkaparehas. Ang ilang panaghigalaay mas magkasuod kon ang indibidwal mopakigbahin sa ilang mga kasinatian, emosyon, ug gugma. Ug ang gugma, siyempre, mahinungdanong bahin sa gipahiuli nga ebanghelyo.

Kita, isip mga miyembro sa Simbahan, makapahayag sa Kristohanong gugma pinaagi sa paggahin og panahon sa atong mga higala—pinaagi sa mga kalihokan, serbisyo, ug panagsultihanay. Sa pagkatinuod, daghang mga tawo ang nangita og ingon ana nga matang sa higala.

Sa paghulagway sa atong inter-aksyon sa uban, si Elder Jeffrey R. Holland sa Korum sa Napulog Duha ka mga Apostoles mitambag: “Ang pagpaminaw mas importante kaysa pag-istorya. Kini nga mga tawo dili lang walay kinabuhi nga mga butang nga importante kanato para modaghan lang ang atong mga nabunyagan. Sila mga anak sa Dios, atong mga kaigsoonan, ug sila nanginahanglan sa unsay anaa kanato. Ayaw pagpakaaron-ingnon. Magmatinud-anon sa pagtabang. Pangutan-a kining mga higala unsa ang labing mahinungdanon ngadto *kanila*. . . . Ug dayon paminaw. . . . Isaad ko kaninyo

nga adunay *usa ka butang* nga ilang isulti nga sa *kanunay* maghisgut og kamatuoran sa ebanghelyo diin kamo makapamatuod ug kamo makahatag pa og daghan.”⁵

Dili kinahanglan nga kanunay natong han-ukan ang atong mga higala sa ebanghelyo. Kinahanglan lang nga maayo kitang mga higala ug dili mahadlok sa pagpakigbahin sa mga konsepto sa ebanghelyo kon adunay mga oportunidad. Gigamit ni Satanas ang kahadlok aron sa pagsulay sa pagpugong sa mga miyembro sa pagpakigbahin sa pagpamatuod. Kini kusog kaayo nga emosyon nga makapaluya. Si Presidente Uchtdorf mihatag og gibug-aton: “Mas palabihon pa sa uban nga moguyod og karomata sa prairie kaysa hisgutang kabahin sa hugot nga pagtuo ug relihiyon ngadto sa ilang mga higala. . . . Sila nabalaka kon unsa unya ang pagtan-aw kanila o nga basin kini makaguba sa ilang relasyon.” Siya nagpadayon, “Dili kinahanglan nga maingon ana tungod kay kita adunay masadyaon nga mensahe nga ipakigbahin.”⁶

Si propeta Mormon mitudlo, “Ang hingpit nga gugma mosalikway sa tanan nga kahadlok” (Moroni 8:16). Samtang nagkahingpit ang atong pagsunod sa ebanghelyo, mapawala nato ang kahadlok pinaagi sa pagpuli niini og gugma nga putli—ang tiunay nga gugma ni Kristo—ngadto sa atong mga higala, pamilya, ug silingan. Kini nga gugma mas makapadasig kanato sa pagpakigbahin sa ebanghelyo.⁷

Pagpakigbahin sa Ebanghelyo sa Natural nga Paagi

Ang mga anak sa Langitnong Amahan nanginahanglan sa panglantaw nga ikatanyag sa ebanghelyo. Alang sa mga miyembro nga nagsunod sa sumbanan sa ebanghelyo, ang ilang kinabuhi mao ang saksi sa gugma ni Kristo. Kon ang mga miyembro aktibong nag-focus nga mahimong sama ni Jesukristo, pag-establisar og makahuluganong panaghigalaay, ug pagpalambo sa gugma nga putli, ang pagpakigbahin sa ebanghelyo mahimong natural nga bahin sa ilang pagkatawo. Samtang sila nakigbahin kon si kinsa sila, ang mga miyembro mobati og kahupayan ug paggiya diha sa pulong sa Manluluwas ngadto sa Iyang mga disipulo: “Nangamuyo ako alang kanimo nga unta dili makabsan ang imong pagsalig; ug sa mahibalik na ikaw kanako, lig-una ang imong mga igsoon” (Lucas 22:32). ■

MUBO NGA MGA SULAT

1. Russell M. Nelson, “Pagkinabuhi Ingon nga Panig-ingnan sa mga Magtutuo,” *Liahona*, Nob. 2010, 48.
2. *Isangyaw ang Akong Ebanghelyo: Usa ka Giya sa Misyonaryo nga Pangalagad* (2004), 139.
3. Tan-awa sa *Isangyaw ang Akong Ebanghelyo*, 139.
4. M. Russell Ballard, “Paghimo og Mapaambiton sa Ebanghelyo nga Panimalay,” *Liahona*, Mayo 2006, 86.
5. Jeffrey R. Holland, “Witnesses unto Me,” *Liahona*, Hulyo 2001, 16.
6. Dieter F. Uchtdorf, “Naghulat diha sa Dalan sa Damasco,” *Liahona*, Mayo 2011, 76.
7. Tan-aw sa Barbara Thompson, “Pagbantay sa Kal-ang,” *Liahona*, Nob. 2009, 120.



ANG GAHUM SA “AKO USA KA MORMON”

Gipasiugdahan niadtong 2010, ang kampanya nga “Ako usa ka Mormon” nahimong sayon ug epektibong paagi sa mga miyembro sa Simbahan sa pagpakigbahin sa ilang mga pagbati kon unsa ang ilang

gituohan. Ang kampanya naglakip sa TV ug mga billboard ad sa daghang siyudad sa US ingon man usab sa internet. Sa Mormon.org, ang mga Santos sa Ulahing mga Adlaw nagpakigbahin og personal nga mga istorya ug nagtubag sa daghang mga pangutana sama sa “Ang mga Mormon

ba Kristiyanos?” ug “Unsa ang pagtuo sa mga Mormon kabahin sa Biblia?”

Si Rochelle Tallmadge gikan sa Texas, USA, nagpakigbahin: “Nagampo ko nga makasinati sa misyonaryo nga buhat ug gitawagan ko sa usa ka tawo kinsa gustong mahibalo kon interesado ba ko niining bag-ong programa nga Mormon.org.

“Tungod kay ang akong mga anak nga lalaki may kakulangan, kadaghanan sa akong mga nakahinabi sa site mao kadtong may kakulangan o pamilya nga adunay sakop nga may kakulangan. Ang akong makapikag kaayo nga kasinatian mao ang pakighinabi ni Mia. Siya nagpuyo sa Oslo, Norway, ug siya kanunay mag-wheelchair. Siya nagsiksik sa Mormon.org kabahin sa may mga kakulangan ug nakita ang among video. Kini nakapatandog kaniya. Iyang gikontak ang mga misyonaryo, nagkahinabi mi sa tibuk ting-init, ug siya nabunggan tunga-tunga sa Agosto. Gilantaw namo kini nga usa ka milagro nga ang Ginoo midugtong kanamo tadlas sa kadagatan.”

PAGTUBAG

Ang mga senior missionary sa tibuok kalibutan naghigut og dagkong mga ganti sa pagbuntog sa mga babag sa pagserbisyo og misyon.



Ni Kendra Crandall Williamson


Sila si Chanta ug Sounthara Luangrath naglingkod sa ilang panimalay sa California, USA, naghunahuna kon unsa ang ilang angayang buhaton. Ilang giandam ang ilang upat ka anak nga mag-misyon, ug karon sila nasayud nga ilaha nang turno. Ang desisyon mas lisud pa kaysa ilang gihunahuna: mingawon sila pag-ayo sa ilang mga apo! Nabalaka usab sila sa pipila ka mga problema sa panglawas. Ug unsa ang ilang

buhaton sa ilang balay ug kabtangan samtang wala sila?

Ang mga kabalaka sa mga Luangrath sa pagserbisyo og misyon wala lamang mahitabo kanila. Sa pagkatinuod, si Elder Robert D. Hales sa Korum sa Napulog Duha ka mga Apostoles miila og upat ka kategoriya sa mga babag sa buhat sa senior missionary: kahadlok, kabalaka sa pamilya, pagpangita sa eksaktong oportunidad nga mag-misyon, ug panalapi.¹

Ang pagbuntog niining mga babag naginghanglan og dakong hugot nga pagtuo,

SA PANAWAGAN SA PROPETA



“Nagkinahanglan kita og daghan, daghan pang senior nga mga magtiayon. . . . Himoa nga kamo andam nga mobiya sa panimalay ug mohatag og full-time nga misyonaryo nga pagserbisyo. Adunay pipila ka mga higayon sa inyong kinabuhi nga matagamtaman ninyo ang nindot nga diwa ug katagbawan nga moabut tungod sa paghatag og full-time nga pagserbisyo nga manag-uban diha sa buhat sa Manluluwas.”

Presidente Thomas S. Monson, “Samtang Kita Nagkatigum Pag-usab,” *Liahona*, Nob. 2010, 6.



Sila si Chanta ug Sounthara Luangrath, kinsa mibahin sa California, USA, mitudlo sa Laos—ang yuta asa sila natawo ug nagdako ug karon nagserbisyo isip mga misyonaryo.

usa ka kinaiya nga gipakita sa mga Luangrath sa dihang ilang nadungog ang panawagan ni Presidente Thomas S. Monson nga nanginahanglan og dugang mga misyonaryo niadtong kinatibukang komperensya sa Oktubre 2010. “Among nabati ang kusog nga pagdasig sa Espiritu,” sila namalandong. “Gusto namong sundon ang propeta, busa gisumiter namo ang among mission application.”

Ang mga Luangrath gitawag sa pagserbisyo isip humanitarian missionaries sa Laos, ang yuta asa sila natawo, nagdako, ug naminyo. Nawala ang ilang kabalaka samtang nangandam sila sa

Ibabaw sa wala: Senior nga mga misyonaryo nga nagserbisyo sa Siyudad sa Salt Lake, Utah, nagtabang sa mga mildalin gikan sa lain-lain nga nasud nga maka-adjust sa ilang bag-ong mga balay, lakip sa pamilyang Ntabwoba sa Rwanda, kinsa bag-chay lang na-sealed ditto sa templo.



Si Sondra Jones nagserbisyo diha sa mga babaye sa Marshall Islands (sa wala, uban sa bana, nga si Neldon).

pagserbisyo: gisuportahan sila sa ilang pamilya, gisulbad nila ang ilang problema sa panglawas, ug gipaabangan nila ang ilang balay. Sila masaligon samtang ilang gibuhat ang sugo sa Manluluwas: “Lumakaw ka, . . . umanhi ka, ug sumunod ka kanako” (Marcos 10:21).

Ang mga Senior makaserbisyo og misyon sa daghang mga paagi ug sa daghang mga dapit. Sama sa ihulagway sa mosunod nga mga istorya, kon magserbisyo man og full- o part-time, isip magtiayon o single, sa ilang

Si Martha Marin (sa layo sa tuo) full-time nga nagserbisyo sa employment resource center sa Puebla, Mexico.



kaugalingon nga nasud o sa gawas, ang mga senior adult matinud-anong makabuntog sa mga babag nga nag-ali.

Pag-atubang sa Kahadlok

“Ang kahadlok sa wala pa mahibalo-i o ang kahadlok nga kita walay kahanas sa kasulatan o sa pinulongan makapaduha-duha kanato sa pagserbisyo. Apan ang Ginoo miingon, ‘Kon kamo andam dili kamo mahadlok’ (D&P 38:30). Ang inyong kinabuhi mao ang inyong pagpangandam. . . . Larga ug pagmatinud-anon lang sa inyong kaugalingon.”²

Elder Robert D. Hales sa Korum sa Napulog Duha ka mga Apostoles

Ang kahadlok makabalda sa misyonaryo nga buhat. Ang pipila sa mga tawo nahadlok nga kulang sila sa gikinahanglang mga kahanas ug kahibalo sa pagserbisyo. Ang uban nabalaka sa pagpuyo sa laing dapit sa kalibutan o makigtrabaho sa mga tawo nga dili nila kaila.

Si Sister Martha Marin sa Veracruz, Mexico, miatubang sa pipila sa iyang mga kahadlok samtang siya nagserbisyo og full-time sa employment resource center sa Puebla, Mexico. Siya dili komportable sa paggamit og mga computer, usa ka importanting ekipo sa employment center. Apan uban sa tabang ug suporta sa iyang kompanyon ug sa uban nga iyang katrabaho, iyang nakat-unan ang gikinahanglang mga kahanas. “Kini nga babag nahimong panalangin,” siya miingon. “Nasayud ko nga wala ko mag-inusara niini nga buhat.”

Si Sister Sondra Jones sa Utah, USA, gitawag sa pagserbisyo sa Marshall Islands uban sa iyang bana, si Neldon. “Nahadlok ko pagayo sa akong gisudlan. Dili gyud ko kaayo komportable sa pagtudlo sa ebanghelyo,” siya miingon. Human sa una niyang pagbati nga siya walay ikatampo, mihukom siya sa pag-focus sa iyang mga talento ug kahanas. Siya nakat-on sa paghigugma sa mga Marshallese ug nagserbisyo kanila pinaagi sa pagpanupi ug sa pagtudlo kanila og panahi.

Human sa 18 ka bulan iyang gibana-bana nga naka-700 siya ka tupi. Ang iyang kahinam sa pagpakigbahin sa iyang mga talento nakapahimo kaniya sa pagserbisyo ug pakigsuod sa gatasan ka mga tawo, naglakip sa mga miyembro sa Simbahan, investigator, ug uban pang mga sakop sa komunidad.

Pagsulbad sa mga Kabalaka sa Pamilya

“Unsa pa ka dakong gasa ang ikahatag sa mga apohan ngadto sa ilang kaliwatan kay sa pagsulti pinaagi sa buhat ingon man sa pulong nga, ‘Niini nga pamilya kami nagserbisyo og misyon!’”³

Elder Jeffrey R. Holland sa Korum sa Napulog
Duha ka mga Apostoles

Ang paghunahuna nga mobiya sa nagkalisud nga mga anak o nagtubo nga mga apo ingon og dili maagwanta sa daghang mga tawo. Sa gihapon, ang mga misyonaryo nakakaplag nga ang ilang pagserbisyo nakapalig-on sa ilang mga pamilya sa paagi nga wala nila damha.

Sila si Raymond ug Gwen Petersen sa Wyoming, USA, nakaserbisyo og upat ka misyon. Ang ilang pagbiya alang sa ilang ikaduha nga misyon—ngadto sa Samoa sa ikaduhang higayon—sa sinugdanan usa ka hagit alang sa ilang mga anak, kinsa wala makasabut nganong ang ilang mga ginikanan kinahanglan nga moserbisyo og *lain pa* nga misyon.

Ang pamilya diha-diha dayon nakaamgo sa dagkong mga panalangin tungod sa ilang pagserbisyo. “Silang tanan milambo!” miingon si Sister Petersen. “Ang usa ka magtiayon nga wala pa makaanak napanalanginan og batang lalaki, ang usa adunay milagrosong pagkaayo sa kanser, ang anak nga may kakulangan milambo, ug ang uban nakasinati og dakong kalamboan sa ilang negosyo niadtong tuiga.”

Ang ilang kahago nagpakita og sundanan sa hugot nga pagtuo sa ilang kaliwatan. “Kami adunay upat ka apo nga nag-misyon karon nga nagsulti kanamo nga kami ang ilang inspirasyon aron magmisyon,” miingon si Sister Petersen. “Unsa pa man ang mas maayo nga ganti kaysa niana?”

Pagpangita sa Eksaktong Oportunidad nga Mag-misyon

“Kanunay akong mahingangha kon sa unsang paagiha nga ang giya sa Espiritu Santo motugbang sa mga kinaiya ug mga panginahanglan sa matag misyonaryo ug magtiayon sa nagkadako nga nagkadaiyang mga kahimtang sa misyonaryo nga pagserbisyo sa tibuok kalibutan.”⁴

Elder Richard G. Scott sa Korum sa Napulog
Duha ka mga Apostoles



Sila si Raymond ug Gwen Petersen nagserbisyo og misyon sa mga Samoan nga Santos sa Ulahing mga Adlaw.

Pipila sa mga dapit nga gikinahanglan ang serbisyo sa senior missionary mao ang mga employment center, mga opisina sa misyon, mga family history center, mga templo, ug mga visitors' center. Ang mga aplikante makahangyo asa nila gustong moserbisyo, apan sa katapusan ang calling nagagikan sa Ginoo pinaagi sa Iyang propeta. Ang Ginoo nasayud sa saktong oportunidad sa pagmisyon alang sa matag andam nga single sister o magtiayon.

Sila si George ug Hine Chase nagserbisyo isip direktor sa humanitarian sa Papua New Guinea.



MGA KAUSABAN SA MGA POLISIYA SA SENIOR MISSIONARY

- Ang mga missionary couple mahimong mopili sa pagserbisyo ug 6, 12, 18, o 23 ka bulan.
- Ang pinakadako nga galastuhan sa balay alang sa mga senior couple limitahan sa US \$1,400 kada bulan.
- Ang mga senior missionary mahimong mouli alang sa importante kaayong mga panghitabo sa pamilya (kutob 10 ka adlaw) sa ilang kaugalingon nga gasto.

Alang sa mas detalyado nga impormasyon, tan-awa sa <http://lds.org/church/news/changes-in-senior-missionary-rules>.

Nakat-unan nila ni George ug Hine Chase sa New Zealand nga ang ilang mission call angay lang gyud para kanila; sila nagmalipayon sa dihang daghan sa ilang kahanas ug mga talento sa pamilya nakatabang kanila sa ilang humanitarian nga buhat sa Papua New Guinea.

Si Elder Chase usa ka karpentero ug makatabang sa pagtimbang-timbang ug pagorganisar og mga proyekto sama sa paghimo og mga atabay. Si Sister Chase nagtrabaho sulod sa 18 ka tuig sa office management. “Ang akong kahanas sa administrasyon ug computer magamit kaayo,” siya miingon. Gihiusa niya ug ni Elder Chase ang ilang mga abilidad sa pagbuhat sa programa sa career workshop, pagtabang sa mga lumulupyo nga makakat-on og mga kahanas sama sa pagdumala sa oras, organisasyon, pagpangulo, pagpanglimpyo, ug komunikasyon.

Nagkahiusa, ang mga Chase migamit sa mga kasinatian nga ilang nakat-unan gikan sa ilang mga calling sa Simbahan ug —kasagaran—gikan sa pagkaginikanan. Samtang ang mga Chase nagtrabaho sa pag-apud-apod sa mga suplay para sa eskwela ug sa pagpalambo sa pag-atiman sa mga masuso, ang ilang kasinatian isip ginikanan nakatabang kanila nga makasabut sa giatubang

Sila si Peter ug Kelly Sackley nagserbisyo sa Area office sa Hong Kong.



nga mga kalisdanan sa lokal nga mga pamilya ug mga eskwelahan.

Pagtubag sa mga Panalapi

“Pagpakitambag sa inyong mga kapamilya ug sa inyong bishop o branch president. Ingon nga ang mga sulugoon sa Ginoo nakasabut sa inyong temporal nga sitwasyon, makadawat kamo sa mahangturong mga panalangin sa full-time nga misyonaryong pagserbisyo.”

Elder Robert D. Hales sa Korum sa Napulog
Duha ka mga Apostoles

Daghang mga magtiayon mibati nga sila walay igong kwarta sa pagserbisyo og misyon. Sila naghunahuna sa ilang mga galastuhan sa pagpuyo, medikal, ug sa balay ug naghunahuna unsaon sa pagbayad niining tanan. Ang mga lider sa Simbahan miila niining tinuoray nga mga problema ug giusab ang mga polisiya aron sa pagpagaan sa palas-anon (tan-awa ang sidebar sa wala). Sa gihapon, ang pagsulbad sa mga problema sa pinansyal nanginahanglan og hugot nga pagtuo, mabinantayong pagplano, ug pipila ka sakripisyo.

Sila si Leonard ug Vera Chisango sa Zimbabwe nakasinati og mga hagit bisan pa nga adunay epektibong plano. Sila nangandam nga mag-misyon sa ilang tibuok kinabuhi isip mag-asawa, ug sila nasayud nga ang ilang mga pension ug investment makasustento sa ilang unang misyon sa Templo sa Johannesburg South Africa. Apan samtang sila nagmisyon, ang ekonomiya sa kalit lang mihagsa, ug dako ang pagkunhod sa ilang mga investment.

Uban sa tabang sa ilang pamilya, ang mga Chisangos mipadayon sa ilang misyon. Ang mga panalangin niadto nga sakripisyo magantihon kaayo: maayo ang dagan sa negosyo sa ilang anak nga lalaki, na-promote sa trabaho ang ilang anak nga babaye, ug ang ilang mga anak nakakat-on sa pagtinabangay sa pagsuporta sa ilang mga ginikanan.

Daghang senior missionary nagpamatuod nga ang temporal nga gasto gamay ra kaayo ikompara sa mga panalangin nga nadawat diha sa pagserbisyo. Si Elder Peter Sackley, usa ka Canadian nga misyonaryo nga nagserbisyo uban sa iyang asawa, si Kelly, sa Area office sa Hong Kong, mi-summarized sa mga pagbati sa kadaghanan: “Mas dako og

panalangin ang akong trabaho karon kaysa akong trabaho diha sa kompaniya.”

Pagbuntog sa mga Babag pinaagi sa Pagpalambo og Hugot nga Pagtuo

“Daghang mapaubsanong mga Santos sa Ulahing mga Adlaw nahadlok nga tingali dila sila takus sa misyonaryong buhat. Apan alang sa umaabot nga misyonaryo, ang Ginoo mihatag niini nga kasiguradoan: ‘Hugot nga pagtuo, paglaum, gugma nga putli, ug pagmahal, uban ang bug-os nga tinguha ngadto sa himaya sa Dios, nakahimo nila nga takus alang sa buhat.’”⁶

Elder Russell M. Nelson sa Korum sa Napulog Duha ka mga Apostoles

Sa pagtubag sa upat ka mga babag sa pagserbisyo sa senior missionary, si Elder Hales misugyot og yano nga solusyon: “Pagbaton og hugot nga pagtuo, ang Ginoo nasayud asa kamo gikinahanglan.”⁷ Ang hugot nga pagtuo makabuntog sa kahadlok, makalig-on sa mga pamilya, makatabang sa senior missionary sa pagkakita sa eksaktong oportunidad sa pagserbisyo, ug makatabang sa paghatag og pinansyal kahupayan.

Daghang katuigan ang milabay, ang ingon nga pagtuo naglambo sa usa ka batang babaye nga Polish, si Stanislaw Habel. Wala madugay sa iyang kinabuhi, ang iyang hugot nga pagtuo migiya kaniya sa pagdawat sa gipahiuli nga ebanghelyo ug dayon, isip hamtong, sa pagserbisyo isip misyonaryo sa family history sa Utah.

Ang pagserbisyo ni Sister Habel nagtudlo kaniya sa wala pa kaayo mahibalo-i nga sekreto: “Ang pag-misyon makapabata sa tawo.” Siya mipahiyom ug miingon, “Kon inyong kalimtan ang inyong mga babag, kamo makakat-on nga magmapasalamat. Kamo makakat-on nga mahimong mahisama ni Kristo pinaagi sa pagserbisyo sa uban, ug kini mao ang pagpangandam sa pagpuyo uban sa Langitnong Amahan. Ang misyon makausab sa kinabuhi sa usa ka senior.”

Sa tinuoray, kini makausab, ingon man usab sa kinabuhi niadtong ilang mapainubsanong giserbisyon. ■

Ang mga senior missionary nagserbisyo sa lainlaing mga paagi sa tibuok kalibutan. Bisitaha ang liahona.lds.org sa pagdugang og basa sa ilang mga istorya.



Sila si Leonard ug Vera Chisango nagserbisyo sa Templo sa Johannesburg South Africa (sa tuo).



MUBO NGA MGA SULAT

1. Tan-awa sa Robert D. Hales, “Couple Missionaries: A Time to Serve,” *Liahona*, Hulyo 2001, 28–31.
2. Robert D. Hales, *Liahona*, Hulyo 2001, 29.
3. Jeffrey R. Holland, “Apil Kitang Tanan,” *Liahona*, Nob. 2011, 46.
4. Richard G. Scott, “Karon Mao ang Panahon sa Pagserbisyo og Misyon!” *Liahona*, Mayo 2006, 89.
5. Robert D. Hales, “Mga Magtiayon nga Misyonaryo: Mga Panalangin gikan sa Sakripisyo ug Serbisyo,” *Liahona*, Mayo 2005, 40.
6. Russell M. Nelson, “Ang Tigulang nga mga Misyonaryo ug ang Ebanghelyo,” *Liahona*, Nob. 2004, 81.
7. Robert D. Hales, *Liahona*, Hulyo 2001, 31.

“Tingali wala nay laing mas maayong paagi sa pagpahayag og pasalamat sa Labing Gamhanan kaysa pagserbisyo og full-time misyon.”

Elder Leonard Chisango, Zimbabwe

Si Stanislaw Habel nagtabang sa mga patron sa Family History Library sa Siyudad sa Salt Lake, Utah.



ANG MGA PANALANGIN SA PAG-FOCUS DIHA SA **TEMPLO**



“Karon, mahitungod sa kahimtang sa kalag tali sa kamatayon ug sa pagkabanhaw—Tan-awa, kini gipahibalo ngari kanako pinaagi sa usa ka anghel, nga ang espiritu sa tanan nga mga tawo, sa diha-diha nga sila mobiya gikan niining mortal nga lawas, oo, ang mga espiritu sa tanan nga mga tawo, bisan sila maayo o dautan, dad-on sa panimalay ngadto niana nga Dios kinsa mihatag kanila sa kinabuhi.”

Alma 40:11

Walay laing mas mahinungdanong buhat kaysa pagtukod og mahangturong pamilya—ug kana nga buhat matuman diha sa balay sa Ginoo.

Ni Joshua J. Perkey

Mga Magasin sa Simbahan

Pipila lang ka mga butang sa kinabuhi ang makaapekto kanato nga labawng mahinuklugon kaysa pagkamatay sa usa ka minahal. Nakasinati niini sila si Bishop Richard Rodriguez ug iyang asawa, si Ruth. Apan uban sa mga mata sa pagtan-aw ug mga dalunggan sa pagpatalinghug ug pinaagi sa sagradong mga ordinansa sa templo, ilang giatubang kini nga hagit nga may hugot nga pagtuo, nga mas nakapaduol kanila sa Manlu-luwas, sa kalipay, ug sa kalinaw.

Pagdumala kon may Mamatay

Sila si Richard ug Ruth nagkaila-ila samtang nagtrabaho sa usa ka kompaniya nga naghimo og semento sa Azogues, usa ka gamayng lungsod sa Andes Mountains duol sa Cuenca, Ecuador. Si Richard usa ka kinabig sa Simbahan, kauban sa iyang inahan ug igsoong lalaki mga pipila lang ka tuig ang milabay. Niadtong higayona, si Ruth dili pa miyembro.

“Sa dihang akong nakaila si Ruth, dili nako makabiya kaniya,” miingon si Richard, nga nagpahiyum.

Naminyo sila niadtong 1996. Mga pipila lang ka bulan ang milabay, namatay ang amahan ni Ruth.

“Ang iyang kamatayon mao ang rason sa tumang depresyon sa akong kinabuhi,” mipasabut si Ruth. “Dili gyud nimo makalimtan ang pagkamatay sa usa ka minahal. Mabati gyud nimo kanunay ang ilang pagkawala.”

Niadtong 2001, ang inahan ni Richard namatay. Usab, ang pagkamatay nagdala og tumang kasubo. Apan sulod sa mga katuigan, mas milambo ang kahibalo ug pagpamatuod ni Richard sa ebanghelyo, ug kana nakahatag og makahupay nga panglantaw.

“Tungod sa ebanghelyo,” siya miingon, “Nasabtan nako og gamay ang kahimtang sa akong inahan. Gipakigbahin nako ang Alma 40:11 ngadto kang Ruth ug gipasabut kon unsa ang mahitabo sa espiritu kon kini mobiya sa lawas. Kini nakahatag og dakog kahupayan namong duha.”

Paghatag og Bili sa Kabubut-on

Bisan pa man, si Ruth dili gihapon interesado sa Simbahan, bisan tuod siya mahigalaon sa mga miyembro sa Simbahan ug sa mga misyonaryo. “Wala lang nako batia ang panginahanglan nga usabon ang akong tinuohan,” siya miingon.

Si Richard mihukom nga dili siya pugson. “Kada higayon nga maghisgut kami og Simbahan, bati ang paingnan sa among panag-istoryahanay,” siya miingon. “Ug kon ako siyang pugson, bati ang kapaingnan. Busa gihunong nako. Dili ko gusto nga buhaton kini ngadto kaniya.”

Sa tinglarag sa 2011, ang mga



misyonaryo midapit ni Ruth sa usa ka bunyag. Ang iyang desisyon sa pagdawat sa imbitasyon nakapausab sa tanan.

Sa bunyag, ang sister nga gibunyagan nagpamatuod. “Siya naghisgot kabahin sa mga milagro nga nanghitabo sa iyang kinabuhi sukad nga iyang nahibaloan ang Simbahan—mga milagro sa panglawas, pagkamaayo, ug kalig-on,” mihinumdom si Ruth. “Kini nga sister nag-inusarang nagpuyo apan nakabaton niini nga pagpamatuod.”

Si Ruth natingala sa unsang paagi kini nga bayhana nga nag-atubang og lisud nga mga pagsulay nakabaton og ingon ana nga matang sa pagtuo. Kadto nga pangutana ug pagsunod sa imbitasyon sa pagtambong sa bunyag nakatandog sa kasingkasing ni Ruth ug nakaandam kaniya sa pagdawat og saksi gikan sa Espiritu.

“Mao kadto ang higayon nga nakadesisyon ko nga magpabunyag. Sa wala madugay, sa dihang kami lang duha ni Richard, miingon ko, ‘Richard, unsay imong hunahuna kon magpabunyag ko inigka-Disyembre?’ Ug mao na kadto. Pamilyar nako sa Simbahan ug sa ebanghelyo. Apan gikinahanglan gihapon nako nga maminaw sa mga diskusyon sa mga misyonaryo.”

“Ang Dios moandam sa kasingkasing sa katawhan,” dugang ni Richard. “Kita mismo makahimo og pipila ka mga butang. Naghimo og daghang mga butang, apan kini natuman sa dihang andam na si Ruth.”

Si Ruth miuyon: “Daghan kong mga hagit nga gibuntug sa dihang nagminyo mi. Ug sa dihang nabuntog na nako kadtong mga hagit, diha lang ko nakaamgo nga dili nako kinahanglang magpaabut og laing milagro sa akong kinabuhi. Andam nako nga magpabunyag.”

Pag-atubang sa mga Hagit uban sa Hugot nga Pagtuo

Ang bunyag ni Ruth niadtong Disyembre 2001 nagtimaan sa kausaban sa focus sa ilang pamilya. Kana nga kausaban naghatag og espiritwal nga kalig-on ug mga panalangin nga naggiya kanila hangtud karon.



“Ang kalipay diha sa kinabuhi sa pamilya labaw nga makab-ot kon gipasikad diha sa mga pagtulun-an sa Ginoong Jesukristo.”

“Ang Pamilya: Usa ka Pamahayag ngadto sa Kalibutan,” *Liahona*, Nob. 2010, 129.

Sa ibabaw: Sila si Richard ug Ruth Rodriguez uban sa ilang mga anak (gikan sa wala): Maria Judith, Jorge, Richard Jr., ug Freddy. Sila na-sealed sa Templo sa Guayaquil Ecuador (sa tuo).

“Kami na-sealed sa templo niadtong Hunyo 28, 2003,” miingon si Richard. “Tungod ni-ana, daghang mga panalangin ang miabut sa among kinabuhi. Ang among una ug ikaduha nga mga anak na-sealed kanamo, ug ang among ikatulo ug ikaupat natawo ubos sa pakigsaad. Ang among mga anak panalangin.”

Si Richard mipasabut nga ang matitud-anong pagserbisyo sa Simbahan nagdala og panag-uyon sa among pamilya: “Ang akong asawa ug ako patas nga nagtinabangay. Among giatubang ang mga hagit ug mga pag-sulay, ug nagkahiusa kami sa pagsulbad niini. Kami nagtuo sa samang mga butang. Tungod kay na-sealed na sa templo, kami nasayud nga kon kami matitud-anong molahutay, ang Ginoo motabang kanamo.”

Pag-focus sa Templo Makausab sa Ward

Sa dihang nabunyagan si Ruth, 25 lang ka miyembro ang anaa sa Azogues Branch.



“Ang balaan nga plano sa kalipay makahimo sa mga relasyon sa pamilya nga magpa-dayon human sa kamatayon. Sagrado nga mga ordinansa ug mga pakigsaad nga anaa sa balaan nga mga templo makapahimo alang sa tagsa-tagsa sa pagbalik ngadto sa atubangan sa Dios ug alang sa mga pamilya nga magkahiusa sa kahangturan.”

“Ang Pamilya: Usa ka Pamahayag ngadto sa Kalibutan,” *Liahona*, Nob. 2010, 129.

Karon usa na ka ward, kanunay may 75 o sobra pa ka mga miyembro sa miting sa sakrament.

“Inyong mapalig-on ang indibidwal kon inyong mapalig-on ang mga pamilya,” miingon si Ruth. “Samtang ang mga miyembro mosunod sa mga sugo ug maminaw sa tanang gipangtudlo sa mga lider kanato, atong mapalig-on ang atong mga pamilya ug ang ward. Ingon og ang matag pamilya kabahin sa semento nga naghiusa sa ward aron kini molambo.”

Isip bishop, si Richard nagdasig sa mga paningkamot sa paglig-on sa mga pamilya pinaagi sa paghimo ug pagtuman sa mga pakigsaad sa templo ug sa kanunayng pagsimba diha sa templo. Usa sa pagpakita niining emphasis mao ang mga ward temple trip ngadto sa Templo sa Guayaquil Ecuador, mga lima ka oras ka layo.

“Kami moadto isip ward kutob sa among mahimo,” miingon si Ruth. “Ang among tumong mao nga ang tanang pamilya ma-sealed sa templo.”

“Ang pag-adto sa templo aron ma-sealed nakatabang sa mga pamilya nga molambo sa espirital nga paagi,” midugang si Richard. “Bag-ohay lang, pipila ka mga pamilya ang na-sealed. Ug karon sila nag-andam sa mga ngalan sa ila mismong pamilya ug nagpahigayon og mga ordinansa alang sa ilang katigulangan. Kadtong nagbuhat niini nakapalambo og mas dakong pasalig sa ebanghelyo ni Jesukristo ug nakakaplag og mas dakong kalipay. Ang templo nakapausab sa panan-awon sa mga miyembro.”

Pag-focus sa Templo Makausbab sa mga Indibidwal

Pinaagi sa sagrado, personal nga mga kasi-natian, ang pamilyang Rodriguez nakaangkon og gamhanan, personal nga pagpamatuod sa mga pakigsaad sa templo ug sa pagpahigayon og gitugyan [vicarious] nga buhat alang sa katigulangan.

“Among napahigayon ang buhat alang sa akong mga uyoan og iyaan, mga igsoon sa

akong amahan,” miingon si Ruth. “Among nabati nga kinahanglan mangunay sa pagbuhat niini alang sa among pamilya. Nasayud ko nga ang vicarious work nga atong gihimo tinuod. Mibati ko og dakong kalinaw sa buhat nga atong gipangbuhat alang sa atong katigulangan. Kini nahimong labing mahinungdanon nga buhat.”

Si Richard mipamatuod, “Ganahan kaayo ko sa paghimo sa buhat diha sa templo alang niadtong nagpaabut. Kini ang buhat sa atong tibuok kinabuhi. Kini mao ang gusto namong buhaton.”

Ang pagtambong sa templo nakapausab sa ilang pamilya. “Sa dihang kami na-sealed sa templo, daghan kaayong mga butang ang nasab,” miingon si Ruth. “Ang among espirital nga kalig-on milambo.”

Si Richard miuyon: “Alang sa among pamilya, kini nagpasabut nga mas magkahi-usa ang pamilya, nasayud nga ang kasuod sa pamilya, nga mao gayud ang sinugdanan ug katapusan sa tanang butang, naghatag kanato og kalig-on sa pagpadayon. Sa kinabuhi, kanunay may mga hagit. Apan inubanan sa pag-focus nga gihatag sa templo kanato, atong maatubang ang umaabot sa talagsaong paagi. Ang pagpakigbahin niining mga panalangin—ug ilabi na sa pagtabang sa ubang pamilya sa pagbuhat usab niini—makahatag og hingpit nga kalipay sa atong kinabuhi. Mibati ko og dakong pasalig sa akong pamilya.”

Si Richard mibati nga ang desisyon sa pamilya nga moadto sa templo, modawat sa mga ordinansa, ma-sealed, ug dayon mobalik aron sa pagpahigayon sa mga vicarious work alang sa ilang katigulangan mao ang usa sa ilang labing dako nga panalangin. “Kon kita mogamit og hugot nga pagtuo ug modawat sa gipahiuli nga ebanghelyo ni Jesukristo ug ilabi na kon kita moadto sa templo aron sa pagdawat sa sealing ug sa makaluwas nga mga ordinansa pinaagi sa priesthood, ang mga kinabuhi mausbab,” miingon siya. “Kon ang usa ka tawo modawat sa mga pakigsaad sa templo, mausbab na gyud siya.” ■



PAGLIHOK ISIP MGA TINUGYANAN [AGENTS]

“Diha sa dako nga pagbahin sa tanan nga mga nilalang sa Dios, adunay ‘mga butang nga palihukon ug mga butang nga aghaton sa paglihok’ (2 Nephi 2:14). Isip mga anak sa atong Langitnong Amahan, napanalanginan kita sa gasa sa matarung nga kabubut-on, ang kapasidad ug gahum sa paglihok nga gawasnon. Gitugahan og kabubut-on, kita mga tinugyanan, ug kita una sa tanan ang molihok og dili lamang aghaton sa paglihok—ilabi na samtang kita ‘nangita og pagtulun-an . . . pinaagi sa pagtuon ug usab pinaagi sa hugot nga pagtuo’ (D&P 88:118).”

Elder David A. Bednar sa Korum sa Napulog Duha ka mga Apostoles, “Magtukaw uban sa Bug-os nga Pagkamapadayunon,” *Liahona*, Mayo 2010, 42.

GIUNSA SA MGA Disipulo ni Kristo PAGPUYO PANAHON SA Gubat ug Kasamok

Ang mga baruganan diha sa Basahon ni Mormon naka-tabang kanato sa pagpuyo nga may hugot nga pagtuo ug pag-laum panahon sa kalisdanan.



Sa ibabaw: Si Nephi milahutay nga gigapos sulod sa upat ka adlaw hangtud nga si Laman ug Lemuel naghinulsol ug gibadbad ang mga pisi (tan-awa sa 1 Nephi 18:9–21). Sa tuo: Walay usa sa 2,000 ka mga batanong lalaki nga sundalo ni Helaman ang namatay sa gubat (tan-awa sa Alma 56:44–57).

Ni David Brent Marsh
Priesthood Department

Kita nagpuyo sa panahon sa grabeng gubat ug kasamok. Ang mga pamantalaan nag-report niining makalilisang nga mga panghitabo matag adlaw. Ang propeta sa Ginoo, si Presidente Thomas S. Monson, miingon, “Mianhi kita niining yuta sa panahon sa kasamok.”¹ Siya miuyon sa gisulti ni Presidente Gordon B. Hinckley (1910–2008): “Kita nagpuyo sa panahon diin mapintas nga kalalakin-an mobuhat og terible ug salawayon nga mga butang. Kita nagpuyo panahon sa gubat.”²

Samtang makapahinuklog, dili gyud ni ikatingala. Ang kasulatan nagtudlo nga sa katapusang mga adlaw si Satanas “makiggu-bat” (Pinadayag 12:17) sa mga matinuoron ug ang “kalinaw pagakuhaon gikan sa yuta” (D&P 1:35).

Ang Dios nakakita sa atong adlaw ug gitawag si Propeta Joseph Smith sa pagpatungha sa Basahon ni Mormon aron sa pagtabang kanato (tan-awa sa D&P 1:17, 29; 45:26). Sa 239 ka mga kapitulo sa Basahon ni Mormon, 174 (73 porsiyento) naghigut kabahin sa gubat, terorismo, pagpatay, laraw-pangdaot sa politika, tinago nga mga kalihokan, pag-panghulga, pakigkunsabo sa pamilya, ug uban pang oposisyon.


Nganong ang mga tigtipig sa talaan sa Basahon ni Mormon nagpreserbar og daghan kaayong mga insidente sa gubat? Si Presidente

Ezra Taft Benson (1899–1994) mitubag, “Gikan sa Basahon ni Mormon atong makat-unan giunsa sa mga disipulo ni Kristo pagpuyo panahon sa gubat.”³ Ang mosunod mga ideya nga makagiya kanato samtang kita nagpuyo sa gubot nga panahon.

Ang Pagkamasulondon Nagdapit og Kaluwasan [Deliverance]

Kadaghan diha sa Basahon ni Mormon, ang Ginoo miluwas sa Iyang mga disipulo kon sila mosunod sa Iyang mga sugo.⁴ Si Nephi mitudlo, “Ang malumo nga mga kalooy sa Ginoo anaa ibabaw sa tanan kinsa siya mipili, tungod sa ilang hugot nga pagtuo, aron mahimo sila nga malig-on maingon ngadto sa gahum sa kaluwasan” (1 Nephi 1:20). Si Nephi dayon mirekord giunsa sa Ginoo pagluwas sa iyang amahan gikan sa mga tawo nga misulay sa pagpatay kaniya, miluwas sa iyang pamilya gikan sa pagkagun-ob sa Jerusalem, miluwas kaniya ug sa iyang mga igsoon gikan sa pag-sulay og patay ni Laban kanila, ug miluwas kaniya sa dihang mihasi si Laman ug Lemuel (tan-awa sa 1 Nephi 2:1–3; 3:28–30; 4; 7:16–19; 18:9–23).

Si Alma miingon sa iyang anak nga si Shiblon, “Ako manghinaut nga ikaw kinahanglan mahinumdom, nga tungod kay ikaw mibutang sa imong pagsalig diha sa Dios mao usab nga ikaw pagaluwason gikan sa imong mga pag-sulay, ug sa imong mga kasamok, ug sa imong mga kasakit” (Alma 38:5). Si Mormon nakaob-serbar usab nga “kadto kinsa matinu-d-anon



Daghang higayon diha sa Basahon ni Mormon, ang Ginoo miluwas sa Iyang mga disipulo kon sila mosunod sa Iyang mga sugo.



ANG GINOO MOPROTEKTA KANATO

“Ang Dios maga-uban kanato. Siya mobantay kanato. Siya moprotekta kanato . . . kon kita magmatinuoron ug magmatinud-anon ug masulundon ug mopatalinghug sa Iyang pulong.”

Presidente Gordon B. Hinckley (1910–2008), “God Will Protect Us in These Perilous Times,” *Church News*, Feb. 22, 2003, 3.

diha sa paghupot sa mga sugo sa Ginoo giluwang sa tanan nga mga panahon” (Alma 50:22). Si Elder Russell M. Nelson sa Korum sa Napulog Duha ka mga Apostoles mimatuod niining baruganan sa dihang miingon siya: “Ang pagkamasulundon mopadagayday sa mga panalangin sa Dios nga walay pagpugong. Siya mopanalangin sa Iyang masulundon nga mga anak og kagawasan gikan sa pagkaulipon ug pagkauyamot.”⁵

Ang Basahon ni Mormon nagpakita usab nga bisan ang pipila lang ka matarung nga mga tawo makaangkon og kalinaw ug kaluwasan diha sa tibuok siyudad (tan-awa sa Helaman 13:12–14).

Ang Gubat Mahimong usa ka Panawagan sa Paghinulsol

Kon kita makalimot sa Dios, Siya manawag kanato. Sa sinugdanan mogamit Siya og malumong mga pamaagi sama sa personal nga pagdasig ug mga propeta. Apan kon kita dili maminaw, Iyang dugangan ang Iyang mga paningkamot. Usahay, tugutan Niya ang mga gubat ug kasamok isip bahin sa Iyang katapusang paagi sa pagtabang kanato nga mobalik Kaniya.⁶

Si Mormon miingon, “Ug sa ingon kita makakita nga gawas kon ang Ginoo mopanton sa iyang mga katawhan uban sa daghan nga mga kasakitan, oo, gawas kon siya moduaw kanila uban sa kamatayon ug uban sa kalisang, ug uban sa kagutom ug uban sa tanan nga matang sa kamatay, sila dili mohinumdom kaniya” (Helaman 12:3). Ang gubat mahimong usa ka pahinumdom nga maghinulsol ug mobalik ngadto sa Dios.

Ang Dios Mohupay atol sa Gubat

Kon gikinahanglan sa mga disipulo sa Ginoo nga mag-antus tungod sa gubat, ang Dios mohupay kanila. Sa dihang si Alma ug ang iyang mga sumusunod nabilanggo, sila dayon nangamuyo sa Ginoo (tan-awa sa Mosiah 23:27–28), ug diha-diha dayon Siya mitubag: “Ako usab mopagaan sa mga alantuson diin anaa gitungtong diha sa inyong mga abaga, gani kamo dili makabati kanila diha sa inyong buko-buko, bisaan anaa pa kamo sa pagkaulipon; . . . nga kamo mahimo nga masayud sa pagkatinuod nga Ako, ang Ginoong Dios, moduaw sa akong mga katawhan diha



Pipila sa mga disipulo, sama ni Abinadi (gipakita sa ibabaw ug sa ubos), nag-antus o namatay aron mobarug isip saksi batok sa kadautan.



sa ilang kasakit” (Mosiah 24:13–14).

Si Jacob miingon ngadto sa putli og kasing-kasing sa iyang panahon, “Tan-aw ngadto sa Dios uban sa kalig-on sa hunahuna, ug pag-ampo ngadto kaniya uban sa hilabihan ka hugot nga pagtuo, ug siya mohupay kaninyo sa inyong mga kasakit, ug siya mohangyo alang sa inyong katuyoan, ug mopakanaog og kaangayan niadtong kinsa nagtinguha sa inyong kalaglagan” (Jacob 3:1).

Ang moderno nga mga propeta mimatuod niini nga kamatuoran. Si Elder Joseph B. Wirthlin (1917–2008) sa Korum sa Napulog Duha ka mga Apostoles mitudlo, “Samtang dili kanunay manginlabut ang [Dios] sa dagan sa mga panghitabo, Siya misaad sa mga matitud-anon og kalinaw bisan sa ilang mga pagsulay ug kalisdanan.”⁷

Si Presidente Benson miingon, “Bisan tuod ang panahon nagkaanam og kapeligro, . . . kon kita mosalig lang sa Dios ug mosunod sa iyang mga sugo dili kita angay nga mahadlok.”⁸

Ang Pipila Gitawag sa Pagbarug isip Saksi Batok sa Kadautan

Samtang ang mga disipulo ni Kristo maluwag gikan sa gubat, pipila sa mga disipulo kinahanglang mag-antus o mamatay sa pagbarug isip saksi batok sa dautan. Kini usa ka sakit nga reyalidad nga dili dali madawat o masabtan. Si Elder Neal A. Maxwell (1926–2004) sa Korum sa Napulog Duha ka mga Apostoles mipahinumdom kanato nga “ang mga matitud-anon dili makalikay sa mga panghitabo sa kalibutan.”⁹ Si Presidente Hinckley miila nga pipila kanato “mahimong mag-antus.”¹⁰

Gipreserbar sa Basahon ni Mormon ang pipila ka mga panghitabo sa dili makatawhanong pag-abusar ug pagkamapintas aron makatabang kanato sa pagsabut nganong ang mga disipulo sa Ginoo, lakip ang mga propeta ingon man ang inosenteng mga babaye ug mga bata, usahay mag-antus ug mamatay sa gubat. Sama pananglit, si Propetang Abinadi gigapos sa dautang mga pari ni Haring Noah “ug mibunyal sa iyang lawas uban sa binugkos nga kahoy, oo, gani ngadto sa kamatayon.” Sa wala pa mamatay, si Abinadi mipamatuod, “Kon ikaw mopatay kanako ikaw mopaagas sa dugo sa walay sala, ug kini usab mobarug nga usa ka pagpamatuod batok kanimo sa

katapusan nga adlaw” (Mosiah 17:10, 13).

Sa lain nga panghitabo sa sakit nga pagpatay diha sa Basahon ni Mormon, gisunog sa dautang mga abogado ug mga maghuhukom sa Ammonihah ang mga asawa ug mga anak sa mga nakabig sa tinuohan. Sila si Alma ug Amulek gidala ngadto sa dapit asa gipangpatay ug gipugos sa pagsaksi niining walay kalooy nga pagpamatay.

“Sa diha nga si Amulek nakakita sa mga kasakit sa mga babaye ug sa mga bata kinsa gilamoy sa kalayo, siya usab gisakitan; ug siya miingon ngadto kang Alma: Ngano nga kita mosaksi niini nga makahahadlok nga talanawon? Busa kita mopatuy-od sa atong mga kamot, ug gamiton ang gahum sa Dios nga ania kanato, ug luwason sila gikan sa mga dilaab sa kalayo.”

Si Alma mitubag, “Ang Espiritu nagpugong kanako nga ako kinahanglang dili mopatuy-od sa akong kamot; kay tan-awa ang Ginoo midawat kanila ngadto sa iyang kaulanginon, diha sa himaya; ug siya mitugot nga sila mahimo nga mobuhat niini nga butang, o nga ang mga katawhan mahimo nga mobuhat niini nga butang ngadto kanila, sumala sa katig-a sa ilang kasingkasing, nga ang mga paghukom diin siya mopahamtang nganha kanila diha sa iyang kasuko makiangayon; ug ang dugo sa walay sala mobarug ingon nga usa ka saksi batok kanila, oo, ug mosinggit sa hilabihan batok kanila sa katapusan nga adlaw” (Alma 14:10–11).

Ang Matarung nga Namatay sa Gubat Mosulod ngadto sa Kapahulayan sa Ginoo

Samtang kita nagmasulub-on sa pagkamatay sa matitud-anong gimahal, ang Basahon ni Mormon misiguro kanato nga sila nakasulod sa kapahulayan as Ginoo ug nagmalipayon. Si Moroni mihatag og gibug-aton niining hilisgutan, “Kay ang Ginoo mitugot sa mga matarung nga mapatay nga ang iyang kaangayan ug paghukom modangat sa mga dautan; busa kamo dili magtuo nga ang mga matarung gisalikway tungod kay sila gipatay; apan tan-awa, sila mosulod ngadto sa kapahulayan sa Ginoo nga ilang Dios” (Alma 60:13).

Human sa usa ka gubat diin ang “mga lawas sa daghan nga mga liboan . . . nadunot nga nagtipun-og diha sa ibabaw sa yuta,” lakip sa pipila sa mga matitud-anong mga disipulo



Si Ether (sa ibabaw) ug si Moroni (sa pahina 34) nakakita sa kalaglagan sa ilang mga sibilisasyon tungod sa gubat (tan-awa sa Ether 13:13–14; Moroni 1:1–4).

ni Kristo, narekord sa Basahon ni Mormon nga ang mga naluwas “nagbangutan tungod sa pagkamatay sa ilang mga kaliwatan, apan sila nalipay ug naghimaya sa paglaum, ug gani nasayud, sumala sa mga saad sa Ginoo, nga sila pagabanhawon aron mopuyo diha sa tuo nga kamot sa Dios, sa usa ka kahintang sa walay katapusan nga kalipay” (Alma 28:11–12).

Ang Prinsipe sa Kalinaw

Ang Basahon ni Mormon gipatungha aron sa pagpanalangin niadtong buhi panahon sa gubat ug kasamok. Ang mga panghitabo ug mga pagtulun-an nga narekord dinhi naghatag og paglaum, paghupay, ug paghatag og balananong panglantaw. Atong nakat-unan nga ang pagkamasulundon ngadto sa Dios makaluwas og daghan, nga ang gubat mahimong usa ka panawagan sa pagbalik ngadto sa Dios, ug nga ang Dios naghatag og kahupayan alang sa Iyang mga disipulo nga nag-antus. Ato usab nga nakat-unan nga ang mga matarung kinsa mamatay atol sa gubat o kasamok mobarug isip saksi batok sa dautan ug kini nga mga disipulo mosulod ngadto sa kapahulayan sa Ginoo.

Sa katapusan, ang Basahon ni Mormon nagtudlo kanato sa unsang paagi nga ang mga disipulo ni Kristo makadawat og kalinaw sa ilang mga kasingkasing, mga panimalay, ug kanasuran. Kini mao ang labing mahinungdanon nga instrumento sa pagdala nato kang Jesukristo, ang Prinsipe sa Kalinaw. ■

MUBO NGA MGA SULAT

1. Thomas S. Monson, “Gahum sa Priesthood,” *Liahona*, Mayo 2011, 66.
2. Gordon B. Hinckley, “Living in the Fullness of Times,” *Liahona*, Ene. 2002, 6.
3. Ezra Taft Benson, “The Book of Mormon—Keystone of Our Religion,” *Liahona*, Nob. 1986, 7.
4. Adunay dili moubos sa 56 ka mga bersikulo sa Basahon ni Mormon nga nagtudlo giunsa sa Ginoo pagluwas ang mga tawo gikan sa gubat ug sa ubang peligro nga mga kahintang.
5. Russell M. Nelson, “Atubanga ang Umaabut uban sa Hugot nga Pagtuo,” *Liahona*, Mayo 2011, 34–35.
6. Adunay dili moubos sa 35 ka mga bersikulo, lakip sa 11 ka buok diha sa Basahon ni Mormon, nga nagtudlo sa unsang paagi ang Ginoo nagtugot nga ang gubat ug natural nga mga kalamidad makatabang kanato sa paghinumdom Kaniya.
7. Joseph B. Wirthlin, “Finding a Safe Harbor,” *Liahona*, Hulyo 2000, 71.
8. Ezra Taft Benson, sa Conference Report, Okt. 1950, 146.
9. Neal A. Maxwell, “Giliyokan sa mga Bukton sa Iyang Gugma,” *Liahona*, Nob. 2002, 17.
10. Gordon B. Hinckley, “The Times in Which We Live,” *Liahona*, Ene. 2002, 86.

NGANONG MAHITABO ANG MGA GUBAT UG KASAMOK?

Ang Basahon ni Mormon nagpamatuod uban sa kaklaro nga ang kadautan mosangput sa gubat. Kon ang dili matarung nga mga indibidwal magtinguha og gahum labaw sa uban og ang mga lumulupyo motugot nga ang kadautan mopadayon nga dili pugngan, ang resulta mao ang gubat, panag-away, ug kasamok.

KON ANG DILI MATARUNG NGA MGA INDIBIDWAL MAGTINGUHA OG GAHUM

Si Amlici napildi sa usa ka gubot apan lehitimo nga eleksyon pero dili niya buhian ang iyang tinguha sa pagdumala sa uban. Iyang gikombinser ang iyang mga kaubanan sa pagpahinungod kaniya nga mahimong hari. Dayon iyang gimandoan ang iyang bag-ong mga alagad nga makiggubat aron gub-on ang Simbahan sa Dios ug mapaubos ang mga tawo kaniya. Liboan ang nag-antus sa wala kinahanglana nga kasamok tungod sa usa ka tawo nga gusto og gahum ibabaw sa uban. (Tan-awa sa Alma 2.)

Si Zerahemnah, usa ka komander nga Lamanite, giagni ang iyang katawhan nga makigbatok sa mga Nephite aron sila himoong ulipon. Usa ka gubat nahitabo, ug ang mga namatay dili maihap tungod sa hilabihang kadaghan. (Tan-awa sa Alma 43:6–8, 37; 44:21.)

Si Amalickiah, usa ka masupilon nga Nephite, milingla, nagpasiugda og kasamok ug gubat alang sa iyang personal nga tinguha sa gahum. Iyang naulipon ang mga Nephite, ug sila nag-antus og gubat ug kasamok sulod sa lima ka tuig. (Tan-awa sa Alma 46–48.)

KON TUGUTAN SA MGA LUMULUPYO NGA MAGPADAYON ANG KADAUTAN

Si Nephi mitudlo nga daghang grupo sa mga tawo “nalaglag gikan sa kaliwatan ngadto sa kaliwatan sumala sa ilang mga kadautan” (2 Nephi 25:9). Si Kapitan Moroni misiguro sa iyang katawhan nga sila dili magun-ob gawas kon kini mahitabo ngadto kanila tungod sa ilang kaugalingong mga kalapasan (tan-awa sa Alma 46:18). Si Mormon misulat, “Kini tungod sa mga panag-away sa [Nephite] ug sa ilang mga panagbingkil, oo, sa ilang mga pagbuno, ug sa ilang mga panglungkab, sa ilang pagsimba og mga dios-dios, sa ilang malaw-ay nga mga buhat, ug sa ilang pagkasalawayon, diin anaa taliwala sa ilang mga kaugalingon, diin nagdala diha kanila sa ilang mga gubat ug sa ilang mga kalaglagan” (Alma 50:21).





MGA LITRATO SA PAMILYA PINAAGI NI MICHAEL R. MORRIS

ANG TING-ANI MOABUT RA

Ni Michael R. Morris

Mga Magasin sa Simbahan

Alang kang Oscar Filipponi ug sa iyang pamilya, ang panginabuhi nga pag-uma dili gayud sayon. Ang hangin, huwaw, pagguba sa ekipo, hinay ang halin, ug uban pang mga hagit ingon og nagkunsabo batok sa pinakamaayong mga paningkamot sa pamilya.

“Kada adlaw dinhi sa *chacra*—sa among yuta—kami magtinguha og inspirasyon ug pagpadayag aron makapahimulos unsa ang mahatag sa yuta ngari kanamo,” miingon si Oscar, kinsa nag-uma og 100 acres (40 ha) sa Lower Chubut River Valley, nahimutang sa Chubut Province sa habagatang Argentina. “Matag adlaw adunay mga hagit.”

Usa sa labing dako nga hagit sa pamilyang Filipponi mao nga dili sila kanunay nga masayud kon kanus-a mamunga ang ilang walay kapoy nga kakugi. Hinoon, sila nakakat-on, nga ang kakugi ug pagmakunayon sa katapusan magantihan.

“Ang pag-uma sa yuta dili moganti sa inyong mga paningkamot kada adlaw o kada semana,” pasabut ni Oscar. “Nagtrabaho kami kada adlaw gawas lang sa Dominggo—kada semana, kada bulan—nga dili pa namo makita kanus-a moabut ang kwarta, busa kinahanglan nga kami adunay giandam nga plano sa ekonomiya. Usahay molungtad og mga bulan o gani tuig

Ang pamilyang Filipponi nakakat-on nga ang balaod sa ting-ani—sa pisikal ug espiritwal—nanginahanglan og pagkamakanunayon, pailub, ug pag-ampo.



Si Oscar Filipponi ug ang iyang pamilya sa kanunay wala masyad kon kanus-a mamunga ang ilang walay kapoy nga paningkamot. Apan sila nakakat-on nga ang kagugi ug pagmakanunayon sa katapusan magantihan.

aron matagamtam ang mga bunga sa among kahago. Kanunay namong hinumduman nga ang trabaho nga among gibuhat karon maani sa dili madugay.”

Uban sa iyang asawa, si Liliana, ug duha sa ilang anak, sila si Daniel ug María Céleste, si Oscar nagtanom og alfalfa ug namuhi og mga hayop.

“Usahay kami adunay kwarta, ug usahay wala tungod kay amo man kining igasto sa uma,” siya miingon. “Usahay maguba ang among mga makina. Usahay dili mahalina ang among mga hayop bisan andam na kining ibaligya. Apan kon kami mamalandong ug mag-ampo, magpadayon sa pagpailub ug paglaum, human sa usa o duha ka adlaw ang solusyon moabut ra. Adunay tawo nga moabut ug moingon, ‘*Che*,¹ aduna ba kamoy hayop nga ibaligya?’ Mamaayo ra ang mga butang, ug kami magpadayon. Ang pag-uma sa yuta lisud, apan kami natabangan sa among kada adlaw nga mga paningkamot.”

Mga Timaan

Si Daniel miingon nga ang pag-uma sa yuta naghatag kaniya og mga oportunidad matag adlaw sa pagpamalandong sa mga panalangin ug mga hagit gikan sa panglantaw sa ebanghelyo. “Usa ka panalangin ang mag-ampo ngadto sa Ginoo ug magmabinantayon sa impluwensya sa Espiritu nga dili mabalda sa kasaba o musika o advertising,” siya miingon kabahin sa pag-uma.

“Sayon nga mahimong miyembro sa Simbahan kon magpuyo sa lugar sama niini nga gipalibutan sa mga minahal ug sa kinaiyahan,” midugang si Liliana. “Kini nakatabang kanako sa paghinumdom nga kita nagsalig sa Ginoo ug ang tanan nga anaa kanamo nagagikan kaniya. Hapit tanan namong gibuhat dinhi nagpakita og pipila ka mga baruganan sa ebanghelyo. Si Oscar kanunay moabut sa balay nga may pamalandong gikan sa pag-uma o pagbuhi sa mga hayop.”

Kon si Oscar magdaro sa yuta, pananglit, mopili siya og butang nga timaan sama sa kahoy o bato sa layo nga makatabang kaniya sa pagdaro og tul-id. “Dili igsapayan kon may



KON BALANSEHON SA GINOO ANG IYANG LIBRO SA PANALAPI

“Adunay duha ka mag-uuma nga magkasikbit ang ilang

umahan. Ang usa dili gayud mag-uma matag Domingo, ug sa una gisaway siya sa iyang silingan kabahin niana. Siya miingon, ‘Ang imong mga tanom dili ingon ka maayo sama sa akoa. Nganong dili man ka magtrabaho og Domingo?’

“Ang laing mag-uuma miingon, ‘Nan, gusto nakong buhaton unsa ang giingon sa Ginoo. Gusto nakong maangkon ang mga panalangin sa Ginoo.’

“Dayon usa ka adlaw sa Oktubre sila nagbarug sa may koral. Ang [silingan] miingon, ‘Tan-awa lang kini. Tan-awa ang akong umahan. Maayo kaayo, ang tanom tag-as, ang mga bugway niini puno sa trigo, ug ang imong umahan ingon og napasagdan. Wala nimo atimana ang imong umahan sama sa akong pag-atiman sa akoa. Tan-awa ang akong ani kompara sa imoha. Unsa man karon ang imong makasulti sa mga panalangin nga imong gihunahuna nga madawat?’

“Ang mag-uuma nga [nagsunod sa Igpapahulay] naghunahuna sulod sa pipila ka minuto ug miingon, ‘Ang Ginoo dili magbalanse sa iyang libro sa panalapi inigka Oktubre.’”

Presidente Boyd K. Packer, Presidente sa Korum sa Napulog Duha ka mga Apostoles, *Mine Errand from the Lord* (2008), 193.

mga nag-ali sa iyang maagian,” miingon si Liliana. “Dili niya usbon ang iyang agi tungod kay gusto niyang tul-id ang pagdaro.”

Si Oscar midugang, “Kon motan-aw ko sa luyo aron tan-awon ang tudling, mawihi hinoon ko. Busa mag-focus ko sa akong timaan ug magpadayon.”

Sama sa *chacra*, siya miingon, ingon niini usab sa Simbahan. “Aron magpabilin nga tul-id ang dalan sa atong kinabuhi, kinahanglang molantaw kita sa Ginoo, mobasa sa mga kasulatan, ug mosunod sa mga sugo. Kon atong tugutan ang atong kaugalingon nga mabalda, mawala ang atong timaan ug mahimong balikog ang atong dalan.”

Usa ka Espiritwal nga Ani

Ang mga Filipponi manimba sa usa ka branch sa Simbahan diha sa Gaiman. Niining lungsod nga may 6,000 ka mga lumulupyo, nga gipuy-an sa mga milalin nga mga Welsh niadtong mga 1870s, ang mga miyembro sa branch may igong oportunidad sa pagpakita sa ilang maayong ehemplo. “Kinahanglan nga kami mga maayo kutob sa among mahimo kada adlaw kay ang mga tawo nagtan-aw kanamo,” miingon si Liliana.

Ang pagpa-interes sa mga tawo diha sa ebanghelyo mahimong hinay nga proseso. Sama sa pisikal nga balaod sa ting-ani, ang espiritwal nga balaod sa ting-ani nanginahanglan og pailub. Apan tungod sa makanunayong pagsunod sa pamilya sa mga baruganan sa ebanghelyo, ang mga tawo nasayud ug mitahud sa ilang mga sumbanan isip Santos sa Ulahing mga Adlaw.

Sa sayo pa, sa dihang si Oscar nagtrabaho sa gobyerno, kanunay niyang balibaran ang mga tanyag sa pag-inom og kape, tsa, ug alkohol. “Human sa pipila ka tuig,” siya miingon, “ang mga kauban sa trabaho nahimong matugtanon ug mosuporta ug mangutana, ‘Unsa nga soda ang imong gusto?’ Usahay sila gani mainteresado sa Simbahan. Kana mao ang ani.”

Ang dapit asa mabungahon ang espiritwal nga pag-ani sa pagkat-on ug pagsunod sa mga baruganan sa ebanghelyo anaa mismo sa pamilya.

Ang ani miabut pinaagi sa mga panalangin sa pagserbisyo ni Oscar isip patriarch sa Trelew Argentina North Stake, sa pagserbisyo ni Liliana isip presidente sa Relief Society sa branch, ug sa dugang nga pagserbisyo sa uban pang mga calling nga gituman sa mga sakop sa pamilya sa mga katuigan.

Ang ani miabut gikan sa pagbalaan sa adlaw nga Igpapahulay ug pinaagi sa pagsunod sa balaod sa ikapulog. “Ang mga bintana sa langit naabli gayud—kon dili



diha-diha dayon, nan pinaagi sa proseso sa pagpadayon sa pagkamasulundon,” miingon si Oscar.

Ang ani miabut pinaagi sa paggradwar sa tanang mga bata sa Filipponi gikan sa high school ug ang tanang upat ka anak nga lalaki nakaserbisyo og full-time misyon. Ang ilang edukasyon ug misyonaryo nga pagserbisyo nagdala kanila og mga oportunidad sa pagpangempleyo ug pagpangulo nga dili unta nila masinati.

Ang ani miabut gikan sa mga pangutana nga nadawat ni María Céleste gikan sa iyang mga kaedad kinsa gustong masayud sa pag-misyon sa iyang mga igsoong lalaki, sa iyang tinuohan, ug nganong maglikay siya og party nga magsugod gabii na kaayo sa Sabado.

Ug ang ani miabut gikan sa mga hunghong ug kalmang impluwensya sa Espiritu Santo, nga nakatabang sa pamilya nga malikayan ang trahedyang usa ka gabii sa dihang sila nagtuo nga gikawatan ang ilang balay. Si Daniel mibangon sa dihang nakadungog siya og tingog ug nangandam sa pagpanalipod sa ilang balay, apan ang ilang gituohan nga kawatan ilaha diayng silingan nga nangayo og panabang sa dihang ang iyang sakyanan naguba.

“Nakaamgo ko nga gipakalma ko sa Espiritu aron among masulbad ang sitwasyon nga dili ra magpataka,” miingon si Daniel. “Pagkahuman nag-ampo ug nagpasalamat kami sa Langitnong Amahan nga walay dautang nahitabo.”

Kon matinud-anon natong ihalad ang atong kaugalingon sa Dios, ang mga sakop sa pamilyang Filipponi miingon, Siya nagpanalangin kanamo sa among mga panginahanglan ug kami nahimong mga instrumento sa Iyang mga kamot. Kini usa ka proseso nga nanginahanglan og pagkamakanunayon, pailub, ug pag-ampo. Kini usab nagkinahanglan og hugot nga pagtuo ug trabaho. Ug sumala sa panahon sa Ginoo, ang ting-ani moabut. ■

MUBO NGA SULAT

1. Usa ka ekspresyon nga sagad gigamit sa Argentina nga nagpasabut og “higala” o “kauban.”



Sa unang gabii balik sa trabaho, giablihan nako ang akong e-mail. Sa akong inbox mao ang usa ka mensahe gikan ni Brady. Iya kining gipadala Martes sa buntag, sa wala pa lang gyud ang pag-atake.

SIYA MIHATAG KANAKO OG KALINAW

Ang akong igsoon nga si Brady Ausa ka presidential management intern nga nagtrabaho sa naval intelligence sa US Pentagon sa dihang nahitabo ang pag-atake niadtong Septyembre 11, 2001. Nagtrabaho ko sa Idaho, USA, nianang higayona, ug sa dihang akong nakita ang balita nianang buntag sa nahitabo, gitawagan nako ang akong amo aron mananghid niya nga dili motrabaho sulod sa pipila ka adlaw.

Pipila ka mga sakop sa akong pamilya nagtapok sa Washington, D.C., sa usa ka hotel ballroom nga gipili sa mga opisyaes sa gobyerno isip kwarto sa pagpahibalo [briefing room], diin ilang ma-update ang mga pamilya sa nagpadayong mga paningkamot sa pagsalbar. Kami nagpaabut kada adlaw kon si Brady usa ba sa mga biktima. Ang pagbati niana nga palibut mao ang tumang kasubo ug pagkawala sa paglaum. Apan ang among pamilya naghiusa ug nagampo nga bisan unsa pa ang mahitabo, dili kami mawad-an og hugot nga pagtuo.

Hapit usa ka semana human sa atake, niadtong Septyembre 17, kami

nakadawat og pahibalo nga nagkompirma nga si Brady patay na.

Wala ko masayud kon nangutana ba ko, “Nganong ako?” Apan sigurado kong nakapangutana, “Nganong siya?” Sukad pa sa akong pagkabata, akong gihigugma, gidayeg, ug gustong mahimong sama ni Brady. Naghuhuna usab ko, “Nganong karon?” Sulod sa pipila ka semana, si Brady nagplano nga mobiyahe ngadto sa Idaho aron makauban ang pamilya. Nakaeskediyul siya nga mobiyahe sa Huwebes, Septyembre 13, duha na lang ka adlaw sa dihang siya mamatay.

Sa unang gabii sa akong pagbalik og trabaho human sa akong pag-adto sa Idaho, giablihan nako ang akong professional e-mail account, nga wala pa nako maablihi sukad Septyembre 10. Sa akong inbox mao ang usa ka mensahe gikan ni Brady. Iya kining gipadala Martes sa buntag, sa wala pa lang gyud ang pag-atake. Dinhi siya naghisgut sa amo untang panag-abot ug sa tanang makalingaw nga mga panghitabo nga among giplano. Sa dihang siya mi-signed off, “Kalinaw.”

Dili ingon ani tapuson ni Brady

ang iyang mga e-mail, apan ako kining gihunahuna isip mabinationg kalooy sa Ginoo nga iya kining gibuhat. Sa akong hunahuna wala gyud masayud si Brady unsa ang mahitabo, apan naganahan kaayo ko nga ang iyang katapusang mga pulong—iyang katapusang pulong—alang kanako mao ang *kalinaw*.

Bisan karon, sobra na sa usa ka dekada ang milabay, panagsa akong basahon og usab kana nga e-mail. Matag higayon nga ako kining buhaton, mapahinumduman ko nga atong makaplagan ang kalinaw nga gisaad sa Manluluwas pinaagi sa ebanghelyo: “Kaninyo ibilin ko ang kalinaw, kaninyo ihatag ko ang akong kalinaw: hatagan ko kamo niini dili sama sa hinatagan sa kalibutan. Kinahanglan dili magkaguol ang inyong kasingkasing, ni magtalaw” (Juan 14:27).

Siyempre mingawon gihapon ko ni Brady, apan tungod sa ebanghelyo, wala mawala ang akong hugot nga pagtuo ngadto niini nga pagsulay. Pinaagi sa tabang sa Manluluwas, nakapadayon ko uban sa paglaum ug kalinaw. ■

Carson Howell, Utah, USA

PANGUTAN-A ANG MORMON

Tanang mga batan-ong lalaki nga nag-edad og sobra sa 18 anyos sa Finland gikinahanglan nga moserbisyo sa military sulod sa 6 hangtud 12 ka bulan. Sa dihang akong gisugdan ang gikinahanglang pagserbisyo, akong nakita nga ang mga opinyon ug kinaiya sa daghang kauban nakong mga army nasumpaki sa akong mga baruganan. Isip resulta, nagbuhat ko og mga lakang nga magpabiling maduol sa Espiritu, nag-ampo dili moubos og kaduha sa usa ka adlaw ug nagbasa sa mga kasulatan.

Sa sinugdanan gikulbaan ko kay wala masayud unsay reaksyon sa akong mga kauban, apan ingon og wala ra sila manginlabut, busa relaks lang ko. Pagkataud-taud ang akong mga bunk mates nangutana unsa ang akong gibasa. “Ang Basahon ni Mormon,” direktang giingnan ko sila. Ang sunod nilang pangutana, siyempre, kon ako ba usa ka Santos sa Ulahing mga Adlaw. Giingnan ko sila nga oo, ug pagkataud-taud, wala na sila maghisgut niini.

Miabut ang panahon nga pipila sa akong mga kauban sa army nangutana kabahin sa Basahon ni Mormon—asa kini gikan, ang sulod, ug daghan pa. Sa wala madugay ang ilang pangutana kabahin na sa katuyoan sa kinabuhi ngadto sa mga baruganan sa Simbahan. Ang akong tinuohan natural na nga kabahin sa among panaghisgutan, ug kini mahisgutan hapit sa bisan unsang sitwasyon.

Usa ka kauban sa duol nga bunk mihangyo kon makabasa ba siya sa akong Basahon ni Mormon. Siyempre miingon ko og oo. Sa laing higayon, human ang usa ka kauban sa kwarto miuli gikan sa pagtambong og haya sa usa ka higala, siya miingon kanako nga sa haya siya daghan og mga pangutana kabahin sa kinabuhi ug sa mga katuyoan niini. Nangutana siya nako kon unsa ang gituohan

sa Simbahan kabahin niadtong mga butanga. Taas ang among panaghisgut kabahin sa katuyoan sa kinabuhi, Pag-ula, Paglalang, ug uban pang hisgutan sa ebanghelyo. Pagkahuman, laing mga kauban sa kwarto nainteresado sa mga pagtulun-an ug mga sumbanan sa Simbahan.

Atol sa nahabiling panahon sa among panag-uban, daghan kami og mga panaghisgut nga ingon og kanunay nga mosangput ngadto sa mga pagtulun-an sa Simbahan. Ang akong mga kauban sa kwarto mitawag niining mga panaghisgut nga “Pangutan-a ang Mormon” nga mga sesyon. Sa wala madugay, sa dihang migradwar na kami sa among pagbansay, usa ka kauban sa kwarto miingon kanako nga mohunong na siya sa pagpamalikas.


Sa akong tibuok panahon sa militar, nakamatikod ko nga kon mas mosulti ko sa akong pagkamiyembro sa Simbahan ug kon mas matunud-anong kong mosunod sa mga pagtulun-an sa ebanghelyo, ang uban mas mosulti ngari kanako ug mas daghan ako og oportunidad sa pagpakigbahin sa ebanghelyo.

Mapasalamaton ko sa mga panalangin ug mga oportunidad nga nakahisgut ko kabahin sa ebanghelyo atol sa akong pagserbisyo sa army. Mopamatuod ko nga kon kita isug sa pagbarug sa atong mga mithi, kita mapanalanginan og mga oportunidad sa paghimo sa misyonaryo nga buhat. Ug kon atong tugutan ang kahayag sa ebanghelyo nga mosanag sa atong kinabuhi, atong maproteksyonan ang atong kaugalingon gikan sa kangitngit ug makaangkon og positibong impluwensya sa atong palibut. ■

Kari Koponen, Uusimaa, Finland



Usa ka kauban sa duol nga bunk mihangyo kon makabasa ba siya sa akong Basahon ni Mormon. Siyempre miingon ko og oo.



Samtang namulong ko, nabati nako ang Espiritu nga mipuno kanako sa kalinaw ug gahum. Nagpamatuod ko sa dakong gugma sa Dios alang sa Iyang mga anak ug sa ilang balaanong kinaiya.

mga pulong ni Propeta Joseph Smith: “Kita magmalipayon sa pagbuhat sa tanan nga mga butang ubos sa atong gahum; ug unya kita magmalinawon, uban ang labing dako nga kasiguroan, nga makasaksi sa kaluwasan sa Dios, ug sa iyang mga bukton nga ipadayag” (D&P 123:17).

Samtang namulong ko, nabati nako ang Espiritu nga mipuno kanako sa kalinaw ug gahum. Mipamatuod ko sa dakong gugma sa Dios alang sa Iyang mga anak ug sa ilang balaanong kinaiya, talagsaong potensyal, ug mahangturong bili. Mitudlo ko nga ang mga sugo sa Dios nagpakita sa Iyang gugma tungod kay kini naggiya sa dalan paingon sa labing dako nga kalipay. Ug mideklarar ko nga si Jesukristo makaayo sa mga samad tungod sa kinaiyahan ug tungod sa ubang mga tawo.

Sa dihang nakamatikod nako, milapas nako sa 30 minutos nga gigahin alang kanako. Hinay-hinay kong mipalayo sa podium, gipundok ang akong mga papel, ug mihangad. Usa ka kalma nga hilum ang mabati sa kwarto. Pipila sa mga tawo nagpahiyum ug ang uban naghilak. Ang mga magtutudlo nga may sukwahi nga panglantaw mipasalamat kanako sa akong kaisug ug kombiksyon. Usa ka kaubang magtutudlo misulti nga siya natandog sa usa ka “espesyal nga pagbati” samtang namulong ko. Ang uban miingon kanako nga wala pa sila makadungog og ingon nga sensitibo ug may pagtahud nga pagkapamulong sa ingon nga mga pagtuo ug ang akong mga pulong nakatabang kanila sa pagkakita nga ang kurikulum sa eskwelahan kinahanglang usabon.

Ang Agalon, kinsa mipakalma sa nagkapintas nga balod pinaagi sa pagsugo, “Hilum, hunong” (Marcos 4:39) mibuhar na usab niini—niining higayon alang kanako!

Pinaagi niini nga kasinatian, nakakat-on ko nga kita wala maginusara sa pagbarug sa kamatuoran. Ang Ginoo anaa kanunay sa duol. Sama sa Iyang gisaad, “Ako molakaw

IYA BANG KALMAHON ANG AKONG MGA UNOS?

I sip magtutudlo sa ikalima nga lang-ang sa usa ka pribado nga eskwelahan sa Massachusetts, USA, nakig-miting ako sa mga administrador aron sa paghisgut kabahin sa school’s diversity curriculum, nga supak gayud sa mga baruganan sa “Ang Pamilya: Usa ka Pamahayag sa Kalibutan.” Ang akong mga paningkamot sa pagbarug sa kamatuoran kabahin sa kaminyoon ug pamilya ug sa pagpasiguda nga walay pagpihig, pagtahud, ug pagsabut, hinoon, miresulta sa usa ka unos nga walay pagkasinabtanay, pagbiay-biay, ug pagpanglutos.

Usahay mibati ko nga sama sa mga Apostoles nga naglawig sa giunos nga Dagat sa Galilea samtang natulog si Jesus. Mibati ko nga akong pagtuo, sama sa ilaha, misugod sa pagkahuyang, ug ako usab nakapangutana, “Wala ka ba lang magpakabana

nga malumos [ko]?” (Marcos 4:38). Nagtuo ko nga si Jesus tinuoray nga mipakalma sa kusog kaayong hangin ug balod kaniadto, apan samtang nagkalisud ang akong mga pagsulay, naglisud ko sa pagsalig nga Iyang pakalmahon ang akong mga unos.

Usa ka adlaw usa ka administrador sa eskwelahan mihangyo kanako sa pag-esplikar unsa ang akong mga problema sa tanang magtutudlo ug mga kawani sa usa ka diversity-training meeting. Samtang nangan-dam ko niini nga presentasyon, ang akong personal nga mga pag-ampo, pagtuon sa kasulatan, ug pag-adto sa templo nahimong mas kinasingkasing, ug mibati ko sa Espiritu nga naggiya kanako unsa ang isulti.

Sa dihang miabut ang akong panahon sa pagpamulong ngadto sa akong mga kaubanan, misalig ko sa

diha sa inyong atubangan. Ako anaa sa inyong tuo nga kamot ug sa inyong walà, ug ang akong Espiritu mahimo nga anaa sa inyong mga kasingkasing, ug ang akong mga anghel anaa libut kaninyo, aron sa pagtabang kaninyo” (D&P 84:88).

Uban sa akong tibuok kalag, ako mopamatuod nga Siya Dios sa kaluwasan [deliverance]. Nasayud ko niini nga kamatuoran tungod kay Iya kong giluwat. Iyang gipakalma ang akong mga unos. ■

Nick Gentile, Utah, USA

NADAWAT NAKO ANG AKONG TUBAG GUMIKAN SA KOMPERENSYA

Niadtong 2006 mieskwela ko og anthropology sa usa ka kolehiyo sa Katoliko. Ang among magtutudlo mi-assign kanamo sa pagsiksik og partikular nga tinuohan ug ipresentar kini sa tibuok klase. Gipili nako nga mohimo og presentasyon kabahin sa Ang Simbahan ni Jesukristo sa mga Santos sa Ulahing mga Adlaw—hinoon, miyembro nako sulod sa 21 ka tuig. Nasayud ko nga kini usa ka talagsaon ug nindot nga oportunidad sa pagpakigbahin unsa ang akong gituohan ngadto sa 40 ka klase ug mga higala.

Sa duha ka bulan nakong pagpangandam sa akong presentasyon, nanlimbasug ko sa pagpangita og yanong paagi sa pagpresentar sa mga doktrina nga akong gimanggad nga masabtan sa akong mga kaklase. Dili ko sigurado unsa nga mga punto ang akong himoon o unsaon nako sa paghimo niini. Sa dihang usa na lang ka semana sa dili pa ko mopresentar, wala gihapon ko masayud unsa ang buhaton. Sa tumang kaguol, nag-ampo ug nangayo ko sa Ginoo og tabang.

Gitubag ko pinaagi sa kinatibukang komperensya, nga gipahigayon nianang semanaha. Atol sa Abril 2006 nga komperensya, si Presidente James E. Faust (1920–2007), Ikaduhang Magtatambag sa Unang Kapangulohan, namulong nga giulohan og “Ang Pagpahiuli sa Tanang mga Butang.”¹ Nabati nako ang Espiritu Santo nga mimatuod sa mga kamatuoran nga gipakigbahin ni Presidente Faust—ug sa paagi sa iyang pagpakigbahin niini—usa ka sumbanan nga akong masunod sa paghimo sa akong presentasyon.

Gi-download nako ang kopya sa iyang pakigpulong gikan sa Internet paghuman sa komperensya ug gigamit kini isip basihan sa

Tungod sa mga pangutana sa akong magtutudlo ug mga kaklase, ang akong presentasyon kabahin sa Simbahan miabut og 40 minutos.

pagpangandam og slideshow nga pasundayag, nga akong ipakita sunod semana. Gigahinan ko og 20 minutos, apan tungod sa mga pangutana sa akong magtutudlo ug mga kaklase, ang presentasyon milungtad og 40 minutos—ang tibuok panahon sa klase.

Sa dihang nahuman ko, ang among magtutudlo miingon nga wala pa sa iyang mga estudyante ang nakahimo og ingon ka nindot nga pasundayag. Iya kong gihatagan og taas nga grado ug miingon kanako nga ang bugtong rason nganong wala nako makuha ang perpekto nga grado tungod kay ingon og may gidapigan ko sumala sa tema.

Sa wala madugay gipakigbahin nako sa akong magtutudlo ang web page sa *Liahona*, asa niya makita ang pakigpulong ni Presidente Faust ug uban pa nga makatabang kaniya. Gihatagan usab nako siya og kopya sa Basahon ni Mormon ug mihangyo kaniya sa pagbasa niini, nagdapit kaniya nga makig-istorya kanako inigkahuman.

Mapasalamaton ko nga nasayud nga ang presentasyon nakaimpluwensya sa pipila ka mga estudyante. Sa tibuok nabilin nga tuig, nakita nako ang ebidensya sa kalainan nga nahimo niini sa ilang kinabuhi. Gani usa kanila midawat sa mga misyonaryo sa ilang balay, nga naghatag kanamo og dakong oportunidad sa pagpadayon sa among panag-istoryahanay kabahin sa ebanghelyo ni Jesukristo.

Mapasalamaton ko sa oportunidad nga nakapakigbahin ko sa akong mga pagtuo ngadto sa akong mga kaklase. Apan mas importante, mapasalamaton ko nga akong nahibaloan nga ang Ginoo motubag sa atong kinasingkasing nga mga pag-ampo pinaagi sa mga pulong sa moderno nga mga propeta ug apostoles. ■

Sara Magnussen Fortes, São Paulo, Brazil

MUBO NGA SULAT

1. Tan-awa sa James E. Faust, “Ang Pagpahiuli sa Tanan nga mga Butang,” *Liahona*, Mayo 2006, 61–62, 67–68.





Ni Adrián Ochoa

Ikaduhang Magtatambag sa Kinatibuk-ang Kapangulohan sa Young Men

KAMO Mao ang KAHAYAG alang sa KALIBUTAN

Kanunay ang mga returned missionary mosulti nga ang ilang pagserbisyo sa misyon mao ang pinakanindot nga mga tuig sa ilang kinabuhi. Nganong ingon niini man?

Tingali sa kalipay nga makita nga may laing kalag nga miduol sa Manluluwas (tan-awa sa D&P 18:15). Tingali tungod sa kasuod nga ilang mabati uban sa mga investigator, kinabig, miyembro, kompanyon, ug presidente sa misyon. Sa akong hunahuna kining mga butanga kabahin niini, apan sa akong hunahuna kini may kalabutan usab sa kahayag sa Manluluwas nga ilang gibati—ug sa kahayag nga ilang gipakigbahin pinaagi sa pagserbisyo ug pagpamatuod.

Kita nasayud nga ang Manluluwas mipaila sa Iyang Kaugalingon isip Kahayag sa Kalibutan (tan-awa sa Juan 9:5; 12:46). Apan sa Wali sa Bukid, Siya mipahayag sa samang butang kabahin sa Iyang mga sumusunod:

“Kamo mao ang kahayag alang sa kalibutan. Ang siyudad nga mahimutang sa ibabaw sa bungtod dili gayud mahisalipdan.

“Ang mga tawo dili usab magdagkot og suga aron ibutang kini sa ilalum sa gantangan, kondili sa ibabaw sa tongtonganan; ug kini magaiwag kanilang tanan nga anaa sa sulod sa balay.

“Pasigaa ninyo ang inyong kahayag sa atubangan sa mga tawo, aron makita nila ang inyong mga maayong

buhat, ug dayegon nila ang inyong Amahan nga anaa sa langit.” (Mateo 5:14–16).

Ang pagpakigbahin sa atong kahayag—kana, pagpakita sa kahayag sa Manluluwas (tan-awa sa 3 Nephi 18:24)—usa ka butang nga mahimo nato sa atong tibuok kinabuhi, ug kini usa ka butang nga atong kinahanglang sugdan samtang kita bata pa. Samtang nagbuhat kita sa pormal nga buluhaton sa misyonaryo ug sa tibuok kinabuhi nga buhat sa misyonaryo, kita makalantaw sa tulo ka tawo, nga sa akong opinyon, labing maayong ehemplo niining buhat: Si Alma, si Propeta Joseph Smith, ug ang Manluluwas. Silang tulo nakaimpluwensya pag-ayo sa akong pagsabut sa importansya sa misyonaryo nga buhat—pagpakita sa kahayag sa Manluluwas ngadto sa kalibutan.

Alma: Pagmapainubsanon

Ang mga pagtulun-an ni Alma mahinungdanon kaayo sa akong tinguha sa pagserbisyo og misyon. Bisan tuod ang akong apohang babaye misiguro nga nabunyagan ko sa dihang otso anyos ko, panagsa ra ko nga mosimba sa dihang batan-on pa ko. Sa dihang ang mga misyonaryo miabut sa akong kinabuhi sa dihang young adult nako ug misugod sa paghunahuna kabahin sa Simbahan, misugod ko sa pagtuon sa kasulatan. Ang diskusyon ni Alma kabahin sa napugos

sa pagpaubos itandi sa nagpili nga magmapainubsanon nakapainteres kanako (tan-awa sa Alma 32:13–15). Mibati ko nga dili angay tungod sa akong mga kahayang, apan gi-hunahuna ko kini pag-ayo—ang paghukom nga mag-misyon nangi-nahanglan og dakong kausaban. Ako aduna nay maayong panginabuhian ug kaugalingong negosyo, ug gusto na nakong minyoan ang akong hini-gugma (nga akong asawa karon). Ako ba ning masakripisyo tanan alang sa pagserbisyo sa Ginoo?

Miadto ko sa usa ka pribadong lugar ug migahin og panahon—tinuod nga panahon—sa pag-ampo ug pagpangamuyo sa akong Langitnong Amahan. Sa pagpaubos sa akong kaugalingon, akong nahibaloan nga gusto sa Langitnong Amahan nga moserbisyo ko. Mihukom ko nga sundon ang Iyang pulong, ug sa pagbuhat niini, akong nakaplagan ang kamatuoran sa saad ni Alma: “Siya nga tinuod nga nagpaubos sa iyang kaugalingon, ug naghinulsol sa iyang mga sala, ug molahutay hangtud sa katapusan, ang mao pagapanalanginan—oo, labaw nga mapanalanginan kay kanila kinsa napugos sa pagpaubos” (Alma 32:15).

Bisan tuod sobra nako og 26 anyos, miadto ko sa akong bishop, kinsa mitabang kanako sa pagpangandam. Misumiter ko sa akong papeles sa misyon ug nagpaabut og pipila ka bulan. Sa katapusan, nakadawat ko



Samtang kita nagbuhat sa misyonaryo nga buhat, kita makakuha og inspirasyon gikan sa mga ehemplo sa Manluluwas, ni Alma, ug ni Joseph Smith.

og usa ka tawag nga nagsulti nga dili ko mahimong moserbisyo og full-time misyon apan makaserbisyo ko sa public communication, nga mao ang natad sa akong trabaho. Makapakulbahinam kadto nga panahon. Gibansay ko ug sa wala madugay miapil sa mga media discussions pagkahuman nga ang Simbahan didto sa Mexico opisyal nga giila sa gobyerno sa Mexico. Gitabangan nako ang mga stake sa pagbansay sa ilang mga public affairs specialist ug nakaestablisar og relasyon sa mga opisyaes sa gobyerno. Kini nga oportunidad sa pagserbisyo nakapanalangin nako sa daghang mga paagi kaysa akong mahulagway ug sa mga paagi nga wala nako damha. Kini nakaapekto sa daghang mga aspeto sa akong kinabuhi sa hangtud.

Ang inyong pag-misyon mao ang bugtong pinakaimportante nga butang sa pag-andam kaninyo alang sa inyong tibuok kinabuhi. Si Presidente Gordon B. Hinckley (1910–2008) misaad sa mga umaabot nga mga misyonaryo: “Ang panahon nga inyong gigahin sa natad sa misyon, kon kadtong mga katuigan gigahin sa mapahinungurong pagserbisyo, mas mabungahon kaysa bisan unsang duha ka tuig sa inyong kinabuhi. . . . Kon magmisyon mo sa matinud-anong paagi ug maayo, kamo mahimong mas maayo nga bana, mas maayo nga amahan, mas maayo nga estudyante,




DAGHANG MGA OPORTUNIDAD SA PAGSERBISYO

Ang pormal nga serbisyo sa misyon dili lang limitado niadtong nakaserbisyo og misyon sa pagproselyte. Daghang mga young adult ang dili makahimo nga magproselyte tungod sa kakulangan sa pisikal, mental, o emosyonal. Kini nga mga batan-ong lalaki ug babaye daghan og mahimong kaayohan sa mga organisasyon sa Simbahan sa tibuok kalibutan isip mga Church-service missionary.

Ang mga Church-service missionary gikinahanglan sa tibuok kalibutan aron sa pagserbisyo sa mga family history center, mga bishops' storehouse, canneries, employment centers, community service organizations, media positions, ug sa uban pang daghang mga buluhaton sa Simbahan. Ang mga lalaki ug babaye nga naa na sa edad sa pag-misyon kinsa dili maka-proselyte og misyon makigtambag sa mga ginikanan ug lider sa pagkonsiderar sa pagpili og service mission. Samtang ang mga service mission managlahi sa buluhaton ug gidugayan nga magdepende sa abilidad sa misyonaryo, kini tinuod nga buhat, tinuod nga pagserbisyo, ug tinuod nga sakripisyo nga makahimo og kalainan sa pagtukod sa gingharian sa Dios dinhi sa yuta.

Alang sa dugang impormasyon sa mga Church-service missions, palihug bisitaha ang www.lds.org/service/missionary-service.



mas maayo nga trabahante.”¹ Kon kamo anaa pa sa edad nga mahimong mag-misyon, pangandam na sa pagserbisyo karon. Ang mga panalangin nga inyong madawat mas mosubra pa kaysa bisan unsa pang sakripisyo nga inyong gihimo.

Nasayud ko nga adunay mga hagit samtang kamo mamalandong sa pagserbisyo og misyon. Buhaton kutob sa mahimo sa kaaway aron mapugngan ang paglambo sa buhat sa Ginoo. Kon kamo nagduhaduha sa pagserbisyo og misyon, dapiton

ko kamo sa pagmapainubsanon ug dayon moluhod ug mangamuyo sa Langitnong Amahan. Iyang gipadayag ang Iyang kabubut-on ngari kanako, ug nasayud ko nga Iyang buhaton usab alang kaninyo.

Joseph Smith: Pag-angkon og Mahangturong Panglantaw

Gikan ni Joseph Smith nakakat-on ko nga ang pag-focus sa mahangturong panglantaw makapalambo sa inyong abilidad isip sulugoon sa Ginoo. Sa una, naghunahuna ko kon giunsa niya paglahutay sa tanan niyang nagagian—ilabi na sa mga pagsulay ug pagpanggukod. Apan akong nasabtan nga tungod kay nakakita si Joseph lapas pa sa tabil, siya nasayud nga kining mortal nga kinabuhi tipik lang sa atong mahangturong panaw. Naghunahuna ko kon unsa ang mahitabo kanako

kon nakasabut ko sa unsay iyang nasabtan, ug sa pagpamalandong niini, akong nahibaloan nga kon kita mag-focus sa pagkakaran, ang atong panglantaw limitado. Kon kita adunay mahangturong panglantaw, atong masabtan kon unsa ka importante nga kita mapasaligon nga motabang sa uban, pagtabang sa uban, ug sa pagpamatuod sa mga kamatuoran nga atong nasayran.

Kon kita mag-focus, sama ni Joseph, sa mga butang diha sa mahangturong panglantaw, unsa kaha kita kaandam ug kahinam sa pagpakigbahin sa ebanghelyo matag adlaw sa atong kinabuhi? Ang pagpakigbahin sa atong kahayag—pagpakita sa kahayag sa Manluluwas—dili kinahanglang limitado sa pormal nga mga buluhaton sa misyonaryo. Kon kamo bukas ug matuohan, kamo makapakigbahin sa Kahayag ni Kristo niadtong nagpalibut kaninyo, nagpakigbahin kon si kinsa kamo isip miyembro sa Simbahan ug unsa ang inyong gituohan. Samtang kamo magbalhin-balhin og kapuyan sa tibuok ninyong kinabuhi ug makig-uban sa laing-laing mga tawo, moawhag ko kaninyo nga ila-ilahon ninyo ang inyong mga silingan, mga kaklase, ug katrabaho sa ubang mga tinuohan. Sunda ang instruksyon ni Elder M. Russell Ballard sa pagpakigbahin sa ebanghelyo sa internet, pinaagi sa mga website sa social media, blogs, ug video-sharing nga mga site.²

Samtang kita makatudlo sa uban kabahin sa ebanghelyo pinaagi sa pormal nga diskusyon, usahay ang gikinahanglan lang sa usa ka tawo aron mohangup sa ebanghelyo mao ang matarung nga ehemplo ug kaandam sa pagpakigbahin sa inyong pagpamatuod pinaagi sa inyong paagi sa pagpakabuhi. Kon kamo nagpakabuhi nga takus sa Espiritu ug ipakita ang inyong kahayag, dayon ang mga tawo “makakita sa inyong maayong

mga buhat, ug dayegon nila ang inyong Amahan nga anaa sa langit” (Mateo 5:16).

Manluluwas: Paghunahuna og Maayo sa Uban

Ug sa katapusan, ang Manluluwas, kinsa atong ehemplo sa tanang mga butang, nagtudlo kanako nga dili kaayo maabalaka sa akong kaugalingon apan sa paghunahuna



og maayo sa kaluwasan sa uban. Ang iyang tibuok kinabuhi kabahin sa uban. Usahay sa pagkonsiderar sa pagpakigbahin sa ebanghelyo ngadto sa uban nga lahi og mga tinuohan, kita mahadlok kon unsa ang ilang gihunahuna kanato o unsaon nila pagtubag. Sa paghunahuna sa pagserbisyo og full-time misyon, kita kanunay nabalaka kaayo sa sweldo o pag-eskwela o sa mga relasyon—kini maayo ug importanting mga butang apan kining mga butanga makapaabut. Ang Manluluwas Mismo “walay dapit nga kapahulayan sa iyang ulo” (Mateo 8:20). Iyang gitudlo ngadto sa Iyang mga sumusunod nga “unahon pagpangita . . . ang gingharian gikan sa Dios,” ug “kining tanang mga butanga” idugang ra kanila (Mateo 6:33).

Mao usab kini alang kanato. Samtang kita magtinguha sa pagsunod ug sa pagpakita sa Kahayag sa Kalibutan, ang mga panalangin moabut sa kalibutan ug sa katapusan ngari kanato isip mga indibidwal. Unta dili nato taguan ang kahayag apan sa pagpadan-ag niini sa atong tibuok kinabuhi. ■

MUBO NGA MGA SULAT

1. Gordon B. Hinckley, “Of Missions, Temples, and Stewardship,” *Ensign*, Nob. 1995, 52.
2. Tan-awa sa M. Russell Ballard, “Pagpaambit sa Ebanghelyo Gamit ang Internet,” *Liahona*, Hunyo 2008, B2.

PAGTUBAG SA TAWAG GIKAN SA PROPETA

Kon ang pangbukas nga mga sesyon sa kinatibuk-ang komperensya adunay indikasyon sa hunahuna sa propeta, klaro nga si Presidente Thomas S. Monson naghunahuna sa buhat sa misyonaryo.

Niadtong Abril 2011 siya mireport sa gidaghanon sa mga misyonaryo ug mga misyon sa tibuok kalibutan ug dayon miingon: “Ang misyonaryo nga buhat mao ang kinabuhi sa gingharian. Mahimo ba nga ako mosugyot nga kon kamo makahimo, tingali inyong ikonsiderar ang pagtampo ngadto sa General Missionary Fund sa Simbahan.”¹

Niadtong Oktubre 2010 siya miingon:

“Akong balikon ang dugay nang gitudlo sa mga propeta—nga ang matag takus, makahimo nga batan-ong mga lalaki kinahanglan nga mangandam sa pagserbisyo og misyon. Ang misyonaryo nga pagserbisyo usa ka katungdanan sa priesthood—usa ka obligasyon nga gipaabut sa Ginoo kanato kinsa gihatagan og hilabihan ka daghan. Batan-ong mga lalaki, gi-awhag ko kamo sa pagpangandam alang sa pagserbisyo isip misyonaryo. Ipabilin ang inyong kaugalingon nga limpyo ug putli ug takus nga morepresentar sa Ginoo. Imintinar ang inyong kahimsug ug kalig-on. Pagtuon sa mga kasulatan. Kon kini anaa, apil sa seminary o institute. Himoa nga kamo mapamilyar sa handbook sa misyonaryo nga *Isang-yaw ang Akong Ebanghelyo*.

“Usa ka tambag alang kaninyo batan-ong mga sister: ingon nga kamo wala sa samang responsibilidad sa priesthood sama sa batan-ong mga lalaki sa pagserbisyo isip full-time nga mga misyonaryo, makahimo usab kamo og bililhong kontribusyon isip mga misyonaryo, ug among gihangup ang inyong pagserbisyo.”²

Ug niadtong Oktubre 2009 siya miingon: “Ako naghango nga ang inyong hugot nga pagtuo ug mga pag-ampo magpadayon nga ihalad alang niadtong mga dapit diin ang atong impluwensya gilimitahan ug diin kita wala tuguti sa gawas-nong pagpakigbahin sa ebanghelyo niining higayon. Mga milagro mahitabo samtang atong gibuhat kini.”³

MUBO NGA MGA SULAT

1. Thomas S. Monson, “Komperensya na Usab,” *Liahona*, Mayo 2011, 6.
2. Thomas S. Monson, “Samtang Kita Nagkatigum Pag-usab,” *Liahona*, Nob. 2010, 5–6.
3. Thomas S. Monson, “Welcome sa Komperensya,” *Liahona*, Nob. 2009, 6.

Mubo ug **Direkta**

**Kon ang mga tawo mangutana
nganong magpadala
man ta og mga
misyonaryo ngadto
sa Kristiyanong
mga nasud,
unsay akong itubag?**

Alang sa daghang tawo nga dili mga miyembro sa atong Simbahan, “ang misyonaryo nga buhat” nagpasabut sa pag-adto sa layo nga dapit diin, sama pa-nanglit, ang dili mga Kristiyano tudloan mahitungod sa Kristiyanismo ug diin ang tawhanong pagtabang mapahigayon. Mao nga kon mahibaloan nila nga ang Simbahan naghimo og “misyonaryo nga buhat” diha gayud sa ilang dapit, matingala sila kon ngano.

Ang mensahe nga ipakigbahin sa atong mga misyonaryo para sa tibuok kalibutan, mao nga ipadala nato sila ngadto sa tibuok kalibutan. Nagtuo kita nga ang kahingpitan sa ebanghelyo ni Jesukristo napahiuli na, lakip ang Simbahan ni Kristo ug awtoridad sa priesthood nga gikinahanglan aron mapahigayon ang mga ordinansa, sama sa bunyag. Niini lamang nga Simbahan napahiuli ang kahingpitan sa ebanghelyo. Tungod kay ang tanang katawhan kinahanglang makadungog sa mensahe, lakip sa mga dapit diin dugay nang naa ang tradisyon sa Kristiyanismo, mo-padala kita og mga misyonaryo sa tanang katawhan. ■



Kanus-a man dili tukma ang pagpakigbahin sa espirituhanong mga kasinatian?

Ang pagpakigbahin sa espirituhanon natong mga kasinatian ngadto sa andam nga maminaw niini usa ka talagsaong paagi sa pagpalig-on sa pagtuo ug pagpamatuod sa uban. Kon pananglit mibati ka nga giaghat sa pagsulti kabahin sa usa ka tubag sa pag-ampo, mas mohugot ang pagtuo sa uban nga matubag ang ilang mga pag-ampo. Apan kon ikaw adunay talagsa o halawum nga personal nga espirituhanong kasinatian, mas maayo nga dili

nimo kini ipakigbahin gawas kon giaghat ka sa Espiritu Santo.

Si Presidente Boyd K. Packer, Presidente sa Korum sa Napulog Duha ka mga Apostoles, miingon:

“Akong nakat-unan nga ang lig-on, impresibo nga espirituhanong mga kasinatian dili sa kanunay moabut kanato. Ug kon mahitabo man, alang lamang gayud kini sa kaugalingon natong kaayohan, instruksyon, o pagkoriahir. . . .

“Nagtuo usab ako nga dili

maalamon ang pagpadayon og pagpanabi sa dili kasagaran nga mga espirituhanong kasinatian. Gikinahanglan ang pagmatngon niini ug ipakigbahin lamang kon ang Espiritu mismo moaghat kanimo sa paggamit niini alang sa kaayohan sa uban . . .

“Sa akong pagtuo, kinahanglan nga kita maghupot niining mga butanga ug mamalandong niini sa atong kasingkasing.”¹ ■

MUBO NGA SULAT

1. Boyd K. Packer, “The Candle of the Lord,” *Tambuli*, Hulyo 1983, 31.

Usahay pangutan-on ko sa mga tawo mahitungod sa temple garments, usahay sa yaga-yaga nga pagkasulti. Unsay akong isulti kanila?

Una sa tanan, kon magyagayaga ang mga tawo kabahin sa temple garments, angay gayud nga imo silang hangyoon sa pagpakita og dugang nga pagtahud, tungod kay ang mga garment sagrado alang kanato.

Usab, mahimo nimong ipasabut nga ang mga sakop ug mga lider sa daghang relihiyusong pundok magsul-ob og piho nga mga saput sa pagrepresentar sa ilang personal nga pagtuo o sa opisyal nilang responsibilidad,

busa ang kamatuoran nga ang atong relihiyon naglakip sa espesyal nga saput dili gayud kahibudngan.

Sa pagpasabut sa kahulugan sa temple garments, mahimo kang moingon nga kini usa ka yano, tarung nga saput pangilawum nga ihatag sa hingkod na nga mga miyembro sa Simbahan isip kabahin sa espesyal nga seremonyas sa atong mga templo. Niini nga mga seremonyas, kita mismo nakigsaad nga

magkinabuhi sa unsay gusto ni Jesukristo nato nga pagpaka-buhi, ug ang garments maoy padayong pahinumdom niining personal, espirituhanong pasalig. Niini nga paagi, ang garments makapanalipod kanato batok sa mga tintasyon ug sa dautan. ■

PAGBALANSE SA INYONG KINABUHI

Kining walo ka mga sugyot makatabang sa inyong pag-atubang sa mga hagit sa kinabuhi aron dili mabug-atan.

Ang pagsagubang sa lisud ug lain-laing mga hagit sa inadlawng pagpakabuhi, nga dili sayon nga tahas, makawagtang sa balanse ug panag-uyon nga atong gipangita. Daghang matarung nga mga tawo ang naningkamot gayud nga mamentinar ang pagkabalanse, apan usahay bation sila og kabug-at ug malupig.

Duna koy pipila ka sugyot nga gilauman nakong makatabang ninyong mga hingtungdan kabahin sa pagbalanse sa panginahanglan sa kinabuhi. Kini nga mga sugyot mahinungdanon kaayo; ang mga konsepto niini dali rang mataligam-an kon dili kamo magmatngon. Magkinahanglan kamo og lig-ong pasalig ug personal nga disiplina aron mahilakip kini sa inyong kinabuhi.

1. Pag-establisar og mga Prayoridad

Hunahunaa ang inyong kinabuhi ug han-aya ang inyong mga prayoridad. Pangita og hilom nga panahon kanunay sa paghunahuna og maayo kon asa kamo padulong ug unsay angay ninyong buhaton aron molampus. Si Jesus, atong ehemplo,

kasagaran “mipahilit ngadto sa mga awaaw ug nag-ampo” (Lucas 5:16). Usahay atong gikinahanglan ang paghimo sa samang butang aron malagsik kita sa espirituhanon sama sa gibuhat sa Manluluwas.

Isulat ang mga buluhaton nga gusto ninyong matuman sa matag adlaw. Unaha sa inyong paghunahuna ang gihimo ninyong sagradong mga pakigsaad uban sa Ginoo samtang magsulat kamo sa inadlaw ninyong mga iskedyul.

2. Paghimo og Makab-ot ra nga mga Tumong

Paghimo og mubo og tagal nga mga tumong nga mahimo ninyong kab-uton. Paghimo og mga tumong nga maayo ang pagkabalanse—dili manubra ang kadaghan o diyutay ra kaayo ug dili kaayo taas o mubo. Isulat ang makab-ot ra ninyo nga mga tumong ug lihoka sigon sa importansya niini. Pag-ampo alang sa balaang giya sa inyong paghan-ay og tumong.

3. Pag-badyet nga Maalamon

Ang tanan nag-atubang og mga hagit sa pinansyal. Pinaagi sa maalamon nga pag-badyet, kontrolaha ang tinuod ninyong panginahanglan ug sukda kini sa mainampingong paagi batok sa daghan ninyong gusto sa kinabuhi. Si propeta Jacob miingon sa iyang katawhan: “Busa, ayaw pag-gasto og salapi alang niana nga walay bili, ni ang inyong kahago niana nga dili makatagbaw” (2 Nephi 9:51).

Ni Elder
M. Russell Ballard

Sa Korum sa Napulog
Duha ka mga Apostoles



Hinumdumi ang kanunayng pagbayad sa hingpit nga ikapulo.

4. Pagtukod og Maayong mga Relasyon

Pakigsuod sa inyong mga ginikanan, kaparyentihan, ug kahigalaan. Motabang sila nga mabalanse kanunay ang inyong kinabuhi. Pagtukod og maayong relasyon sa inyong pamilya ug higala pinaagi sa dayag ug matinuoron nga komunikasyon.

Ang maayong relasyon sa pamilya mapadayon pinaagi sa malumo, mapinanggaon, mahunahunaon nga komunikasyon. Hinumdumi nga kasagaran ang daklit nga pagpasiplat, pagkidhat, pagyango, o paghapuhap mas maayo pa kay sa pulong. Ang pagpakatawa ug maayo nga pagpaminaw mahinungdanon usab nga bahin sa maayong komunikasyon.

5. Pagtuon sa mga Kasulatan

Siksika ang mga kasulatan. Nagtanyag kini og usa sa pinakamaayo nato nga kapanguhaan aron kanunayng maanaa ang Espiritu sa Ginoo. Usa sa mga paagi nga akong naangkon ang siguradong kahibalo nga si Jesus mao ang Kristo mao ang pagtuon sa mga kasulatan. Si Presidente Ezra Taft Benson (1899–1994) ug Gordon B. Hinckley (1910–2008) nanawagan sa mga miyembro sa Simbahan nga himoon ang pagtuon sa Basahon ni Mormon nga usa ka inadlaw nga buluhaton ug tibuok kinabuhi nga tinguha.



Ang tambag ni Apostol Pablo kang Timoteo usa ka maayong tambag alang kanatong tanan. Misulat siya “Ang tibuok nga kasulatan gituga sa Dios, ug may kapuslanan alang sa pagpanudlo, alang sa pagpamadlong, alang sa pagpanul-id, alang sa pagmatoto sa pagkamatarung” (2 Timoteo 3:16).

6. Pag-atiman sa Inyong Kaugalingon

Daghang tawo lakip kanako, naglisud sa pagpangita og igong panahon sa pagpahulay, pag-ehersisyo, ug pagrelaks. Kinahanglan kitang maghimo sa atong inadlaw nga iskedyul alang niini nga mga kalihokan kon gusto kitang makatagamtam og himsog ug balansing kinabuhi. Ang maayo nga pamustura makadugang sa atong dignidad ug pagrespeto sa kaugalingon.

7. Pagsunod sa Ebanghelyo

Balik-balik nga nagtudlo ang mga propeta kanato nga ang mga pamilya kinahanglang motudlo sa usag usa kabahin sa ebanghelyo, ilabi na atol sa family home evening. Kini nga praktis sa pamilya, kon dili kaayo kita nagmainampingon, anam-anam nga mawala kanato. Kinahanglan nga dili mawala kanato kining espesyal nga oportunidad nga “motudlo sa usag usa sa doktrina sa gingharian” (D&P 88:77), nga maggiya sa pamilya ngadto sa kinabuhing dayon.

Si Satanas naglihok kanunay sa pagguba sa atong mga pagpamatuod,

apan siya walay gahum sa pagtintal o pagsamok kanato lapas sa atong kusog sa pagbatok kon kita nagtuon sa ebanghelyo ug nagsunod sa mga sugo niini.

8. Pag-ampo Kanunay

Ang katapusan nakong sugyot mao ang kanunay nga pag-ampo sa tinagsa ug sa pamilya. Mahibaloan ninyo ang hustong desisyon nga buhaton sa matag adlaw pinaagi sa kanunay, sinsero nga pag-ampo.

Gi-summarize ni propeta Alma ang kaimportante sa pag-ampo niini nga mga pulong: “Magpaubos sa inyong mga kaugalingon sa atubangan sa Ginoo, ug motawag sa iyang balaan nga ngalan, ug magbantay ug mag-ampo sa kanunay, nga kamo mahimo nga dili matintal labaw niana nga kamo makalahutay, ug sa ingon giyahan pinaagi sa Balaang Espiritu, magmapainubsanon, magmaaghup, masinugtanon, mapailubon, puno sa gugma ug sa tanan mainantuson” (Alma 13:28). Kon nahiangay ako sa espirituhanong paagi, mas dali ra kong mabalanse ang tanan sa akong kinabuhi.

Padayon sa Pag-focus ug Paghimo sa Inyong Pinakamaayo

Ang ubang mga sugyot mahimong idugang niini. Bisan pa, nagtuo ko nga kon mag-focus kita sa pipila ka mahinungdanong katuyoan, mas madumala nato ang daghang panginahanglan sa kinabuhi. Hinumdumi, ang masubrahan sa bisan unsa sa kinabuhi makawagtang sa balanse. Sa samang paagi, ang gamay ra sab kaayong importanting butang sa kinabuhi sama ra sab og resulta. Mitambag si Haring Benjamin nga “ang tanan niini nga mga butang [angay nga] mahimo diha sa kaalam ug kahusay” (Mosiah 4:27).

Kasagaran ang kakulang sa klaro nga direksyon ug mga tumong ma-kausik sa atong panahon ug enerhiya ug makadugang sa kawalay balanse

sa atong kinabuhi. Ang kinabuhi nga dili balanse sama ra kaayo sa ligid sa sakyanan nga dili balanse. Dili maayo ang dagan niini ug peligro. Ang mga ligid nga perpekto ang pagkabalanse maghimo og hapsay og komportable nga pagpadagan. Mao usab sa kinabuhi. Ang dagan sa kinabuhi mahimong mas hapsay alang kanato kon maningkamot kitang kanunay nga balanse. Kinahanglan nga ang atong pinakatamong mao ang pagtinguha sa “pagka-imaltal ug kinabuhing dayon” (Moises 1:39). Sa ingon niini nga tumong, nganong dili man nato wagtangon sa kinabuhi ang mga butang nga naghulhog sa atong mga hunahuna, pagbati, ug enerhiya nga walay gikatabang alang sa pagkab-ot sa atong mga tumong?

Dili pa dugay, usa sa akong anak miingon, “Pa, usahay maghunahuna

ko kon makaya ba kaha nako.” Ang akong tubag kaniya sama sab sa akong ihatag kaninyo. Buhata lamang ang kutob sa imong mahimo matag adlaw. Buhata ang mahinungdanong mga butang ug, dili lang ninyo kini mabantayan nga, puno na ang inyong kinabuhi sa espirituhanong panabut nga mopamatuod kaninyo nga gihi-gugma kamo sa Langitnong Amahan. Kon mahibalo ang usa ka tawo niini, ang kinabuhi mapuno sa katuyoan ug kahulugan, nga mas sayon mamentinar ang pagkabalanse. ■

Gikan sa Abril 1987 nga pakigpulong sa kinatibuk-ang komperensya.

Kon mag-focus kita sa pipila ka mahinungdanong katuyoan, mas madumala nato ang daghang panginahanglan sa kinabuhi.



GAMITA ANG PANAHOON SA MAALAMONG PAAGI

*“PILIA ANG PAGHIMO OG DAGHANG MAAYO NGA
BUTANG SA KAUGALINGON NINYONG KABUBUT-ON”*

(Alang sa Kalig-on sa mga Kabatan-onan [2011], 3).



Kabubut-on ug Pagkamay- tulubagon



**Ni Elder
Shayne M. Bowen**
Sa Seventy

Dunay sugilanon kabahin sa tigulang nga Cherokee nga nagtudlo sa iyang apo mahitungod sa kinabuhi. “Adunay panagbugno sa sulod kanako,” miingon siya sa batang lalaki.

“Grabe kini nga bugno, ug tali kini sa duha ka matang sa lobo. Ang usa dautan: kini mao ang kasuko, kasina, kasubo, pagmahay, kahakog, kaarogante, pagkalooy sa kaugalingon, pagbati nga sad-an, kapungot, kaubos, pagpamakak, sayop nga garbo, pagka-superyor, ug kahambog.”

Mipadayon siya, “Ang usa maayo: kini mao ang kamaya, kalinaw, gugma, paglaum, kahapsay, kamapainubsanon, kamabination, kamaayo, kamasinabuton, kamanggihatagon, kamatuoran, kamanggiloy-on, ug hugot nga pagtuo. Ang sama nga panagbugno naa usab sulod kanimo—ug naa usab sa matag tawo.”

Naghunahuna sa makadiyot ang apo mahitungod niini ug dayon nangutana sa iyang lolo, “Asa nga lobo ang magmadaugon?”

Ang tigulang nga Cherokee yanong mitubag, “Kadtong imong gipakaon.”

Kabubut-on ug Pagkamay-tulubagon

Dugay na kaayo nga panahon kaniadto, sa didto pa kita sa presensya sa Langitnong Amahan, dunay Dakong Konseho nga gihimo. Niana nga konseho ang atong Amahan, nagtinguha nga makabaton kita sa samang kamaya ug kalipay nga Iyang gitagamtam, mipresentar sa Iyang plano diin kita makaanhi sa yuta, makabaton og pisikal nga lawas, ug makasinati sa kasakit ug kanindot


niini nga kinabuhi. Makapili kita sa pagsunod sa Iyang mga sugo ug mahisama Kaniya o mopili sa dili pagsunod sa mga sugo ug ihikaw sa atong kaugalingon ang kalipay ug mga panalangin nga Iyang gisaad.

Ang pinakasentro nga bahin sa plano sa atong Amahan mao nga kita gawason sa pagpili. Kini nga gasa gitawag og kabubut-on, ang gahum sa pagpili. Ang kauban sa kabubut-on mao kanunay ang pagkamay-tulubagon. Tagsa-tagsa kitang responsable sa mga pagpili nga atong gibuhad.

Dihang nangutana ang Langitnong Amahan kon kinsa ang mopahigayon sa plano, mitanyag si Lucifer nga maoy motubos sa tanang tawo ubos sa iyang mga kondisyon, diin dili magamit ang kabubut-on ug iyaha ang tanang himaya. Makaguba kini sa plano sa Dios alang sa mahangturon nga kalipay.

Gitanyag ni Jesukristo ang Iyang Kaugalingon nga mahimong Manluluwas diha sa plano sa Amahan. Gipili Niya ang pagsunod sa plano sa Amahan. Atong gisalig ang atong hugot nga pagtuo ngadto sa atong





magulang nga si Jesukristo, nahibalo nga ang Iyang misyon mahinungdanon aron makabalik kita sa gingharian sa Amahan.

Unsay nahitabo ni Lucifer? Ang Amahan miingon:

“Busa, tungod kay si Satanas misukol batok kanako, ug nagtinguha sa paglaglag sa kabubut-on sa tawo, diin Ako, ang Ginoong Dios, mihatag ngadto kaniya, ug usab, nga Ako kinahanglan nga mohatag ngadto kaniya sa akong kaugalingon nga gahum; pinaagi sa gahum sa akong Bugtong Anak, Ako nag-sugo nga siya isalikway;

“Ug siya nahimo nga Satanas, oo gani ang yawa, ang amahan sa tanan nga mga bakak, sa pag-ilad ug pagbuta sa mga tawo, ug pagdala kanila nga ulipon sa iyang pagbuot, gani kutob sa dili maminaw ngadto sa akong tingog” (Moises 4:3–4).

Tungod kay ang kabubut-on usa man ka mahangturon nga baruganan ug ang Langitnong Amahan dili mosupak niini, nawala kaniya ang ikatulo nga bahin sa Iyang mga anak, kinsa mipili nga mosunod kang Satanas.

Kabubut-on ug Pagka-mortal

Unsa diay ang tuyo sa kinabuhi dinhi sa yuta? Usa ka importanting tuyo mao ang pagmatuod sa atong kamatinud-anon (tan-awa sa Abraham 3:24–25). May katakus kita sa pag-ila sa husto gikan sa sayop. Gihatagan kita og gahum gikan sa Dios “sa pagbuhat . . . ug nga dili pagaaghaton” (2 Nephi 2:26). Sa katapusan, makadawat kita sa gingharian nga atong gitinguha sumala sa mga sugo nga atong gituman, sa mga ordinansa nga atong nadawat, ug mga pakigsaad nga atong gituman.


Sama sa gipasabut sa tigulang nga Cherokee, anaa ra kaniya kon asa nga lobo ang iyang pakaunon. Siya dunay kabubut-on, ug bugtong siya lang ang manubag sa iyang pagpili. Iya gayud ang mga sangputanan sa iyang pagpili.

Kamo ang mga batan-on sa dungganon nga katungod sa pagkatawo. Gipadala kamo dinhi sa yuta samtang ang kahingpitan sa ebanghelyo ania dinhi. Gibunyagan kamo ug gikumpirmahan aron kamo makadawat, kon inyong tinguha, ang Espiritu Santo isip kanunay ninyong kauban. Mihimo kamo og mga pakigsaad sa bunyag. Ug mga batan-ong lalaki, may dugang pa kamo nga mga pakigsaad sa priesthood.

Duna kamoy kabubut-on sa pagpili sa kinabuhing dayon pinaagi sa pagpuyo nga limpyo og takus nga mosulod sa balaang templo sa Dios ug makadawat sa mga ordinansa nga magtugot kaninyo nga makabalik sa presensya sa Amahan. Makapili kamo sa panalangin nga kinabuhing dayon, sa pagpakabuhi sama sa pagpakabuhi sa Dios alang sa tanang kahangturan uban sa inyong pamilya. Duna kamoy potensyal nga makadawat sa tanan nga anaa sa Amahan. Kamo ang magpili.

Gamita sa maalamon ang hinatag sa Dios nga kabubut-on. ■

Ang umaabut nga mga isyu dunay mas daghang artikulo mahitungod sa mga sum-banan diha sa bag-ong Alang sa Kalig-on sa mga Kabatan-onan.



MAHINUNG-DANONG MGA IDEYA MAHI-TUNGOD SA KABUBUT-ON

“Ang katungod sa pagdumala sa inyong kinabuhi mao ang usa sa labing mahinungdanong mga gasa sa Dios nganha kaninyo. . . .

“Kamo maoy responsable sa mga pagpili nga inyong himoon. . . .

“Samtang kamo gawason sa pagpili sa inyong pagabuhaton, kamo dili gawason sa pagpili sa mga sangputanan.”

Alang sa Kalig-on sa mga Kabatan-onan (2011), 2.



NAPANALANGINAN PINAAGI SA **EHEMPLO**

*Sama nga ang akong mga higala miimpluwensya
sa akong kinabuhi, kamo makadala sa kahayag sa ebang-
helyo ngadto sa kinabuhi sa inyong mga higala sa
paagi sa inyong pagpakabuhi.*



**Ni Elder
O. Vincent Haleck**
Sa Seventy

Bag-o lang mibisita ko sa usa ka higala sa akong pag-high school. Nag-istorya kami mahitungod sa una namong panagkita, mahitungod sa kalipay tungod sa pagsunod sa ebanghelyo, ug mahitungod sa impluwensya sa atong mga higala ngari sa among kinabuhi. Sa pagkatinuod, tungod sa ehemplo sa akong mga higala ako namiyembro sa Simbahan.

Miabut ko sa Estados Unidos gikan sa American Samoa sa 10 pa ang akong edad tungod kay gusto sa akong papa nga ang iyang mga anak makakuha og tarung nga edukasyon kay sa iyaha. Nagpuyo ko sa Seattle, Washington, kauban sa akong iyaan ug uyoan. Sa edad nga 14, mibalhin ko sa California. Ang akong lola, diin ko nagpuyo, usa ka temple worker sa Templo sa Los Angeles California, apan ako dili miyembro sa Simbahan.

Sa tuig sa akong pagka-junior sa high school, naapil ko sa student government ug nakamatikod og mga tawo sa student council nga lahi kay sa uban. Matinahuron sila sa uban, limpyo og sinultihan ug sininaan, ug may dignidad ug kahayag nga naglibut kanila nga nakadani sa akong pagtagad. Nagkahigalaay kami, ug gidapit ako sa pagkuyog nila sa pag-adto sa Mutual. Ganahan ko sa kaalegre, maanindot nga mga kalihokan ug akong gibati ang Espiritu didto, mao nga kanunay kong mitambong. Pipila lamang ka semana human niadto gipaila ko sa akong higala ngadto sa mga misyonaryo ug sa Basahon ni Mormon. Nabunyagan ko sa wala madugay ug gisugdan ang tibuok kinabuhi nga pagtuon sa Basahon ni Mormon.

Ang akong mga higala mituman sa tambag nga naa sa 1 Timoteo 4:12: “Hinonoa alang sa mga magtotoo, pagkinabuhi ingon nga panig-ingnan sa sinultihan ug sa pag-gawi, sa gugma, sa pagtuo, sa kaputli.” Sama sa akong mga higala, mamahimo kitang impluwensya alang sa kamaayo pinaagi sa atong inadlaw nga buhat sa pagsunod sa ebanghelyo. Samtang magkinabuhi kita nga magsubay sa atong mga sumbanan ug gituohan, kadtong andam nga modawat sa ebanghelyo makamatikod og magtinguha nga masayud og dugang.

Sama pananglit, hinumdumi ang istorya bahin ni Alma nga naa sa Basahon ni Mormon. Nagpuyo og komportable nga kinabuhi si Alma isip pari sa palasyo ni Haring Noah. Dihang mipamatuod si Abinadi, mituo si Alma kaniya ug, bisan namiligro ang iyang kaugalingon, misulat sa mga pulong ni Abinadi ug mitudlo sa uban mahitungod sa Manluluwas (tan-awa sa Mosiah 17:2-4).

“Ug nahinabo nga human sa daghan nga mga adlaw dihay ubay-ubay nga gidaghanon nga nagpundok diha sa dapit sa Mormon, aron sa pagpamati sa mga pulong ni Alma. Oo, ang tanan nagpundok nga mituo diha sa iyang pulong, aron sa pagpamati kaniya. Ug siya mitudlo kanila, ug misangyaw ngadto kanila sa paghinulsol, ug sa katubsanan, ug sa hugot nga pagtuo sa Ginoo” (Mosiah 18:7; tan-awa usab sa mga bersikulo 1-6).

Sa ngadto-ngadto, dihang si Alma nga Batan-on naghatag og mga problema sa Simbahan, gitubag sa anghel ang pag-ampo ni Alma: “Ang Ginoo nakadungog sa mga pag-ampo sa iyang mga katawhan, ug usab sa mga pag-ampo sa iyang sulugoon, si Alma, kinsa imong amahan; kay siya nag-ampo uban ang hugot nga pagtuo mahitungod kanimo nga ikaw unta madala ngadto sa





Si Alma nga Batan-on ug ang iyang mga higala nahimong talagsaon nga mga misyonaryo, ug mitandog sa liboan ka mga kinabuhi pinaagi sa ilang ehemplo sa pagkamaayo.

kasayuran sa kamatuoran” (Mosiah 27:14). Si Alma nga Batan-on ug ang iyang mga higala naghinulsol, nahimong talagsaon nga mga misyonaryo, ug mitandog sa liboan ka mga kinabuhi pinaagi sa ilang ehemplo sa pagkamaayo.

“Ug sa ingon sila mga himan diha sa mga kamot sa Dios sa pagdala sa daghan ngadto sa kasayuran sa kamatuoran, oo, ngadto sa kasayuran sa ilang Manunubos.

“Ug unsa ka bulahan sila! Kay sila nagmantala sa kalinaw; sila nagmantala sa maayo nga mga balita mahitungod sa mga maayo; ug sila mipadayag ngadto sa mga katawhan nga ang Ginoo mao ang naghari” (Mosiah 27:36–37).

Ang akong mga higala mipakita usab og maayong ehemplo dihang gipili nila nga mag-misyon. Bisan nag-atubang ko og mga oposisyon, mihukom ko nga magmision usab. Kadto nga desisyon mihulma sa tibuok nakong kinabuhi. Dihang miserbisyo ko sa Samoa Apia Mission, ang mga misyonaryo naghupot og mga responsibilidad sa pagpangulo sa priesthood, ug nakita nako nga ang Simbahan sa mga isla nagkinahanglan nga malig-on. Mihukom ko nga mobuhar sa akong bahin—mobalik ko sa Samoa human sa akong mision ug pag-eskwela.

Human sa graduation sa kolehiyo, ako ug ang akong asawa namalhin sa Samoa, diin didto gipatubo ang among mga anak ug mitrabaho sa paglig-on sa Simbahan ug

sa komunidad. Ang akong papa, kinsa dili miyembro sa Simbahan, aktibo sa lokal nga negosyo ug sa mga kalihokan sa komunidad. Ang iyang motto mao kini “Kon angay kini nga himoon, angay nga tarungon kini paghimo.” Samtang ang akong mga igsoon ug ako nakadiskubre sa ebanghelyo ug nagsunod niini kutob sa among mahimo, nakita niya ang maayong mga kausaban sa among kinabuhi. Niadtong 2000, si Presidente Gordon B. Hinckley (1910–2008) didto sa balay sa akong papa sa iyang pagpauli gikan sa pagpahinungod sa Templo sa Suva Fiji. Atol niana nga pagbisita, natandog sa Espiritu ang kasingkasing sa akong papa, ug akong kahigayunan ang pagbunyang kaniya dihang 82 anyos na siya. Nakaplagan niya ang hingpit nga kalipay sa ebanghelyo ug walay kukaulaw ug walay lipud-lipud nga mopakigbahin niini sa uban atol sa katapusang mga adlaw sa iyang kinabuhi.

Nahibalo ko sa importansya sa pagkahimong ehemplo sa mga magtutuo ug sa kalipay nga dala niini sa atong kinabuhi ug sa uban. Tungod sa maayong ehemplo ngari kanako sa akong mga higala ug sa gugma sa propeta, ang akong pamilya ug ako napalanginan og kalipay nga dala sa ebanghelyo.

Matag adlaw nag-impluwensya kita sa uban pinaagi sa atong mga buhar. Siguroon nato ang pagtabang sa uban ug pagpakigbahin sa kamatuoran niini nga kasulatan nga unta malipayon usab ang ilang kinabuhi tungod niini: “Hinumdumi, hinumdumi nga kini diha sa lig-on nga sukaranan sa atong Manunubos kinsa mao si Kristo, ang anak sa Dios, nga kamo kinahanglan gayud motukod sa inyong tukuranan; nga sa panahon nga ang yawa mopadala sa iyang mapintas nga mga hangin, oo, ang iyang mga panâ diha sa alimpulos, oo, sa diha nga ang tanan niya nga ulan nga yelo ug ang iyang mapintas nga unos mohampak diha kaninyo, kini walay gahum ibabaw kaninyo sa pagbitad kaninyo ngadto sa bung-aw sa pagkauyamot ug walay katapusan nga pagkaalaot, tungod sa lig-on nga sukaranan diin kamo natukod nga mao ang tinuod nga tukuranan, usa ka tukuranan diin kon ang mga tawo magtukod dili sila mapukan” (Helaman 5:12). ■

Ang Pinakagamhanan nga Kasundalohan

Nagplano ko nga mahimong opisyal sa kasundalohan. Apan sa akong paghunahuna sa akong kaugmaon, nahinumdom ko sa pangutana sa akong mama, “Kanus-a man ka mag-full time misyon?”

Ni H. Daniel Wolke Canales

Sukad sa gamay pa ko, nagana-han ko sa mga istorya sa mga lider sa Simbahan nga nakaserbisyo sa armed forces. Daghan kanila nahimong mga bayani sa gubat ug talagsaong ehemplo sa kaisug ug kamapainubsanon diha sa ilang nasud. Ang ilang mga kasinatian nagdasig kanako sa pag-apil sa militar sa akong nasud.

Sa 13 anyos ko, mieskwela ko sa eskwelahan nga nailhan kaayo sa ka-estrikto sa pang-militar nga disiplina ug pang-infantry nga pagbansay. Lisud kaayo ang akong iskedyul. Sagad kong maluya kaayo pagkahuman sa adlaw nga ang akong pagtuon sa kasulatan ug seminary morag dili na mahimo.

Sa ikaduhang tuig nako sa eskwelahan, akong giplano ang akong kinabuhi: sa pagkahuman nako ug eskwela sa edad nga 18, modiretso dayon ko sa officer school ug mo-gradwar inig ka upat ka tuig isip opisyal sa Guatemalan Army. Ang tanan nakong pangandoy maingon og nagkatinuod.



Usa ka adlaw gisultihan nako si mama sa akong mga plano, ug nangutana siya “Kanus-a man ang plano nimong mag-full time misyon?” Sukad niadto ang iyang pangutana nagpabilin sa akong hunahuna sa matag higayon nga maghunahuna ko sa akong kaugmaon.

Lisud gihapon ang akong iskedyul, apan gisugdan nako ang pagpakita og dugang nga interes sa akong espirituwal nga training. Gisugdan nako ang pagtambong og seminary, pagkuyog sa full-time nga mga misyonaryo, ug pag-apil sa mga kalihokan sa Simbahan. Gisunod ang tambag sa akong magulang nga lalaki nga tua sa misyon, gisugdan sab nako ang pagbasa sa Basahon ni Mormon.

Sa nagbansay ko sa pagkapatrooper, lisud kaayo ang among training sa matag adlaw. Mamalik mi sa among baraks nga hapit na magkamang, apan kanunay kong makakuha

og kalig-on aron magbasa sa Basahon ni Mormon. Ang inadlaw nga pagbasa sa mga kasulatan milig-on sa akong espiritu ug nakatabang nga makapadayon ko sa akong training.

Usa ka gabii pipila sa akong mga higala naglibut sa akong higdaanan sa pagpangutana kanako mahitungod sa Basahon ni Mormon ug sa Pulong sa Kaalam. Kadto akong oportunidad nga mahimong pinakamaayong matang sa sundalo—usa ka tawo nga modepensa sa kamatuoran ug nagdala og kagawasan pinaagi sa lig-on ug makakombinser nga pagpamatuod sa Basahon ni Mormon.

Dihang 19 na ko, mipasakop na usab ako sa kasundalohan—kasundalohan sa Dios, ang pinakagamhanan nga kasundalohan sa tanan. Akong kahigayunan ang pagbarug tapad sa maisug nga mga elder ug sister sa Zion sa batalyon sa Mexico Puebla Mission. Binaksan og taming sa Dios, among gisangyaw ang ebanghelyo ug nakig-away alang sa kagawasan uban sa kaisug ug kusog.

Nakig-away kami batok sa mga panon sa kangitngit, apan ang kadaugan iya sa Dios. Gusto kong magpadayon nga mahimong maisug nga sundalo, nagpasakop alang sa atong Hari. May gamhanan kita nga hinagiban: ang Basahon ni Mormon, ang Espiritu Santo, ug ang kahingpitan sa ebanghelyo. Gipangulohan kita ngadto sa kadaugan pinaagi sa buhing mga propeta. Kon magbansay kita ug mangandam sa kaugalingon alang sa pag-anhi sa atong Manluluwas, si Jesukristo, kita hatagan Niya og korona sa dungog sa celestial nga himaya. ■

Atong Luna



ANG AKONG PAVORITO NGA KASULATAN

D&P 64:10

Kini ang akong paborito nga kasulatan tungod kay kitang tanan masayop man. Walay tawo nga hingpit gawas kang Jesukristo, mao nga kinahanglan kitang magkat-on sa pagpinasayloy kon masayop kita.

Cedric G., edad 16, Luzon, Philippines

IPADALA NGARI KANAMO ANG IMONG ISTORYA

Duna ka bay kasinatian kabahin sa paggamit sa tambag gikan niini nga mga sumbanan sa *Alang sa Kalig-on sa mga Kabatan-onan?*

- Musika ug Pagsayaw
- Pisikal ug emosyonal nga kahimsog
- Paghinulol
- Pagtuman sa Adlaw nga Igpapahulay

Palihug ipadala ang imong kasinatian pinaagi sa internet sa liahona.lds.org o pinaagi sa e-mail ngadto sa liahona@ldschurch.org nga butangan og “For the Strength of Youth” sa linya sa hilisgutan. Sa imong e-mail, ilakip ang imong tibuok nga ngalan, petsa sa pagkatawo, ward ug stake (o branch ug district), ug ang pagtugot sa ginikanan (pinaagi sa e-mail) nga maimprinta ang imong tubag.

ANG PAG-AMPO NGA NAA SA PERSONAL NGA KAUSWAGAN

Ni Amalia Camila Wilte

Sa tibuok nakong kinabuhi gitudloan ko sa akong mga ginikanan sa pag-ampo, apan sa akong pag-dako, mag-ampo ko sa gabii lamang. Nagtuo ko nga igo na kadto—hangtud nga nasakop ko sa Young Women.

Dihang gihatagan ko sa booklet nga Personal nga Kauswagan, akong gibasa ang tanang tumong. Dunay usa nga nakadani kaayo sa akong atensyon: ang mithianon nga kasinatian sa hugot nga pagtuo nag-ingon nga kinahanglan kong mag-ampo sa buntag ingon man sa pagkagabii. “Nganong apil man ang buntag?” Miingon ko sa kaugalingon. “Lisud kini alang kanako.”

Milabay ang panahon, ug wala ko makatuman niini nga tumong. Apan determinado kong himoon kini, ug bisan lisud, misalig ko sa Ginoo.

Sa sinugdanan ang tanan ingon og pareho ra. Apan may nagsugod sa pagkausab kanako. Ingon og mibati ko og dugang nga kasiguroan sa tanan nakong gibuhay. Ang ginagmayng pakig-away nako sa akong pamilya wala na mahitabo. Sa akong sayo nga pagbangon alang sa simbahan, wala ko mobati og kaluya. Aduna hinoon koy dakong tinguha sa pag-adto.

Dihay adlaw nga naghunahuna ko nga wala koy igong panahon sa pagbuhay sa tanan nakong angay buhaton. Sa akong pagmata nianang adlaw, nag-ampo ko—bisan kulang sa kamasaligon—nga adunay mausab. Natingala ko sa nahitabo: Akong nahuman ang tanan nakong buhatunon! Naulaw ko nga wala kaayo mosalig sa Ginoo apan nalipay kaayo nga Iyang gitubag ang akong pag-ampo.

Karon mag-ampo ko kada buntag ug gabii, ug ang akong kinabuhi nausab gayud.

Nasayud ko nga ang Langitnong Amahan kanunay nga maminaw ug motubag sa atong mga pag-ampo. Kinahanglan lang nga duna kitay hugot nga pagtuo Kaniya. Dili gayud Siya mobiya kanato. Siya anaa. Gikinahanglan lang nga moduol kita Kaniya. Nahibalo ko nga ang saad nga “pagtuktok, ug kamo pagaablihan” tinuod (Mateo 7:7). Gikinahanglan lang nga moluhod kita, mag-ampo, ug mosalig sa Iyang pagbuot, dili sa atoa. Mapasalamaton ako Kaniya sa programa sa Personal nga Kauswagan ug sa talagsaong gasa sa pag-ampo.





**Ni Elder
Larry R. Lawrence**
Sa Seventy

“Natawo sa mga matarung nga ginikanan, busa ako gitudloan sa tanan nga nakat-unan sa akong amahan” (1 Nephi 1:1).



PAGKAT-ON

SA PAGBASA

Sa nag-sayis anyos ko, naglisud ko sa pagkat-on unsaon sa pagbasa. Giingnan ko sa akong magtutudlo nga kinahanglan kong mobalik sa grade 1. Nabalaka ang akong papa sa pagkadungog niya niini. Mao nga sa matag gabii human sa panihapon, iya kong praktison sa pagbasa. Naghimo si Papa og dula gikan niini aron maganahan ko. Wala madugay makaila na ko sa mga pulong kon makita ko kini, ug giregaluhan ko ni papa og pagdayeg ug pagdasig. Migahin kami og mga oras sa pagbasa, ug milambo ako.

Mihukom ang akong magtutudlo nga ibalhin na ko sa pagka-grade 2. Mapasigarbuhon si papa kanako. Interesado gayud siya sa akong kalamboan sa eskwelahan. Sa Pasko gipalitan ko niya og libro nga makalingaw kanako.

Pipila ka bulan pagkahuman sa akong high school, namatay sa kanser ang akong papa. Wala na siya kakita nakong migradwar sa kolehiyo o sa pagkadoktor, apan nabuhi pa siya sa igo nga panahon aron mahibalo nga akong nakat-unan ang kadasig sa pagbasa. Naghatag

kadto kaniya og dakong katagbawan.

Dili mga miyembro sa Simbahan ang akong pamilya. Usa ka adlaw samtang nag-eskwela ko sa pagkadoktor, mihulam ko og libro gikan sa library nga ginganlan og *A Marvelous Work and a Wonder*. Sinulat kini sa usa ka Apostol nga ginganlan og Elder LeGrand Richards. Ang libro mahitungod tanan sa Ang Simbahan ni Jesukristo sa mga Santos sa Ulahing mga Adlaw. Gibalik-balik ko kini sa pagbasa. Gitun-an ug giampo ko kini. Ang libro nag-andam kanako nga magpasakop sa Simbahan pipila ka bulan human niadto.

Human sa akong bunyag, akong nakat-unan nga makaadto diay ko sa templo ug mabunyagan alang sa akong papa. Dako siya og gihimong kausaban sa akong kinabuhi. Sa katapusan makahimo ko og butang nga espesyal aron makapasalamat kaniya sa tanan niyang gihimo kanako.

Ganahan gihapon kong mobasa. Ang gasa nga gihatag sa akong papa mipanalangin sa akong kinabuhi sa matag adlaw samtang magbasa ko sa kasulatan ug sa pulong sa mga propeta. ■

Misyonaryo nga HIGALA

Ni Jane McBride Choate

Gibase sa usa ka tinuod nga istorya



“Magdapit sa tanan sa pagduol ngadto kang Kristo” (D&P 20:59).

Mihangyo si Alex sa iyang higala nga si Jake nga adto magdula sa iyang balay inig ka Sabado. Nalingaw sila sa pagpalumba-lumba sa mga dulaang sakyanan dihang namatikdan ni Jake ang litrato nga gibitay sa bong-bong.

“Kinsa na?” nangutana siya nga nagtudlo sa litrato ni Thomas S. Monson.

“Si Presidente Monson kana,” miingon si Alex.

Wala motingog si Jake.

“Abi nimo, siya ang propeta sa among Simbahan,” miingon si Alex.

Daw naulaw si Jake. “Wala na kami magsimbahan,” miingon siya.

“Nganong wala na man?” Nangutana si Alex.

Mikihol lamang si Jake. “Ambot.”

“Ganahan ka bang mokuyog nako inig ka Domingo?” nangutana si Alex. “Mahimo tang magkuyog ngadto sa Primary. Maayo kaayo ang akong magtutudlo.”

Misanag ang mga mata ni Jake. “Pangutan-on nako si mama, basin



tugtan ko niya,” miingon si Jake.

Sa tingpaniudto, nangutana si Alex sa iyang mama, “Mahimo bang mokuyog si Jake nako sa Primary ugma?”

“Pangutan-on una nato ang mama ni Jake,” miingon si Mama. “Kon mosugot siya, siyempre makakuyog siya.”

Pagkataud-taod nianang adlawa, miabut ang mama ni Jake sa pagkuha kaniya.

“Mahimo bang mokuyog si Jake nako ugma sa Primary?” Nangutana si Alex.

“Makakuyog ba ko, Ma?” Miingon si Jake. “Miingon si Alex nga nindot kaayo ang Primary. Duna silay mga istorya, mga kanta, ug makakat-on mahitungod sa mga tawo sa kasulatan.”

“Amбут lang,” miingon ang mama ni Jake, nagduhaduha. “Dugay na tang way simba-simba.”

“Palihug, Ma,” miingon si Jake.

“Gusto kong moadto.”

“Welcome si Jake sa pagkuyog kanamo,” miingon ang mama ni Alex.

“Sigurado ka ganahan kang moadto?” Nangutana ang mama ni Jake.

“Sigurado ko!”

Miingon si Jake.

“Kon mao OK ra,” miingon ang mama ni Jake.

Gigakos og kalit

ni Jake ang iyang mama. “Salamat,” miingon siya.

Pagka-Dominggo sa buntag, gihapit sa pamilya ni Alex si Jake. Nakailis na siya og pangsimba. Human sa sakrament nangadto ang batang mga lalaki sa Primary. Sa didto na sila sa klase, miingon ang ilang magtutudlo, “Nalipay kaayo mi nga naa ka dinhi, Jake.”

Human og simba, gihatod sa pamilya ni Alex si Jake sa pagpauli.

“Salamat sa imong pagdala nako sa simbahan,” miingon si Jake.

Mipahiyom ang mama ni Alex ngadto kaniya. “Walay sapayan, Jake. Manghinaut mi nga mokuyog ka namo og usab,” miingon siya.

Nianang gabhiona sa panihapon, nangutana si Alex, “mahimo ba nako imbitaron si Jake kuyog nato sa sunod Domingo?”

Mitando si mama. “Sundon nako ang imong ehemplo ug imbitaron nako ang iyang mama sa pagkuyog sab nato,” miingon siya.

“Maayo ka nga misyonaryo, Alex,” miingon si Papa.

Nahibulong si Alex. “Usa ra ko ka higala,” miingon siya.

“Mao kana ang usa ka misyonaryo,” miingon si Mama, “usa ka higala.” ■



“Ang natural ug normal nga buhat sa pagpakigbahin sa ebanghelyo ngadto sa atong pinangga ug gimahal mao ang buhat ug kalipay sa atong kinabuhi.”

Elder David F. Evans sa Seventy, “Angay Ba Kini?” *Liahona*, Mayo 2012, 106.

Atong Pahina



Nicolas M., edad 5, Colombia



Kapitan Moroni, ni Ezra B.,
edad 9, Philippines



Ang mga bata sa La Huerta Ward, Guadalajara Mexico Mirador Stake, nag-andam alang sa ilang pasundayag sa sakrament miting.



Mahangturon nga Pamilya, ni Nicole M., edad 5, Brazil



Paglalang, ni Melanie M., edad 6, Brazil




Alondra E., edad 5, taga-Guatemala, ganahan kaayo sa Primary. Paborito niya nga himno ang "Ako Anak sa Dios." Nahibalo siya nga ang Langitnong Amahan nahigugma kaniya ug ang Simbahan tinuod. Ganahan siya sa seksyon nga alang sa mga bata diha sa Liahona.



Countdown alang sa Kinatibuk-ang Komperensya

Makapangandam ka alang sa kinatibuk-ang komperensya pinaagi sa paggunting sa papel nga naa sa ubos ug pagpapilit sa isig ka tumoy aron maporma og kadena. Sa matag adlaw sulod sa duha ka semana sa dili pa ang komperensya, pagkuha og usa ka sumpay sa kadena ug buhata unsay nakasulat diha sa papel. Samtang magkamubo ang kadena, ang komperensya nagkaduol!

1. Basaha ang mahitungod sa Liahona ni Lehi (tan-awa sa 1 Nephi 16:10, 28, 29 ug sa Alma 37:38–40). Sa unsang paagi ang pulong sa mga propeta susama sa Liahona alang sa mga pamilya karon?
2. Pangitaa ang mga litrato sa propeta ug mga apostoles sa Mayo ug Nobyembre nga *Liahona* o sa lds.org/church/leaders ug ilha ang ilang mga pangalan.
3. Hunahunaa nga gihangyo ka nga makigpulong sa Primary mahitungod sa mga propeta. Unsay imong isulti?
4. Kantaha ang “Salamat, O Dios sa Propeta” (*Mga Himno ug Mga Awit sa mga Bata*, nu. 36).
5. Unsa nga hilisgutan sa ebanghelyo ang gusto pa nimong makat-unan atol sa komperensya? Paghimo og lista sa mga pulong nga paminawon.
6. Pag-ampo og tabang aron ma-focus ug mabati ang Espiritu atol sa komperensya. Mahimo sab kang mag-ampo alang sa mga lider sa Simbahan kinsa mopakigpulong.
7. Ipakigbahin ngadto sa imong mga ginikanan og mga sakop sa pamilya nganong nagpaabut ka sa komperensya.
8. Basaha ang mahitungod ni Haring Benjamin nga namulong sa iyang katawhan (tan-awa sa Mosiah 2:1, 5, 9, 41). Sa unsang paagi nga sama kini sa kinatibuk-ang komperensya?
9. Pag-drawing og litrato sa paborito nimong propeta gikan sa mga kasulatan.
10. Paghimo og journal diin imong masulat o maka-drawing og mga hulagway mahitungod sa mga pakigpulong atol sa komperensya. Makita nimo ang pwedeng i-imprinta nga notebook alang sa komperensya diha sa lds.org/general-conference/children.
11. Kantaha ang “Sunda ang Propeta” (*Songbook sa mga Bata*, 58–59).
12. Basaha ang mahitungod sa matarung nga mga Nephite sa 4 Nephi 1:12–13, 16. Unsay ilang gihimo dihang nagkatigom sila?
13. Basaha ang istorya sa “Misyonaryo nga Higala” sa pahina 60 niining isyu.
14. Hisguti ang mahitungod niini nga pagtulun-an gikan ni Elder M. Russell Ballard: “Kon maminaw kamo sa buhing propeta ug mga apostoles ug mopatalinghug sa among tambag, dili kamo mahisalaag” (“They Spoke to Us,” *Liahona*, Hulyo 2001, 116.)



Imong magamit kini nga leksyon ug kalihokan aron makat-on og dugang kabahin sa tema sa Primary karong bulana.

Ang Napulo ka Sugo Nagtudlo Kanako sa Paghigugma sa Dios ug sa Iyang mga Anak

Daghan ka og buluhaton karong adlaw! Mihangyo ang imong kaklase kon mahimo ba niyang kopyahon ang imong homework. Gusto kang magma-tinuoron, mao nga mibalibad ka apan mitanyag nga imo siyang tabangan.

Sa imong pagpauli, nakita nimo ang imong silingan nga naglisud sa pagbitbit sa dakong basket nga may mga utanon gikan sa iyang hardin. Gusto na kang makauli, apan midagan ka ug gitabangan siya sa pagpasulod sa basket.

Human sa panihapon giingnan ka sa imong papa sa paghimo sa imong homework sa math. Ang math lisud ug dili ka ganahang mohimo niini, apan mihukom

kang sundon ang imong papa.

Kapoy na ka pagkagabii, apan miluhod ka ug mipasalamat sa Langitnong Amahan sa imong mga panalagin.

Nahibalo ka ba nga sa paghimo niining tanan nga maayong mga desisyon, gisunod nimo ang Napulo ka Sugo? Human nakaeskapo ang mga Israelite gikan sa Ehipto, nagkinahanglan sila og giya gikan sa Ginoo. Pinaagi sa propeta nga si Moises, gihatagan sa Ginoo ang mga tawo og 10 ka importanting sugo nga pagasundon alang sa matarung nga pagpakabuhi. Ang Napulo ka Sugo nagtudlo mahitungod sa pagtahud sa Dios,

KANTA UG KASULATAN

- "Sunda ang Kasugoan," *Songbook sa mga Bata*, 68–69.
- Doktrina ug mga Pakigsaad 42:29

pagkamatinuoron, pagtahud sa atong mga ginikanan, pagbalaan sa Adlawng Igpapahulay, ug pagkamaayong mga silingan. Kini nga mga balaod importante gihapon karon sama kaniadtong liboan na ka tuig ang milabay. Kon sundon nato ang mga sugo sa Ginoo, makakat-on kita sa paghigugma ug pagtahod sa Dios ug sa pagkama-bination ug kamahigugmaon sa tanan. ■

IKAW LANG

Makita nimo ang Napulo ka Sugo diha sa Exodo 20. Maihap ba nimo ang tanang 10? Markahi kini gamit ang lapis nga pangmarka kon ganahan ka.



KALIHOKAN SA CTR: PAGSUNOD SA MGA SUGO

Ang Napulo ka Sugo mabahin ngadto sa tulo ka importanting mga kategoriya: (1) pagtahud sa Dios, (2) pagtahud sa mga ginikanan ug pamilya, ug (3) pagtahud sa uban.

Guntinga ang tulo ka label nga naa sa ubos. Mahimo nimong ipapilit kini sa mga garapon o bag o ibutang kini sa lamesa. Sa managlahing piraso sa papel, pasulata ang mga sakop sa pamilya ug pipila ka maayong butang nga ilang gihimo o nakita nga gihimo sa uban sa miaging semana sa pagsunod og usa ka sugo. Tingali

mipakita ka og pagtahud atol sa pag-ampo, o tingali ang imong igsoon mitabang sa inyong ginikanan sa pag-andam og panihapon.

Basaha ang usa sa mga papel ug dayon hukmi ninyo kon asa nga kategoriya kana nga kasinatian nasakop. Ibutang ang papel sa garapon o sa bag o ibutang kini tapad sa label diha sa lamesa. Basaha usab ang tanang papel ug ibutang kini diha sa husto nga mga kategoriya. Ang ubang mga kasinatian mahimong mohaum sobra sa usa ka kategoriya.

PAGTAHUD SA DIOS

PAGTAHUD SA MGA GINIKANAN UG PAMILYA

PAGTAHUD SA UBAN

Ni Chad E. Phares
Mga Magasin sa Simbahan

Sa eskwelahan nangutana ko sa tulo nako ka higala kon mituo ba sila ug Dios. Mitando sila. Miingon ko nga ako usab. Gidapit nako sila sa open house sa templo. Miingon sila, "OK, mangadto mi."



Hi!

Ako si Timofei

gikan sa Kyiv, Ukraine

Ang sayis anyos nga si Timofei nag-puyo sa Kyiv, Ukraine, kapital nga siyudad sa Ukraine ug nahimutangan sa unang templo sa iyang nasud. Mahinamon si Timofei sa bag-ong templo ug sa daghan pang butang. Nalipay kaayo siya dihang nahingo na ang duha niya ka ngipon. Iyang papa ang nag-ibut sa usa didto sa balay sa iyang lola, ug ang usa natagak lamang kini.




Niining tuiga nagsugod ko og kat-on sa karate kay ang akong papa ug igso-ong mga lalaki nagtuon usab og karate. Nakakat-on ko sa pagsum-bag og kusog, pagpanalipod sa kaugalingon, ug pag-alsa og mga bug-at.





Ako ug ang akong igsoong lalaki ganahan nga mag-porma og balay-balay, awto-awto, ug mga tawo nga gagmay gamit ang among mga building blocks.

Miserbisyo ang akong igsoong mga lalaki sa open house sa templo. Gusto sab unta kong moserbisyo, apan bata pa kaayo ko. Miadto ko kaduha sa open house sa pag-tour sa templo. Ganahan kaayo ko niini.



Sa pagka-summer gitudloan ko sa duha nako ka igsoong lalaki sa pagdula og football. Gitudloan ko nila sa pagdagan diha sa dulaanan ug pagbantay sa goal. Bisan og mas magulang sila, nakigdula ko nila ug sa ilang mga higala.



Ganahan ko sa gagmay nakong dulaang sakyanan. Tungod kay puthaw kini, dili kini mabuak ug maguba. Dugay na kini kanako, ug ingon og wala pa kini mga garas.

Akong idulog sa pagkatulog ang akong mga dulaan. Kon tulog na ang akong mga igsoon, magdula gihapon ko kadiyot sa akong mga dulaan.



SI JESUS Mibisita sa mga NEPHITE

Ni Diane L. Mangum

Sulod sa tulo ka adlaw mitabon ang grabing kangitngit didto sa yuta sa mga Nephites. Walay bisan gamayng tipik sa kahayag sa adlaw o kidlap sa bitoon. Hilabihan kangitngit nga walay bisan usa ka kandila ang mosiga.

Ang nahadlok nga mga Nephite nakabati sa dalugdog ug sa grabe nga unos ug mibati sa mga linog nga mitay-og sa yuta. Karon diha sa kangitngit daghang tawo ang nanghilak ug nagdanguyngoy. Naghandom sila nga unta ilang gisunod ang mga gitudlo ni propeta Nephi ug naghinulsol!

Sa kalit usa ka tingog ang

nadungog sa tibuok yuta: “Tan-awa, Ako mao si Jesukristo ang anak sa Dios. Ako ang naglalang sa mga langit ug sa yuta, ug sa tanan nga mga butang nga anaa diha kanila. Ako uban sa Amahan sukad sa sinugdanan.”

Miingon si Jesus nga mianhi Siya sa yuta aron pagluwas sa kalibutan gikan sa sala. Gihatag Niya ang Iyang kinabuhi ug karon nabanhaw. Gidapit Niya ang tanan sa paghinulsol ug maluwas.

Natingala kaayo ang mga Nephite nga makadungog ni Jesus nga nanglingkod sila nga hilom sulod sa daghang oras, namalandong sa ilang nadungog.

Pagkabuntag, hayag na usab, ug nagsugod sa pagmaya ang mga tawo. Daghang tawo ang nagpundok libut sa templo sa yuta sa Bountiful sa paghisgot mahitungod sa katingalahang mga butang nga nahitabo. Dayon gikan sa langit nadungog nila ang hinay nga tingog. Mipainit sa ilang dughan ang tingog, apan dili sila makasabut.

Nadungog na usab ang tingog, apan wala gihapon

nila masabti ang mga pulong.

Sa ikatulong higayon nadungog ang tingog, nag-ingon, “Tan-awa ang akong Hinigugmang Anak, kinsa Ako nahimuot kaayo, kang kinsa Ako mihimaya sa akong ngalan—paminaw kamo kaniya.”

Mihangad ang mga tawo ug nakita si Jesus nga mikunsad gikan sa langit hangtud nga nagbarug diha gayud uban kanila. Ang mga Nephites mihapa sa yuta. Nahinum-duman nila ang mga pulong sa mga

INGON SA USA KA HIMONGAAN NGA MAGTIGOM SA IYANG MGA PISO

Miingon si Jesus sa mga Nephite nga gisulayan Niya ang pagtigom kanila ingon sa usa ka himongaan nga magtigom sa iyang mga piso ilawom sa iyang mga pako sa paghimo kanila nga luwas. Nag-ingon Siya nga gihigugma Niya silang tanan ug gusto nga bantayan sila ug himoon silang luwas.





propeta—nga si Jesukristo mobisita kanila human sa Iyang paglansang ug pagkabanhaw.

Gipahikap ni Jesus ang tanang tawo sa Iyang kamot ug tiil aron mabatyagan ang mga gilansangan Kaniya sa krus didto sa Jerusalem. Dihang nakita sa mga tawo ug nabatyagan sa ilang kaugalingon, nahibalo sila nga Siya ang nabanhaw nga Manluluwas. Naninggit sila, “Hosana!” ug misimba Kaniya.

Gitawag ni Jesus si propeta Nephi

sa pagduol Kaniya. Gi-hatagan Niya og awtoridad si Nephi ug ang 11 ka ubang matarung nga mga tawo sa pagtudlo ug pagbunyag human Siya mibalik sa Langit. Kining 12 nahimo nga mga disipulo sa Simbahan ni Jesukristo sa Bag-ong Kalibutan. ■

Gikan sa 3 Nephi 8–12.



NEPHI

Sa Basahon ni Mormon, dunay upat ka propeta nga ginganlan og Nephi. Si Nephi, kinsa nakakita sa nabanhaw nga Jesus ug Iya nga disipulo, nagpuyo dinhi 600 ka tuig human ni Nephi, anak ni Lehi.

Aron Ingnon Kunohay nga Ana sa Primary

Ni Tryn Paxton

Gibase sa tinuod nga istorya

2. Mihilak si Sophie.

1. Dili maayo ang gibati ni Sophie dihang milingkod siya alang sa pamahaw sa Dominggo sa buntag.

Sophie, pasayloa ko. Maglisud ka pag-adto sa simbahan karon tungod sa imong sakit.

Apan gusto kong moadto sa Primary.

Tingali makahimo ta og butang nga espesyal dinhi sa balay.

3. Naguol si Sophie. Misulod siya sa iyang kwarto ug gitabunan og habol ang iyang nawong. Dayon nakahunahuna siya.

Siguro atong buhaton nga aron ingnon nga kunohay naa sa balay ang primary karon.

4. Dihang ang mga igsoong lalaki ni Sophie andam na sa pagsimba, gisul-ob sab ni Sophie ang iyang pangsimba. Gilisan sab niya og nindot ang iyang mga monyeka ug mga dulaan nga mga hayop aron makatambong usab sila sa Primary kunohay.

5. Dihang nakalakaw na ang tanan ngadto sa simbahan, gihimo ni Mama ug ni Sophie ang sala nga kunohay kwarto sa Primary. Nagpapilit si Sophie og mga litrato ni Jesus sa bong-bong ug mikuha sa *Songbook sa mga Bata* gikan sa butanganan. Mikuha sab siya og mga krayola ug mga kasulatan.



6. Milingkod si Sophie sa kutson tapad sa iyang mga monyeka ug mga dulaan. Si mama ang naghatag sa pangbukas nga pag-ampo. Dayon nanganta sila sa “Ako Anak sa Dios” ug “Gusto Kong Moadto sa Templo.”

7. Malipayon si Sophie panahon sa aron ingnon nga kunohay anaa sa Primary. Ang iyang mga monyeka ug mga dulaang hayop nag-urong sab.



8. Pagkahuman sa aron ingnon nga kunohay naa sa Primary, gipahimutang ni Mama si Sophie sa iyang higdaanan aron makapahulay.


Salamat sa paghimo og aron ingnon nga kunohay naa sa Primary uban nako. Apan di ko makahulat nga makaadto sa tinuod nga Primary sa sunod semana!



UNSAY PAGKAPAREHA?

Dihang dili makaadto si Sophie sa Primary tungod sa sakit, siya ug ang iyang mama mihimo sa ilang sala nga aron ingnon nga kunohay kwarto sa Primary. Tan-awa kon makit-an ba ninyo ang mga magkapareha nga butang diha sa duha ka litrato.





PAGHULAGWAY PINAAGI NI VAL CHADWICK BAGLEY

Ni Val Chadwick Bagley

Kini nga elder mopauliay na human sa pagserbisyo sa Langitnong Amahan isip misionaryo. Tan-awa ang litrato ug tan-awa kon pila ang makit-an ninyong nakatago nga mga butang, lakip ang bola sa baseball, libro,

panaksan, alibang-bang, sakyanan, krayola, tasa, drumstick, sobre, tinidor, club sa golf, martilyo, tabanog, kutsilyo, hagdan, brush sa pintal, lapis, papel, ruler, screwdriver, mga medyas, kutsara, tent, toothbrush, payong, ug hiwa sa pakwan.

Mga Balita sa Simbahan

Bisitaha ang news.lds.org alang sa dugang nga mga balita ug panghitabo sa Simbahan.

Ang mga Relief Society sa tibuok Kalibutan Nagsaulog sa ika-170 nga Anibersaryo

Ni Lok Yi Chan

Mga Balita ug Panghitabo sa Simbahan

Sa pagpasidungog sa ika-170 nga anibersaryo sa organisasyon sa Relief Society, ang mga sister sa tibuok kalibutan aktibong miapil sa serbisyo ug sa ubang mga kalihokan nga naglambigit kanila diha sa buluhaton sa organisasyon.

Niadtong Pebrero, ang kinatibuk-ang kapangulohan sa Relief Society midapit sa tanang mga sister sa tibuok kalibutan, nagsugyot og walo ka posibleng padayon nga mga kalihokan alang sa pagsaulog sa anibersaryo—nga nahitabo sa Sabado, Marso 17, 2012. Ang mga kalihokan mahimong maplano ubos sa direksyon sa lokal nga mga lider sa priesthood.

Ang mga sister sa tibuok kalibutan misanong. Ang sunod nga nahitabo mao ang mubo nga nindot nga mga talan-awon gikan sa pipila ka mga pagsaulog nga nahitabo sa tibuok Simbahan.

Dominican Republic

Ang mga sister sa Primavera First Branch sa La Vega Dominican Republic District gipahinumduman sa mga babaye nga wala maghunahuna sa kaugalingon nga gikan sa unang kasaysayan sa Santos sa Ulahing mga Adlaw ug sa ilang malahutayong kabilin pinaagi sa pagsaulog sa branch niadtong Marso 17.

Ang kada sister kinsa miapil nagsinina sa estilo sa mga pioneer ug nakigbahin og mensahe mahitunod sa Relief Society. Si María Elena Pichardo de Gómez, unang

magtatambag sa kapangulohan sa Relief Society, mipahinumdom sa mga sister sa ilang responsibilidad sa pagpangandam alang sa malisud nga mga panahon, ingon nga gitudlo sa mga propeta karon. Midugang siya, “Ang talagsaong kalig-on sa Primavera First Branch Relief Society anaa sa among kalahi sa usag usa apan nagkahiusa diha sa samang ebanghelyo.”

Fiji

Nagsunod sa tambag sa kinatibuk-ang kapangulohan sa Relief Society “nga ang Relief Society moserbisyo diha sa komunidad,” ang Relief Society sa Samabula Ward sa Suva Fiji North Stake milusad og nagpadayong proyekto nga gitawag og “Paghimo og Kalainan—Ang Gugmang Putli Dili Gayud Mopakyas.” Ang kada sister sa ward mihimo og tumong sa paghimo og buhat sa serbisyo, gugma, o pagkamabination 170 ka beses—ngadto sa nagkalain-laing mga tawo—sa mga katapusan sa Septyembre 2012.

Ang ward naghimo usab og kalihokan sa pagtabang sa mga sister nga mas makasabut ug makadayeg sa mga kinabuhi ug mga kontribusyon sa tanang kinatibuk-ang mga presidente sa Relief Society, gikan ni Emma Smith hangtud karon.

Hong Kong

Sa Hong Kong, ang mga sister gikan sa New Territories Stake misaulog

sa anibersaryo sa Relief Society pinaagi sa pagpamalandong sa personal nilang kasaysayan ug sa kasaysayan sa Relief Society.

Naghimo sila og mga exhibit, nga ang tema “Pagpangita sa Grasya,” diin ilang gipasundayag ang karaan nga litrato sa mga misyonaryo, mga rekord sa pamilya, mga painting, ug mga hinimo sa kamot nga butang sa miaging mga kalihokan sa Relief Society, lakip ang mga parol ug mga pabo nga hinimo sa pulang papel nga mga pocket, binurdahan, mga key chain, ug mga pitaka.

Kenya

Sa Bamburi Branch sa Kenya Nairobi Mission, ang mga sister sa Relief Society, mihatag og kwarta nga ila untang gastuhon alang sa usa ka kalihokan apan ilang gipalit hinoon og mga gamit sa kusina ug ubang mga butang nga gikinahanglan sa branch. Human sa paglimpyo og maayo sa lokal nga meeting-house, ang mga sister sa ward nagpundok alang sa panahon sa pagpamalandong kabahin sa pagtukod sa Relief Society kaniadtong 1842, naggamit ug naghisgot sa mga kapanguhaan gikan sa *Anak nga mga Babaye sa Akong Gingaharian: Ang Kasaysayan ug Buhat sa Relief Society*.

“Ang hunahuna nga kabahin niining tibuok kalibutan nga organisasyon sa Relief Society nindot kaayo,” miingon si Irene Kioi, ikaduhang



Ang Relief Society sa Samabula Ward sa Suva Fiji North Stake naghimo og kalihokan sa pagtabang sa mga sister nga mas makasabut ug makadayeg sa mga kinabuhi ug mga kontribusyon sa tanang kinatibuk-ang mga presidente sa Relief Society, gikan ni Emma Smith hangtud karon.

magtatambag sa kapangulohan sa Relief Society. “Kini naghatag kanako og kasigurohan nga ang [Relief Society] gi-orden sa Dios ug dili sa mga tawo.”

Sa Mombasa Branch, ang mga sister nagtuon mahitungod sa babaye nga mga disipulo ni Jesukristo gikan sa *Anak nga mga Babaye sa Akong Gingharian* ug sa Bag-ong Tugon. Ang presidente sa Relief Society sa branch, si Jael Mwambere, miingon, “Kini mao ang among unang anibersaryo sa Relief Society sa Mombasa Branch. Akong panghinaut nga unta kitang tanan magsugod pagbag-o sa atong pag-unong ngadto sa atong mga katungdanan sa Relief Society. Hinaut nga kita moamuma sa usag usa, motambong sa atong mga miting sa Simbahan, ug motabang niadtong nanginahanglan, sugod karon.”

Republika sa Marshall Islands

Niadtong Sabado, Marso 17, gatusan ka mga sister gikan sa Ajeltake Branch, Laura Ward, ug Long Island Majuro Ward sa Majuro Marshall Islands Stake nag-abut sa Rairok, usa ka lungsod duol sa Majuro Atoll, sa alas 4:30 sa buntag. Ang rason: ilang gilakaw sulod sa usa ka oras ug tunga ang meetinghouse sa Delap sa pagpakita sa hiyas sa paglahutay. Sa wala madugay nag-abut sila sa mga sister sa Delap ug Rita Wards, kinsa milakaw usab ngadto sa meetinghouse, alang sa debosyonal ug pamahaw. Sa wala madugay ang mga sister mipasundayag og mga skits ug mga sayaw ug naminaw sa pakigpulong gikan sa presidente sa stake.

Spain

Ang Dos Hermanas Ward sa Seville Spain Stake nagpakita og

exhibit sa kasaysayan sa Relief Society sa ward ug gilakipan og usa ka talagsaong libro sa mga litrato sa serbisyo ug mga kalihokan nga magkaubang gibuhay sa mga sister sa panahong nanglabay.

Si María Pérez Sánchez, ang unang magtatambag sa kapangulohan sa Relief Society, miingon, “Ang [maka] himo sa pag-apil sa anibersaryo niini nga organisasyon nagpabati kanako nga mas duol ngadto sa pioneer nga mga babaye kinsa misakripisyo og maayo alang kanato. Ug karon, ning adlaw, kita makapadayon sa pagbuhay niining buluhaton nga ilang gihimo.”

Ang Estados Unidos

Didto sa Gardner Ward sa Springfield Massachusetts Stake, gisaulog sa mga sister ang ika-170 nga anibersaryo sa Relief Society sa usa ka panihapon nga gihimo niadtong Marso 15. Ang gabii naglakip og mga pasundayag gikan sa upat ka mga sister, ang kada usa namulong mahitungod sa usa ka babaye kinsa miimpluwensya sa iyang kinabuhi sa maayong paagi. Ang kada mamulong nagdala usab og gamay nga butang sa pagpakita og gibug-aton sa iyang pasundayag.

“Kini usa ka kalihokan nga mipalambo sa kalig-on ug katakus sa mga kababayan-an,” miingon si Jennifer Whitcomb, presidente sa Relief Society, “ug usab nag-awhag kanato sa pagtan-aw sa mga kalig-on, kasusama, ug katakus sa usag usa.”

Bisan tuod nga ang anibersaryo mismo milabay na, ang pagdapit alang sa mga sister sa paghimo og serbisyo ug ubang mga kalihokan sa pagsaulog magpadayon sa tibuok 2012. ■

Ang Programa sa Helping Hands Nagbukas og Paagi alang sa Misyonaryo nga Buhat, New Stake sa Amapá, Brazil

Ni Michelle Sá, uban sa mga kontribusyon gikan ni Elder Fabiano Cavalheiro

Niadtong Sabado, Marso 10, 2012, 21 ka mga tawo gibunyagan. Kini ang labing daghan nga mga tawo sa bag-ohay nga mga tuig diha sa mga estados sa Brazil sa Para ug Amapá, ang duha kabahin sa Brazil Belém Mission, nga midawat sa ordinansa sa bunyag sa samang adlaw ug mahimong “mga katagilungsod” uban sa mga Santos (Mga Taga-Efeso 2:19) ug maglakaw diha “sa kabag-o sa kinabuhi” (Mga Taga Roma 6:4).

Ang bunyag gipahigayon human dayon i-anunsyo nga ang distrito sa Macapá himoon

nga stake, nga nahitabo sa Abril 14 ug 15.

Mga lider, mga miyembro, ug mga misyonaryo nagtambayayong sa pagpaninguha niini nga matang sa paglambo. Ang trabaho sa programa sa Helping Hands nahimo usab nga instrumento sa bag-ohay nga misyonaryong buhat.

“Ang mga proyekto sa Helping Hands nga nahimo sa milabay nga duha ka tuig sa estado sa Amapá nagdala sa Simbahan gikan sa kangiub, nagpahigmata sa mga opisyales sa gobyerno, sa mga tigmantala, ug sa katilingban

sa kinatibuk-an sa tinguha nga mahimong masinati sa maanindot kaayong programa ug sa simbahan nga nagpasiugda niini,” miingon si José Claudio Furtado Campos, bag-ong na-releasad nga presidente sa Brazil Belém Mission.

Sa tinuod, ang mga proyekto nagtabang og maayo sa estado nga ang mga opisyales sa gobyerno mipagula og tulo ka bag-ong mga pista opisyal sa rehiyon: Abril 6, Adlaw sa Ang Simbahan ni Jesukristo sa mga Santos sa Ulahing mga Adlaw; Hulyo 30, Adlaw sa Helping Hands Solidarity Action; ug Septyembre 23, Adlaw sa “Ang Pamilya: Usa ka Pamahayag ngadto sa Kalibutan”. Dugang pa, nagkauyon nga pasalamat sa Simbahan nga gihatag ngadto ni Elder Jairo Mazzagardi sa Seventy, Ikaduhang Magtatambag sa Area Presidency sa Brazil.

“Ang mga proyekto sa Helping Hands nakatabang sa Simbahan pag-angkon og dugang kredibilidad taliwala sa mga katawhan sa Amapá,” mipadayon si Presidente Campos. “Sa dihang ang atong mga misyonaryo mipaila sa ilang mga kaugalingon . . . , misulti ang mga tawo nga sila nakadungog na mahitungod sa Simbahan tungod kay sila nakakita og materyal diha sa telebisyon, sa radyo, ug sa pamantalaan. Nakadungog sila og mahinungdanong mga butang mahitungod sa Simbahan, ug kini sa kasagaran nagdugang sa pagkamaabibihon sa misyonaryong buhat.”

Si Michelle Sá mao ang assistant director sa public affairs, Macapá Brazil Stake; si Elder Fabiano Cavalheiro usa ka full-time nga misyonaryo nga nagserbisyo sa Brazil Belém Mission. ■

Sa Macapá, Brazil, 21 ka mga tawo ang gibunyagan niadtong Sabado, Marso 10, 2012, mga usa ka bulan sa wala pa mahimong stake ang Macapá Brazil District. Kining bag-o nga mga miyembro gilitratohan dinhi kauban sa mga misyonaryo nga gikan sa Brazil Belém Mission. Ang timaan nag-ingon, “Estaca Macapá,” o “stake sa Macapá.” Ang lokal nga pagpangulo ug pagpamiyembro nakatampo og maayo sa kalamboan ug kalig-on sa Simbahan ngadto sa programa sa Helping Hands.



GILITRATOHAN NI MICHELLE SÁ

Mga Lider sa Simbahan Namulong sa mga Gradwasyon sa Hawaii, Idaho ug Utah

Mibiyaheng mga lider sa Simbahan ngadto sa mga eskwelahan sa Simbahan sa Hawaii, Idaho, ug Utah, USA, sa panahon sa Abril sa paghatag og mga pulong sa tambag ngadto sa mga nanggradwar.

Sa Brigham Young University–Idaho niadtong Abril 7, 2012, si Elder M. Russell Ballard sa Korum sa Napulog Duha ka mga Apostoles mitambag sa mga estudyante sa “pag-ilis sa kahadlok ngadto sa hugot nga pagtuo.”

“Ako nagtuo nga kita hapit na magsugod sa bag-ong panahon sa paglambo, pag-uswag ug pagka-abunda,” miingon siya. “Nag-aghat ako kaninyo sa paghimo og pasali diha sa inyong kaugalingon ug ngadto sa Langitnong Amahan sa paghalad sa inyong kinabuhi ug sa pagpahinungod sa inyong panahon ug mga talento sa pagtukod sa Simbahan ni Jesukristo agi og pagpaabut sa Ikaduhang Pag-anhi sa Manluluwas.”

Si Elder D. Todd Christofferson sa Korum Napulog Duha ka mga Apostoles mibisita sa LDS Business College sa Siyudad sa Salt Lake, Utah, niadtong Abril 13, 2012, sa pagpamulong sa gradwasyon sa mga estudyante gikan sa 50 ka mga estado sa US ug sa 67 ka mga nasud.

Gihatagan niya og gibug-aton ang panginahanglan sa mga estudyante sa paghatag og serbisyo sa tibuok nilang mga kinabuhi. “Ang serbisyo mao ang inyong panagang batok sa kahakog ug sa pagbati nga mainyo ang unsay inyong gusto nga nagkagrabe sa pagsamok sa mga katilingban sa tibuok kalibutan. . . . Ang inyong pagserbisyo mopanalangin sa uban, apan kini usab mopanalipod kaninyo,” miingon siya.

Sa pagkasunod adlaw, si Elaine S. Dalton, kinatibuk-ang presidente sa Young Women, mihatag niining mga pulong sa tambag ngadto sa mga estudyante sa BYU–Hawaii: “Hinumdumi kon kinsa kamo.” “Trabaho og maayo.” “Pangandam sa kalisdanan.” “Pagdamgo og dako.” “Ang mga mananaog dili sa kanunay mao ang unang mahuman.”

“Dagana ang inyong lumba sa hugot nga pagtuo ug kinabuhi,” siya miingon. “Ayaw pagpakawala og kadasig sa mga kalisud, apan tan-awa ang oportunidad diha sa kalisdanan. Lakaw uban ang mga lakang nga may pagsalig ug sa usa ka siguro nga kahibalo nga kamo wala gayud mag-inusara. . . .

Hugot akong nagtuo nga ang usa ka mahiyason nga batan-ong lalaki o batan-ong babaye giniyahan sa Espiritu makausab sa kalibutan.”

Niadtong Abril 19, 2012, ang migradwar nga mga estudyante sa BYU sa Provo, Utah, naminaw ni Elder Dallin H. Oaks sa Korum sa Napulog Duha ka mga Apostoles, kinsa namulong mahitungod sa mga hagit



ITRATO SA MAAYONG KABUBUTON SA BYU-PROVO

Ang mogradwar nga mga estudyante sa BYU sa Provo, Utah, naminaw ni Elder Dallin H. Oaks sa Korum sa Napulog Duha ka mga Apostoles, niadtong Abril 19, 2012.

sa kalibutan apan misulti sa mga migradwar sa paglantaw ngadto sa umaabut uban sa hugot nga pagtuo.

“Bisan og ang mga tawo nangalisang, kamo kinahanglan nga dili mahadlok. Adunay mahagitong mga panahon kanunay,” miingon si Elder Oaks. “Kami, ang mga henerasyon sa inyong mga katigulangan, milahutay sa malisud nga mga hagit, ug mao usab kamo. . . . Kita adunay Manluluwas, ug Siya mitudlo kanato kon unsay atong kinahanglan nga buhaton.”

*Alang sa dugang pa niini nga istorya ug sa ubang mga mensahe gikan sa mga lider sa Simbahan, bisitaha ang pahina sa *Prophets and Apostles Speak Today* diha sa prophets.lds.org. ■*

Gibag-ong mga LDS Map Nagtabang sa mga Miyembro sa Pagpangita sa mga Nahimutangan sa Simbahan

Usa ka bag-ong bersyon sa mga LDS Map naglakip og nagkalainlaing mga hulagway nga mopaarang-arang sa mga kasinatian sa mga miyembro sa pagpangita og mga sakop sa stake, meeting-house, templo, ug ubang mga pasilidad sa Simbahan.

Sa pag-access sa bag-ong LDS Maps, adto sa **LDS.org > Tools > Maps**. Kini anaa sa 16 ka mga pinulongan—Chinese, Czech, Danish, Dutch, English, Finnish, French, German, Italian, Niponggo, Korean, Norwegian, Portuguese, Russian, Spanish, ug Swedish.

Ang pipila sa bag-o nga mga hulagway naglakip sa mga household verification, daghang gipakita nga mga kapiliang mapa, mas maayo nga iPad ug tablet support, mga mapa sa utlanan sa unit,

ang Locate Me nga hulagway, ug gipanindot nga mga kapilian sa pagprinta.

Ang usa ka tawo nga naggamit sa bag-ong bersyon makatultol sa LDS nga mga simbahan, matan-aw ang mga direksyon sa pagmaneho ug maimprinta kini, ug makigbahin og mga link sa mapa pinaagi sa social media. Usab, kon may LDS Account, ang mga miyembro makakita og impormasyon sa ward ug stake nga para kanila ug sa naglibut niining mga area.

Mga Miyembro Gidapit sa Pagsumiter og mga Litrato sa Kinatibuk-ang Komperensya ngadto sa mga Magasin

Ang *Liahona* ug *Ensign* nga mga magasin naghango sa mga miyembro sa pag-apil sa umaabut nga kinatibuk-ang komperensya, ug sa kinatibuk-ang mga komperensya nga mosunod,

pinaagi sa pagsumiter og mga litrato nga may kalabutan sa komperensya gikan sa ilang lokal nga mga area human dayon sa komperensya. Kini nga mga litrato mahimong imantala sa Mayo ug Nobyembre nga mga isyu sa mga magasin.

Ang mga miyembro makasumiter sa ilang mga litrato nga dali ug sayon ngadto sa LDS.org pinaagi sa pag-adto sa **Menu > Magazines** (o sa pag-type og **lds.org/magazine**), ug dayon i-klik ang **Submit Your Material** sa tuo nga kolum sa landing page sa mga magasin.

Ang mga pahina sa *Liahona* ug *Ensign* usab adunay mga seksyon nga giulohan og “Submit Material” diin ang mga miyembro maka-access sa internet sa mga porma sa pagsumiter sa mga litrato.


Ang mga miyembro kinahanglan nga moribyu sa Image Guidelines sa dili pa mosumiter sa ilang mga imahen. Ang mga sumbanan ubos sa “General Conference Photos” naghatag sa eksaktong pormat sa litrato, kalidad, ug sulod nga pangitaon sa mga editor sa magasin, ingon man sa deadline sa pagsumiter sa litrato sa komperensya.

Tablet App alang sa *Liahona* Gi-release

Ang Simbahan mihimo og bag-ong prototype tablet app nga nagpakita sa sulod sa magasin. Ang LDS *Liahona* app naglakip sa mga isyu sa Oktubre 2011, Nobyembre 2011, ug Mayo 2012 sa magasin—sa ato pa, ang isyu sa Basahon ni Mormon ug ang duha ka labing bag-o nga mga isyu sa kinatibuk-ang komperensya.

Ang LDS *Liahona* anaa sa Iningles, Portuguese, ug Spanish ug nagtanyag ug mas aktibong pakig-istoryahanay—gani matuhupon—nga kasinatian sa magasin; sama pananglit, ang tiggamit makabasa sa magasin samtang naminaw ngadto sa audio file sa samang basahon. Ang app gidesenyo alang sa paggamit sa bisan hain sa Android o Apple nga mga platform. ■

Usa ka bag-ong gipagula nga LDS Maps naglakip sa mga household verification, daghang gipakita nga mga kapiliang mapa, mas maayo nga iPad ug tablet support, mga mapa sa utlanan sa yunit, ang Locate Me nga hulagway, ug gipanindot nga mga kapilian sa pagprinta.



Pinaagi sa Gagmay ug Yano nga mga Butang

Ang akong anak nga lalaki nga si Taylor (Elder Mulford) nagserbisyo og misyon sa isla sa Bora Bora sa Tahiti. Iya akong gisultihan sa dili pa lang dugay nga ang presidente sa stake mianha sa Bora Bora ug gisultihan ang mga misyonaryo mahitungod sa giunsa niya pagbisita ang usa ka barbero, nga miyembro, aron sa pagpatupi. Gipangutana niya ang barbero ngano nga walay *Liahona* nga magasin sama sa uban nga iyang ipabasa sa mga magpatupi. Misaad ang barbero kaniya nga sa sunod niyang pag-anha, aduna nay mga *Liahona* didto. Apan, sa sunod higayon nga ang presidente sa stake miadto sa barbero, gihapon walay mga *Liahona*. Nasagmuyo, gipangutana niya ang barbero kon ngano. Gipasabut sa barbero nga sa matag higayon nga magbutang siya og *Liahona* sa gawas, adunay usa ka tawo nga mobasa niini, mangutana kaniya og daghang mga pangutana, ug dayon mohangyo kon mahimo bang iyahon na ang magasin. Ang barbero miingon nga siya wala nay mga magasin nga ikahatag, apan midugang siya nga daghan sa mga tawo kinsa midala sa mga magasin gitudloan sa misyonaryo.

Makahunahuna ba kamo unsa kaha ang mahitabo kon ang kada doktor, dentista, ug barbero diha sa Simbahan mobutang og diyutay nga mga magasin sa Simbahan sa iyang lawak hulatanan? Ang Simbahan nag-uswag tungod sa gagmay ug yanong mga butang nga gibuhat sa mga miyembro.

Burdell Mulford, Utah, USA

Palihug ipadala ang inyong ikasulti o mga sugyot ngadto sa liahona@ldschurch.org. Ang mga gisumiter mahimo nga i-edit alang sa gitas-on o sa pagklaro. ■

Kini nga isyu naglangkob og mga artikulo ug mga kalihokan nga mahimong magamit alang sa family home evening. Ang mosunod mao ang pipila ka mga ehemplo.



“Pagpalambo og Pagtuo diha kang Kristo,” sa pahina 12: Sa katapusan sa artikulo, namulong si Elder Christofferson mahitungod sa hugot nga pagtuo isip usa ka baruganan sa lihok ug gahum. Isip usa ka pamilya, hunahunaa ang paghisgot og pipila ka mga hagit nga inyong giatubang ug mga tumong nga inyong buhaton sa pagbuntog niini. Pagpili og usa ka tumong nga buhaton niining semanaha, maghinumdom nga uban sa tabang ni Jesukristo, kita adunay gahum sa pagbuhat sa tanan nga mga butang, sumala sa iyang kabubut-on ug panahon. Sa sunod nga family home evening, gusto tingali ninyong hisgutan ang pag-uswag sa inyong pamilya kabahin sa tumong nga inyong gihimo.

“Pagpakigbahin sa Ebanghelyo pinaagi sa Inyong Maayong Ehemplo,” sa pahina 16: Samtang inyong ipakigbahin ang mga istorya gikan sa artikulo, hangyao ang inyong pamilya sa paghunahuna mahitungod sa mga higala ug mga sakop sa pamilya kinsa mahimo ninyong ipakigbahin ang ebanghelyo. Hisguti kon sa unsa nga paagi nga mahimong usa ka higala ug sa pagpaminaw uban ang gugma aron kon ang mga oportunidad sa pagpamatuod

moabut, kamo maandam.

“Ang Pag-ampo nga naa sa Personal nga Kauswagan,” sa pahina 58: Basaha ang kasinatian ni Amalia mahitungod sa pagkat-on og pag-ampo sa buntag ug sa gabii. Hunahunaa ang pagbasa kon unsay gitudlo ni Amulek diha sa Alma 34:17–27 kon unsaon nato sa pag-ampo. Mahimong kamong mangutana og mga sakop sa pamilya kon unsa nga mga pagtulun-an ang gihatag niini nga mga bersikulo mahitungod sa unsaon ug kanus-a kita kinahanglan nga mag-ampo. Tapusa pinaagi sa imong pagpamatuod sa gahum sa pag-ampo.

“Misyonaryo nga Higala,” sa pahina 60: Human sa pagbasa sa artikulo, hunahunaa ang paghimo og lista sa umaabut nga mga kalihokan ug mga miting sa Simbahan nga mahimong mainteresado ang mga higala sa tagsatagsa ka sakop sa pamilya. Mahimong inyong i-role play ang mga paagi sa pagdapit og mga higala diha sa usa niini nga mga kalihokan. Paghisgut kon unsay gipasabut nga mahimong tinuod nga higala, ilabi na niadtong kinsa dili miyembro sa Simbahan. Tapusa pinaagi sa paghimo og plano sa pagkontak sa higala ug sa paghatag og imbitasyon. ■

Kami Malipayon nga Pamilya

Ang family home evening nga kanunay namong mahinumduman mao kadtong gihimo sa malisud nga panahon. Tungod sa pag-ilis sa pagdumala, ang akong bana miagi og pipila ka mga hagit diha sa trabaho ug gibati nga nawad-an sa kadasig.

Mihukom kami nga ang family home evening niana nga semana himoon sa pagpasidungog kaniya. Kada sakop sa pamilya misulat kaniya og sulat pasalamat, nagsulti nganong gihigugma namo siya ug unsay among gilaum alang kaniya. Dayon mihimo kami og album sa mga litrato sa pamilya sa importanting mga panahon, sama sa mga anibersaryo, kaminyoon, sealing, pagkatawo, ug ubang mga hitabo. Misulat kami og mga komentaryo sa kada usa, nagtapos sa “Ug busa kami malipayong pamilya.” Sa pagtapos sa gabii, ang akong anak nga babaye ug ako mikanta og awit sa Primary nga naglangkob og samang hugpong sa mga pulong (tan-awa sa “A Happy Family,” *Children’s Songbook*, 198).

Sa panahon sa family home evening atong mabati ang gugma sa Manluluwas alang kanato ug ang gugma nato alang sa usag usa.

Mapasalamaton ako alang sa dinasig nga sugo sa paghimo og family home evening. Ang pagsunod niini naglig-on kanato, nag-andam kanato nga mahimong mahangturon nga pamilya. ■

Kenia Duarte dos Santos, Brazil

UNSA ANG AKONG BILI?

Ni Adam C. Olson

Mga Magasin sa Simbahan

Human sa upat ka tuig nga walay TV ug unom pa ka tuig gamit ang second hand nga mga TV, ako ug ang akong asawa nakahukom nga mopalit og bag-ong TV. Tungod sa kantidad, gikumpara namo ang mga modelo, brand, features, ug mga presyo sa wala pa mopalit. Makalingaw, kay nakadala ko og dili lamang usa ka TV apan usa ka importanting panan-awon sa pagdeterminar sa kaugalingong bili.

Ang among kasinatian nagtudlo kanamo nga ang among bili gisukod pinaagi sa pagkumpara—ngadto sa among mga igsoon, mga klasmeyt, kaedad, ug kaubanan sa trabaho. Hinoon, kon determinahon ang bili pinaagi sa pagkumpara adunay kahulugan kon magpalit og TV, sa kinabuhi kita *ang mga TV*.

Ang pagkumpara sa atong kaugalingon ngadto sa uban aron madeterminar ang atong bili sama ra usab sa usa ka TV diha sa tindahan nga nagtan-aw sa ubang TV ug nanghinaut nga unta 40 ka pulgada siya (102 cm) kay sa 27 (69 cm). Wala kini hinungdan, kay kinsa man kaninyoy makadugang ug usa ka takna sa gitas-on sa iyang kinabuhi” (Mateo 6:27) o usa ka pulgada sa gidak-on sa inyong screen? Mipasidaan si Apostol Pablo nga ang mga tawo nga “nagapakigsukdanay sa ilang masigkaugalingon, ug nagatandiay sa ilang masigkaugalingon, sila walay kabuot” (2 Mga Taga-Corinto 10:12).

Kinahanglan usab nga dili kaayo nato tagdon kadtong nanagkumpara alang kanato ug nagsulti kanato kon unsa sa *ilang* pagtuo ang atong bili. Bisan og ang tigbaligya dunay kontrol sa presyo sa TV, dili siya ang nagdeterminar sa bili niini.

Kini ang importante: ang kustomer maoy motan-aw sa presyo, motimbang-timbang sa produkto, ug mohukom kon angay ba ang kantidad. Ug niini nga kinabuhi dunay usa lamang ka Pumapalit nga importante.



Mohukom ang tigpalit kon ang butang angay ba sa kantidad.

Ang atong Manluluwas, si Jesukristo, mi-timbang-timbang sa produkto”—kita, sa tini-ngob ug sa tinagsa. Nahibalo siya sa kalawom sa kaudatan nga may kalabutan sa tawhanong pamilya.¹ Nakasabut Siya sa makahahadlok, dili masukod nga kantidad nga gikinahanglan niyang ibayad, “kansang pag-antus nakapahimo [Kaniya], gani ang Dios, ang labing halangdon sa tanan, sa pagkurog tungod sa kasakit, ug sa pag-agas sa dugo sa matag lungag sa panit, ug sa pag-antus sa lawas ug sa espiritu” (D&P 19:18).

Ug nakahibalo sa tanan, *mihukom gihapon Siya nga angay ang akong bili niini*.

Bisan unsa ko kalayo sa akong hunahuna kon ikumpara sa uban, bisan unsa ka gamay sa akong bili diha sa panan-aw sa uban, mibati si Jesus nga angay ang bili sa kantidad nga iyang bayaran.


Ang pag-atake ni Satanas sa atong kaugalingong bili maoy usa sa pinakamalalahanon gani mahulgaon nga mga taktika. Mahinungdanon alang kanako ang pagtuo nga ang Anak sa Dios namatay dili lamang alang sa mga sala sa kalibutan apan Siya namatay alang sa *akong* mga sala. Kon ang kaaway makapatuo kanato nga sukwahi niini, ang akong pagduha-duha makapugong sa akong pagtinguha sa maulaon nga grasya sa Manluluwas ug pagbalik ngadto sa Iyang presensya.

Kon nagduha-duha ka man sa imong bili, adtoa ang Pumapalit aron makuha ang bugtong nga pagribyu sa produkto nga mao lamang ang mahinungdanon. “Makaampo kita uban sa kamasaligon nga atong mabati ang gugma sa Manluluwas alang kanato,” miingon si Presidente Henry B. Eyring, Unang Magtatambag sa Unang Kapangulohan. “. . . Nahigugma siya kanato. . . igo sa pagbayad sa tanan natong mga sala.”²

Ang pagbaton og hugot nga pagtuo niana nga gugma magtugot sa Manunubos nga mousab sa atong kinabuhi ug modala sa Iyang pinalit pauli. ■

MUBO NGA MGA SULAT

1. Tan-awa sa *Mga Pagtulun-an sa mga Presidente sa Simbahan: Joseph Smith* (2007), 493.
2. Henry B. Eyring, “Usa ka Tinun-an ug Usa ka Anak,” *Liahona*, Mayo 2003, 31.



Nang-ayo si Jesus sa Masakiton
ug Mipanalangin sa mga Bata

3 Nephi 17

Daghang isyu sa *Liahona* niining tuiga naglangkob og usa ka set sa mga tawo sa kasulatan diha sa Basahon ni Mormon. Aron molig-on kini ug sayon nga gamiton, guntinga kini ug ipapilit o i-tape sa baga nga papel, gamay nga bulsita, o mga tukog. Tipigi ang matag set sa usa ka sobre o bag, kauban sa label nga naghisgot kon asa makita ang istorya sa kasulatan nga haum sa mga tawo.



Ang mga proyekto sa welfare ug humanitarian, mga employment center, mga opisina sa mission, mga family history center, mga templo, mga visitors' center, ug daghan pang mga dapit nakahatag og mga oportunidad nga makaserbisyo ang senior missionary. Ug ang mga senior makasigurado nga ang ilang calling gikan sa Ginoo, pinaagi sa Iyang propeta. Ang Ginoo nasayud sa saktong oportunidad alang sa matag misyonaryo nga andam moserbisyo. Tan-awa sa "Mga Senior Missionary: Pagtubag sa Panawagan sa Propeta," pahina 20.